

APOLOGETICA EX-
POSITIO,

QVA OSTENDITVR

TIGVRINAE ECCLESIAE MINISTROS
nullum sequi dogma hæreticū in Cœna domini, li-
bellis quorūdam acerbis opposita, & ad omnes syn-
ceram ueritatem & sanctam pacem amantes Christi-

fideles placidè scripta, per *HEINRT.*

CHVM BVLLINGERVM,

Tigurinæ ecclesiæ mi-
nistrum.



I H S V S.

*Hic est filius meus dilectus, in quo plac-
ta est anima mea: ipsum audite.*

Matth. 17.

*TIGVRI APVD ANDREAM GES-
NERVM F. ET IACOBVM GES-
NERVM FRATRES.*

APOLOGETICA EX-
POSITIO, QVA OSTENDITVR TI-
gurinæ Ecclesiæ ministros nullū sequi
dogma hæreticum in doctrina Cœnæ
Domini, Libellis quorundam acerbis
opposita, & ad omnes synceram ueri-
tatem & sanctam pacem amantes Chri-
stifideles placidè scripta, per *HEIN-*
RICHVM BVLLINGERVM
Tigurinæ Ecclesiæ
ministerium.



*NON sponte nec petulantia quadā aut
vlla contendendi libidine, aut quen-
quam in certamen prouocandi studio
dicturus nunc procedo, sed aduersario
rum quorundam acerbissimis nulloq; modo dissimulan-
dis scriptis protractus adeoq; summa quod dici solet ada-
ctus necessitate. Vulgati enim sunt, quos ego quidem vi-
derim, Libelli quinq; fortassis plures, quos nondum vi-
di, prodierunt, à diuersis scripti authoribus, sed singuli
ex professo in nos, ceu omnium quos vnquam tulit ter-
ra, aut quos vlla vnquam viderunt secula depraua-
tissimos homines aditi. Equidem nominatim & identi-
dem protrahimur Tigurini, protrahuntur et mortui in
domino & viuentes Tigurinæ ecclesiæ ministri. Recen-
semur inter Valētinianos, Anabaptistas, Davidianos,*

& Memnonitas. Adobruimur barbaris probrosissi-
 misq; appellationibus nuncupati Schuermerei, theoma-
 chi, cybeuta, impostores, iconomachi & psychocleptæ.
 Nam et doctrinam nostram appellant vanam, lolium,
 venenum, pestem, hæreticam, sacrilegam, sathanicam.
 Ideoq; non verentur & nos hisce ornare titulis, ut vo-
 cent impios, mendaces, lupos, sacrilegos, pseudoprophe-
 tas & pseudoapostolos, sed & prophetas ac apostolos
 satellitesq; diaboli, incendiarios & pacis turbatores, de
 nig, pertinaces hæreticos, blasphemos, quin & blasphe-
 mia diffuentes. Quibus ne quid absolutæ desit crimina-
 tioni, addunt insuper & hæc, Nulla est illis hominibus
 religio, at magna audacia corrumpendi innumeros scri-
 pturæ locos peruertendiq; scripta veterum. Sunt enim
 homines leues & ociosi, fingentes subinde noua dogma-
 ta primitiua ecclesiæ ignota, & pugnantia cum doctri-
 na scripturæ sanctæ & cum perpetuo consensu catholi-
 cæ ecclesiæ, diaboli organa appositissima ad exitium ec-
 clesiæ perniciemq; totius Reipublicæ. Et hæc quidem om-
 nia nobis propter doctrinam præcipuè quam in negotio
 Cæncæ dominicæ sequimur, impingunt. Quis verò fide-
 lis Christi minister tam atrocia dissimulet, aut sur-
 da aure transeat? Agnoscimus sane nobis patientia con-
 stantiaq; Christiana omnis generis contumelias, probra
 iniuriasq; aduersariorum omnium & ferendas esse et
 superandas. Id quod ut præstemus dominum sedulo o-
 ramus. Et quidem nunc propter Christum, qui nobis
 quoq; nostra condonauit peccata, illis nostris antagoni-
 stis grauissimam illam nobis illatam iniuriam, condo-
 namus,

namus, precantes dominum ut ipse quoque grande scelus
condonet spiritu suo illuminet ut quid peccarint agno-
scant. Interim ne nostra illa demissione ferocibus illis,
vel culpam deprecari, vel crimina intentata agnoscere
videamur, neue viri boni iure dicant nos parum strenue
nostro defungi officio, veritatemque & sanctum nostrum
ministerium deserere imò & prodere, adde & simpli-
cioribus vacillandi denique & male suspicandi de eccle-
sia Tigurina, quæ orthodoxa aliqui non hæretica est ec-
clesia, occasionem obiectare, domino aspirante planum
efficiam, Ecclesiæ Tigurinæ ministros nullum dogma
sequi hæreticum in doctrina Cæna domini, neque ullos
vel scriptura sancta vel sinceriorum veterum scripto-
rum sententias corrumpere, vel vlla dogmata noua consin-
gere, aut consensum catholica ecclesiæ perpetuum diuel-
lere, sed nos religiose potius versari in scripturis sanctis,
& ne latum quidem pilum à dogmatibus receptis apo-
stolica ecclesiæ deflectere, atque ita sanctè in orthodoxa
& catholica fide perseverare.

Scopus hu-
ius expositio-
nis apologeti-
cæ.

Illis verò qui sibi prorsus persuaferunt omnia illa cõ-
uitia & scripta aduersariorum acerba tacendo uberio-
re cum fructu declinari potuisse, & illis etiam qui hu-
iusmodi scriptores, non benigne, sed pro merito ipsorum a-
cerbissime & excipiendos & tractandos arbitrantur,
illud apostoli ex posteriore ad Corinthios, relinquo ex-
pendendum, Ne usquam demus offensionem, ne repre-
hendatur ministerium, sed in omnibus commendemus
nos ipsos, ut Dei ministri: in tolerãtia multa, in afflictio-
nibus, in necessitatibus, in anxietatibus, in plagis, in car

ceribus, in seditionibus, in laboribus, in vigilijs, in ieiunijs, in puritate, in scientia, in animi lenitate, in benignitate, in spiritu sancto, in charitate non simulata, in sermone veritatis, in potentia Dei, per arma iustitia dextra & sinistra, per gloriam & ignominiam, per conuitia & laudes, quasi impostores & tamen veraces, quasi ignoti & tamen noti, quasi morientes & ecce uiuimus, quasi correpti & non occisi, quasi dolentes semper tamen gaudentes, quasi pauperes multos tamen distantes, ut nihil habentes & omnia possidentes.

Proinde hac saltem vice benignas mihi aures praebe te, viri patres & fratres in Domino semper venerandi et dilecti. Neque est quod metuat is vos nihil in hac mea expositione, quod apologetica dicatur, audituros quam probra & conuitia, quibus aduersariorum contumelias compensem, ac in ipsas inuehar scriptorum personas. Quinimo libenter abstinere ab illorum personis, quas ne quidem nominauero, cum ita hoc vobis placere subintelligere videar. Nollem tamen hoc aduersarios huc retorquere, quasi à me vilipendantur & nomina ipsorum malignè ac contemptu praeferantur superbissimo. Si quid illis diuina concessit benignitas, ut docti sint, & apud suos in magno precio ecclesiarum ministri habeantur, adeò hoc illis non inuideo, ut ipsis adhuc uberiorem imprecer felicitatem, adeoq; sicubi videatur sui veluti obliti, & se praefer decorum nec pro ministerij sui eruditionisq; existimatione ac dignitate gerere, sortem ipsis optem meliorem. Ferè autem fit in collationibus, ut personae inuehentes in personas, rem tractadam
vel

vel cupidi negligent, vel altercando obsecrent, simul autem exiguo cum fructu differendo, magnam adferant auditoribus molestiā. Quas quidem ob causas præteritis aduersarijs, quasi quinā illi sint, nesciā, ad ipsam duntaxat causam discutiendā, pro mea gratiā à Domino accepta modulo, fidelem adhibebo diligentiam.

Neq. hic etiam vestra abutar beneuolentia. Potiora enim huius causæ tractabo non singula, neq. minutias anxie persequendo excutiam, tantum abest ut conuictijs & sophismatibus quibusuis respondere necessarium & utile fore existimem. Studebo itaq. quoad eius fieri potest, breuitati simul & perspicuitati simplicitatiq. Et quidem res ipsa eiusmodi esse videtur, ut nerui vel præcipua rei paucis & dilucide explicari, deniq. et intelligi, nulloq. negotio illa etiam, ad quæ singulariter & prolixè non respondimus, qualia sint, dijudicari possint. Dominus Iesus facultatem ista præstandi benigne nobis concedat.

Consentire non dissentire nos in causa
Cœnæ Domini.

P Rincipio edita Farragine confusaneorum & inter se Farrago confusaneorum opinionum.
dissentientium opinionū de Cœna Domini, spectabilis obijcitur nobis dissensio. Ac ne huius argumenti nescias occasionem, scripta & adita est annis ab hinc 6. Consensio mutua in re sacramentaria clariss. viri D. Ioan. Caluini, præterea & venerandi senis deq. Ecclesia optime meriti D. Guilhelmi Farelli, reliquorūq. fidelium Geneuensium et Neocomen. ecclesiæ ministrorum, & nostrum quoque qui Tigurina ministramus ecclesiæ. Ac

tum quidem adiectis epistolis, exponebamus, qua occasione & in quem finem nostram ederemus Consensionem. Sperabamus certè si quid suspicionum ex diuino & iam aliquandiu intermisso certamine fuisset adhuc relictum, illa nostra consensione iri expunctum. Sed ecce insurgit de repente qui non modo non gratulabatur fratribus concordiam, sed concordēs in sincera Christi veritate, diaboli confæderatos appellat, Farraginem illam protrudit, clāsicū canit insisitq̃, vt dissipetur ista diaboli (sic fortassis loqui consuevit) coniuratio. Quis verò hæc non miretur? Inter alia, Nusquam, inquit, sibi constant in vna certa & perpetua aliqua sententia, vacillant ipsi, hærent incerti, dubij, perplexi, aliosq̃ dubios & perplexos non tantum relinquunt, sed etiā red dunt. Addit, D. Lutherum hæc quoq̃ dissensionem nostris obieciſſe. Sed & exemplis aliquot in medium prolatiſ, diuerſitatem illam omnium oculis contemplādam exponit, Cū, ait, disertum sit domini verbū, Hoc est corpus meū, isti diuerſiſſimas affingunt expositiones. Hoc ſignificat corpus meum. Hoc est ſignum, figura, vel ſymbolū corporis mei. Hoc est memoria vel memoriale aut commemoratio corporis mei. Hoc est teſtimonium & obſignatio traditi corporis mei. Et reliqua. Ex illa varietate colligit agi nos erroris ſpiritu, doctrinamq̃ noſtram & ſemetipſam elidere, & manifeſtè hæreticam apparere. Cæterum ſi ſic pergat ob diuerſas expositiones crimen impingere hæreſeos, quid tandē fiet de ipsis, qui bus dudum eſt obiectum, ne ipsis quidem in expositione verborum domini, Hoc est corpus meum, congruen-

ita scribere per omnia. Excipit ille, *Quoniam nostri nonnihil variant in eloquutione, tamen in sententia conueniunt.* Omnes enim intelligunt de vero corpore & sanguine, quæ constanter afferunt in Cæna distribui et percipi. Quod si hæc ipsis iusta suæ diuersitatis videtur esse excusatio, recipiant à nobis vicissim illam ipsam satisfactionem, quam offerunt nobis. *Quoniam enim nonnihil variemus in eloquutione, omnes tamen conuenimus in sententia.* Omnes enim intelligimus de vero corpore & sanguine Domini, quæ constanter dicimus in Cæna à fidelibus percipi spiritualiter nõ corporaliter. Et quis oro tam obesa & morosa mentis est, qui nõ intelligat istas omnes loquutiones, quas obyciunt veluti contrarias, in idem recidere atq; adeò, quod aiunt, æqui pollere? Cur ergo rem leuiculam ad tam enormem innocentium ignominiam attollunt? Verè pronunciauit Solomon, Odium excitat occasiones contentionum, sed dilectio multitudinem obtegit peccatorum.

Scripserunt olim Pontificij vastas contra D. Lutherum Antilogias, quas ex libris eius studiose collegerant, & his vniuersam eius doctrinam in suspensionem contradictionis errorisq; semetipsum subruentis, adducere studebant. Caterum cum antilogia ista potuerint reduci ad concordiam, aut aliqua saltem ratione excusari à non malignæ mentis hominibus, an non indignissimè vobiscum agi clamaretis, si quis rigide pergeret vobis antilogias illas obtrudere, & ex his fædum crimen hæreseos inurere? Cur ergo iuxta legem communem non abstineteis ab hac vestra calumnia, nobisq; non impin-

gitis, quod vobis impingi non vultis? aut cur eadem illa equitas in sententijs nostris & loquutionibus nihil reuera inter se pugnantibus, non seruetur, quam seruari in vestrorum antilogijs postulatis? Viuenti D. Luthero & hanc nobis diuersitatem interpretationum obijcieti, opposuimus morem catholica & orthodoxa veteris ecclesiae, qua diuersas & non raro contrarias inter se eiusdem loci interpretationes habuit: neq; tamen ob tam spectabilem diuersitatem, interpretes, quisquam haereseos aut corruptionis scripturarum condemnauit. De his abunde testantur hodie veterum ecclesiae doctorum Commentarij diligenter inter se collati.

Viuenti D. Zuinglio & D. Ioanni OEcolumpadio obiecit sanè D. Lutherus dissidium, quod hic verba Domini exponeret, Hoc est figura corporis mei: ille verò, Hoc significat corpus meum. Ex hac diuersitate & ille colligere voluit, doctrinam ipsorum semetipsam elidere. Sed responderunt boni illi viri & fideles ecclesiarum ministri, se consentire non dissentire. Cuius quidem rei extant adhuc scripta & publicata testimonia. Quis verò nesciat eiusdem esse verba interpretari, qui primum verba protulit? Quis nesciat verba in hoc esse inuenta, ut quid animo sentiamus, verbis pronunciemus? Cum ergo isti disertis verbis consensum mutuum testati sint, frustra colliguntur verba aliquot, quibus dissensio demonstretur. Consensimus & consentimus in doctrina Euangelica, & in causa Cæne Domini Heluetica ecclesiae, Consensionem hanc testati sumus scripto publico, Consensionem hanc non improbant aliae ecclesiae:

clesia: non improbant viri clarissimi & singularia Dei organa D. Petrus Martyr, D. Ioannes à Lasco, & ceteri quos non commemoramus. Quorsum iam pertinet dissidentium colligere farraginem? aut quæ malum insania est spargere illos dissentire, quos pax & concordia ecclesiarum, quarum illi ministri sunt, consentire testantur, adeoque sinceram concordiam veluti obsignant?

Sparsus quondam fuerat à pseudoapostolis rumor inter ecclesias ex gentilibus collectas, Paulum docendi ratione multum dissidere à cæteris apostolis, qui in prædicando Euangelio legem gratiæ coniungant, neque doceant fide sola absque lege iustificari peccatores. Eam ob rem ascendit Hierosolymam Paulus, ubi cum Petro, Iacobo & Ioanne, ac reliquis eius Ecclesiæ presbyteris, suum contulit Euangelium. Ac patuit ex ea collatione & consensione, omnibus eandem ab utrisque partibus rationem prædicandi Euangelij servari. Id quod etiam datis mutuum dextris, & ædita synodali epistola, omnibus ecclesijs contestati sunt: quod ipse ad Galatas commemorat Apostolus, & indiuiduus Apostoli comes Lucas in Actis apostolicis capite decimoquinto. Si verò post contestationem hanc consensionis apostolicæ, Archigenes aliquis malè feriatus extruxisset chaos Apostolicarum inexplicabilium, & mutuum sese collidentium opinionum dissensionumque, an ullam ab electis Dei retulisset gratiam? An verò non potuisset Minæus aliquis demonstrare, non probè multas sibi consentire sententias

Consensio et
dissensio apo-
stolica.

apostolicas? Et apostolum quidem ipsum Paulum in una atque eadem ad Romanos epistola dicere, Non qui legem audiunt iusti sunt apud Deum, sed qui legem faciunt. Et eundem mox iterum dicere, Ex operibus legis non iustificabitur omnis caro. Rursus eundem dicere, Si Abraham ex operibus iustificatus fuit, habet quod gloriatur, at non apud Deum. Quid enim scriptura dicit? Credidit Abraham Deo, & imputatum est ei ad iustitiam. Et reliqua. Contra verò beatum Iacobum reliquisse scriptum, Abraham pater noster, nonne ex operibus iustificatus est? Et reliqua, quæ leguntur Iacobi secundo capite. Quid? an non habent ista magnam dissensionis speciem? An non Archigenes ille Nazareus vel Minæus bonam operam se nauasse putabit? Quid verò sentiunt de his fideles? aut quam gratiam referent factori pro illa sua factura aut farragine? Nullam sanè, quinimò indignabuntur potius. Sentiunt enim omnes Sancti veram esse apostolorum consensionem, ea verò quæ aliquam præ se ferunt contradictionis speciem, aliter atque aliter pro occasione & circumstantiis locorum, temporum ac personarum esse scripta, denique & interpretanda. Quamquam verò scripta hominum, licet sanctissimorum, nedum nostra, apostolicis scriptis nullo modo, hac collatione in medium allata, ex æquem, ex ipsa tamen colligunt cordatiores, quàm promptum sit cuius farragines in re qualibet colligere, interim verò non quamuis mox dissensionis speciem, inter diuersa pronuntiantes, veram inter ipsos dissensionem esse comprobare

probare posse, multò minus huiusmodi esse hereticos.

Sed cur huius rei exemplum accerso tam procul, cum ipsorum verborum Domini Cœnæ diuersitas, & in hac ipsa tamen diuersitate summa concordia, nos possit instruere, non protinus animis & reuera dissidere, multò minus hereticos esse, qui dissimiles aut etiam in speciem dissidentes proferunt sententias. Matthæus, Lucas & Paulus scribunt: Vescientibus eis accepit Iesus panem (καὶ εὐχαριστήσας) & cum egisset gratias, dedit illis. Vnus Marcus habet, Et edentibus illis sumpto Iesus pane (καὶ εὐλογήσας) cum benedixisset, dedit illis. Lucas habet, Hoc est corpus meum, quod pro vobis datur. Paulus legit, Hoc est corpus meum, quod pro vobis frangitur. Neutrum inuenitur apud Sanctum Matthæum & Marcum. Quid quod Sanctus Paulus verba solennia, quæ consecrationis vocant, inuertit? Nam cum ceteri dicant, Hoc est corpus meum, solus Paulus ait, Hoc meum est corpus. Circa verba poculi longè luculentior cernitur diuersitas. Matthæus præmittit, Bibite ex hoc omnes. Marcus subiungit, Et biberunt ex eo omnes. Horum Lucas & Paulus non meminerunt. Matthæus denique & Marcus de poculo hæc nobis relinquunt, Hic est sanguis meus. Lucas & Paulus nec poculum nec vinum appellant sanguinem, sed manifestè dicunt, Hoc poculum nouum testamentū est in meo sanguine. Quid quod Lucas, Est, non habet, quod tamen Paulus habet? Matthæus & Marcus dicunt, Qui pro multis effunditur. Lucas ait, Qui pro vobis effunditur.

Diuersitas
verborum
cœnæ Do-
mini.

Paulus planè omittit, & tamen disertè dixit, Ego enim accepi à Domino, quod & tradidi vobis. Rursus repetit Paulus quod Lucas non habet, Hoc facite quotiescunque biberitis in mei commemorationem. Adijciunt Matthæus & Marcus, Non bibam posthac de genimine vitis huius. Paulus eius sententiæ ne verbo quidem meminit. Quid quod horum omnium beatus Ioannes apostolus planè non meminit. Exagitasset certè hanc diuersitatem Porphyrius aut Iulianus aut Libanius aut Lucianus aliquis. Quid verò sentiunt & agunt py & docti in verbo Domini? Sentiant nihil inter se dissentire Euangelistas & apostolos: reddigunt ergo verba illa & sententias in concordiam sanam, ut deinceps omnibus pateat, sub diuersis verbis & sententijs eandem omninò rem doceri. Quod si extersa ex animis inuidia, æqui lectores expenderint, quæ & nos sub diuersis verbis in explicatione verborum Domini, Hoc est corpus meum, protulimus, apparebit liquidè prorsus, idem nos loqui & sentire, sanctam & religiosam adferre interpretationem, & idcirco Christi omniumque Christifidelium, non Sathana & hæreticorum esse confæderatos, denique constare nobis omnibus in una certa & perpetua aliqua sententia, non vacillare nos, non hæerere, aliosq; perplexos dubios & intricatos reddere.

SACRA-

Sacramenta Christi Domini non exinaniri,
uel uacua à nobis reddi.

Aliud deinde crimen nobis intentatur longè enormius, exinanire, id est, euacuare atque adeò profanare nos Sacramenta corporis & sanguinis Domini, dum pertinaciter disputando de carnis & sanguinis Christi absentia, non possumus non exterminare e Cœna fidelium veritatem corporis & sanguinis Christi, neque aliud porro manducandum & bibendum relinquere fidelibus, quàm merum panem & vinum, vacua utique & nuda signa, planè nihil à prophanis signis differentia, quibus utiq; citra mysterium & fructum, aliquid ceu in tragædijs aut tabernarum signis representatur. Adijciunt his, simulare quidem nos amplius quiddam in Sacramentis agnoscere, quasi uerò Christi caro et sanguis percipiantur à sumentibus, cum reuera ita imponere statuamus simplicioribus. Reuera enim ac perpetuo nos perstare in sententia D. Zwinglij & Oecolampadij, qui nihil reliquerint Ecclesia, nisi inania signa, panem scilicet & vinum, quæ cum percipiuntur in Ecclesia, corporis & sanguinis Christi absentis memoriam debeant reducere. Id ut lectoribus persuadeant, plurima coaceruant undiquaq; collecta ex libris nostrorum & nostris, testimonia.

Ita quidem isti nos adoriuntur, dum autem vicissim à nobis urgentur veritate corporis Christi, coguntur sanè, velint nolint, fateri, signa Sacramentalia, non ad eum adimpleri modum, quo vacua lagena adimpletur vino, aut alio aliquo liquore.

Ergo caro et sanguis Domini, inquit, non sunt in pane
 et in vino, qualitative, aut quantitative, aut ut in loco.
 Proinde illis ipsis interpretibus, ut plena non vacua sint
 Sacramenta, planè non requiritur ut ipsum Domini
 corpus & sanguis qualitative, quantitative & ut in
 loco comprehendamus in pane et vino. Hoc autem cum
 ad eum modum, quem nobis præscribunt ipsi, facimus,
 cur dicunt nos euacuare Sacramenta? An verò nos e-
 uacuamus Sacramenta cum dicimus, corpus et sangui-
 nem Christi non contineri in Sacramento corporaliter:
 ipsi verò non euacuant, cum aiunt Christi corpus non
 imaginandum esse in pane, aut sanguinem compren-
 dum in vino qualitative, quantitative & ut in loco?
 An non unum & idem vtrinq; asserimus? Excipiunt,
 Sed omittis tu, quod nos diligenter adiungimus. Verè.
 Tameis enim corpus & sanguis Christi in signis sacra-
 mentalibus non sint & percipiuntur quantitative &
 ut in loco, sunt tamen in ijs & percipiuntur verè nifi-
 lominus. Quasi verò nos fictam, inanem aut imaginari-
 am sine effectū participationem intelligamus. Subijciunt
 isti: Nos autem veritatem istam explicamus per sub-
 stantialem ac corporalem, et tamen ineffabilem præsen-
 tiam ac perceptionem. Ergo posterioribus verbis negant
 rursus aduersarij nostri, quod prioribus confessi sunt. Si
 enim corpus & sanguis Christi non sunt in pane & vi-
 no quantitative & ut in loco, profectò corporaliter non
 adsunt, & corporaliter non percipiuntur. Hanc illatio-
 nem non haurimus, quod videri volunt, ex turbidis
 philosophia lacunis, sed ex ipsa veritate veri corporis
 Christi

Christi, atq; adeò ex sententia non philosophi alicuius
 rixatoris, sed ex celebris in ecclesia Christi doctoris, de
 rebus Theologicis non physicis, theologicè non philosophi-
 cè disputantis & dicentis, Spacia locorum, tolle corpori-
bns, nusquam erunt, & quia nusquam erunt, nec erunt.
 De qua re paulò post copiosius dicetur. Rursus si corpo-
 raliter est & percipitur corpus & sanguis Christi in cœ-
 na, quomodo dicitis adesse & percipi ineffabiliter? Inef-
 fabile est, quod verbis effari non potest, vel cuius mo-
 dus explicari non potest. At vos ipsi iamiam modum
 præsentia & perceptionis exposuistis, dum dixistis, ef-
 fentialiter vel corporaliter. Si modus est corporalis, ergo
 et effabilis. Si verò ineffabilis est, ergo co-
 poralis nō est. An verò resoluent isti nobis verum Christi corpus in
 spiritum? Vetat hoc Christiana religio & fides ortho-
 doxa. An contendunt ex aquo vacuum aut inanem
 ac puram nos aquam in baptismo habere, nisi insuper
 concedamus, aquam baptismi conuerti in ipsum sangui-
 nem Christi, aut sub specie aquæ latitare naturalē Chri-
 sti sanguinem? Videte viri py & sancti, in quas se ad-
 uersarij nostri angustius coartent, dum putant se aliter
 viuificari non posse, nisi corporaliter carnē Christi hau-
 riant & abluant se eius sanguine.

Nos verò, ut implicationem istam subterfugia-
 mus, & consona scripturis, fidei & mysterijs diuinis
 adferamus, quæ deniq; rectè possint à fidelibus intelligi,
 simpliciter dicimus, ipsum Dei filium assumpsisse ve-
 rum corpus humanum & sanguinem, quem & pro
 redemptione & salute nostra profudit. Dicimus hoc

Verum Do-
mini corpus,
& verus san-
guis cibus &
potus fidelium.

verum Domini corpus & verum eius sanguinem viu-
uificum esse cibum & potum: ac illa ipsa, non pro his
alia, non spiritum, non spirituale corpus edendum &
bibendum esse ad vitam eternam. Addimus his
adhuc clariora, & dicimus: Christus verus Deus &
homo, quamuis à nobis in cælum sublatu sit, & ad
dexteram patris resideat, ac corporaliter in terris non
sit, adest tamen nihilominus suæ Ecclesiæ, tanquam
caput vitale corpori viuenti, utpote in quo operatur
vitam & salutem. Nam vitam quæ est in viuifi-
ca eius carne, quam videlicet ut viueremus, in mor-
tem impendit pro nobis (sicuti & dixit: Ego sum pa-
nis vitæ, qui ederit ex hoc pane, viuet in æternum. Et
panis quem ego dabo, caro mea est, quam dabo pro
mundi vita) participat aut inspirat ille suo spiritu di-
uino suis fidelibus, ut verè iam in ipsis sit & viuat
Christus, fidelesque ipsum vera fide recipiant, &
ita pascantur atque potentur ipso Dei & hominis filio
spiritualiter.

Quomodo
percipiant?

Hæc inquam dicimus expresse spiritualiter fieri, per
fidem, etiam extra communionem Cænæ, quoties fide-
lis recolit vera fide passionem & incarnationem serua-
toris Christi: pariter autem & in ipsa Cæna sancta &
mystica, ubi iam etiam accedit insignis illa Christi in-
stitutio & solennis actio, quam appellant sacramenta-
lem. Ac disertè hic monemus cum spiritualiter dici-
mus, nō sentire nos carnem Christi mutari in spiritum.
Credimus enim carnem manere in sua essentia atque
natura, ipsamq; communicari nobis, non carnaliter,

&

Et eo modo quo vinum infunditur in pateram corporaliter, sed modo & ratione spiritali, sic ut caro ipsa residens aut manens in gloria ad dexteram patris in cælo, vitam totam carne tradita partam, spiritu suo vivifico effundat in corda fidelium, verbo Dei creditum, Deum inuocantium & legitime Cœnam celebrantium. Ergo si perrexerint aduersarij nostri adhuc obiectare symbola nos sacra euacuare, qui corporalem Christi præsentiam & manducationem negamus, spirituales illam, quam diximus, confitemur & inculcamus: consequetur illos euacuare & pro nihilo reputare Christum, spiritum eius, virtutem, redemptionem item, ac vitam. Nam si hæc Cœnam, imò fideles potius Cœnam celebrantes, nondum adimplent, inanes profecto & vacuæ res sunt. Ac mirum est profecto aduersariorum nostrorum animos sic esse depressos & carnaliter affectos, ut non existiment se vlla alia ratione carne Christi pascendos, nisi corporaliter vel carnaliter ipsam hauriant. Si enim spiritaliter percipi præstant, cur litigant nobiscum? An verò non erit Christus vita in cordibus fidelium, nisi corporaliter habitauerit in eis?

Euacuare
Symbola.

Ex istis iam & illud colliquefcit nos per spiritum Spiritus. non intelligere inane aut nihil aut imaginationem vanam, sed ipsam Christi veram veri Dei & hominis operationem in sanctis suis viuificam, quæ omnibus numeris fideles absoluat. Similiter cum dicimus carnem CHRISTI per viuificum spiritum Fides. & cœlestia dona recipi, aut hauriri à nobis fide:

per fidem non intelligimus subtilem speculationem aut
contemplationem humanam, sed virtutem diuinam
nobis diuinitus concessam, quæ Christum reuera perci-
pit, eiusq; vita fruitur. Id cum aly significantius, ut opi-
nor, exprimere voluerunt, dixerunt manducationem
corporis Christi differre à fide, eò quod sit fidei effectus,
quodq; verè participes eius facti, ex ipso & cum ipso vi-
uamus. Ego interim, ut istud non improbo, ita vulga-
ri & consueto loquendi genere in Ecclesia uti malo.
Nam tota vetustas concorditer manducare reddidit
per credere. Cum ipse quoq; Dominus disertè dixerit: E-
go sum panis vitæ. Qui venit ad me, non esuriet, & qui
credit in me non sitiet vnquam.

Cum autem ad hunc modum sobriè & sanctè sen-
tiamus de vera carnis Christi participatione, & de san-
ctæ Cænæ Domini mysterijs, cur non desinunt nostri illi
antagonistæ odiosis illis & nos & prædecessores nostros
aggravare præiudicijs? quasi in mysterijs nihil prorsus
nisi merum panem & vinum agnoscamus. An verò
veritas illa simplex & orthodoxa, non ubiq; legitur in
libris nostris, quibus oppugnauius corporalem in cæ-
næ Domini præsentiam & participationem, non spiri-
talem & viuificam? An non clarè satis hoc ipsum ex
pressimus in Consensione illa nostra, quæ sola illis satisfa-
cere debuisset.

Doctrina no-
stra de Cænâ
Domini, non
de vacuis si-
gnis.

Sic enim in illa concorditer profiteamur: Cum vera
sint, quæ nobis Dominus dedit gratiæ suæ testimonia et
sigilla, verè proculdubio præstat ipse intus suo spiritu,
quod oculis & aly sensibus figurant sacramenta: hoc
est,

est, ut potiamur Christo quam bonorum omnium fonte, tum ut beneficio mortis eius reconciliemur Deo, spiritu renouemur in vita sanctitatem, iustitiam denique & salutem consequamur. simulq; pro beneficijs his olim in cruce exhibitis, fide verò perceptis à nobis, & quæ quotidie fide percipimus, iam agamus gratias. Quare etsi distinguimus, ut par est, inter signa & res signatas, tamen non disiungimus à signis veritatem, quin omnes qui fide amplectuntur oblata illic promissiones, Christum spiritualiter cum spiritualibus eius donis recipere, adeoq; & qui dudum participes facti erant Christi, communionem illam continuare & reparare, fateamur. Neq; enim ad signa nuda, sed potius ad promissionem, quæ illic annexa est, respicere conuenit. Quatenus ergo in promissione illic oblata proficit nostra fides, eatenus ista vis & efficacia, quam dicimus, se exerit. Ita materia aquæ, panis aut vini nobis Christum nequaquã affert, nec spiritualium eius donorũ compotes nos facit, sed promissio magis spectanda est: cuius partes sunt, nos recta fidei via ad Christum ducere: quæ fides nos Christi participes facit. Et iterum: Quod autem carnis suæ esu & sanguinis potione, quæ hic figurantur, Christus animas nostras, per fidem, spiritus sui virtute pascit, id non perinde accipiendum, quasi aliqua fieret substantia vel commixtio vel transfusio, sed quoniam ex carne semel in sacrificium oblata & sanguine in expiationem effuso, vitam hauriamus.

Hactenus consensionis verba recitauimus, audiantur iam à vobis, quibus non vacat integros euoluere li-

D. Zuingli
sententia de
cena domini

bros, audiantur inquam sententia beata memoria D. Zuinglij & D. Oecolampadij, quibus à se repulerunt fœdissimā illam suspicionem, quasi fideles in Cœna præter panem & vinum, planè nihil percipiant. Zuinglius ergo in libello ad principes Germaniæ: Cum nullis mortalium, inquit, nobis est dissidium de verbis Cœna Domini, quasi velimus ista immutata esse, ut quidam, aut prorsus sublata, ut alij calumniantur. Cum enim sic sonant, Hoc est corpus meum, iam ipsum sacramentum augustius est, quàm si diceremus, Hoc significat corpus meum: ut omninò nihil velimus mutatum esse: sublata vero è medio quomodo cupiamus, quæ ne mutata quidem volumus? Habent ergo aduersarij nostri verba ista, habemus & nos. Verba ista illis inconcussa manebant, nam & nobis immota manebunt: Hoc est corpus meum quod pro vobis datur. Et, Hic est sanguis meus, etc. Dicunt aduersarij hic præberi corpus Christi: idem & nos dicimus. Vbi ergo dissidium est? Hic est: dicunt aduersarij corpus Christi naturale et substantiale præberi, nos sacramentale. Hinc pugna. Item: Dudum diximus corpus Christi esse in cœna fidei contemplatione, &c.

Item, istam fidei contemplationem non credo satis grandem esse, nisi rem ipsam tam certè ac indubitatè teneat, ac si naturaliter esset sensibus exposita.

Item, Signa ipsa sic à Christo ipso sunt instituta, ut etiam analogia sua plurimum polleant ad inducendum in rem fide & contemplatione præsentem.

Item, Licet omnes creaturæ inuitent nos ad numinis contemplationem: at omnis ea inuitatio muta est:

in sacramentis autem, viua & loquens est. Loquitur enim Dominus ipse, loquuntur & elementa, atque idem loquuntur & suadent sensibus, quod menti sermo & spiritus.

Rursus ibidem : Frustra non sunt Sacramenta. Prædicant enim salutem à Deo datam : sensus huc conuertunt, & subinde fidem exercent, quam & proximo pollicentur, atque ad fraternam charitatem trahunt. Atque hæc omnia dum fiunt, unus atque idem operatur spiritus, qui inspirando nunc citra instrumentum trahit, nunc cum instrumento, quò, quantum & quem vult.

Idem ad Regem Christianum : Christum credimus, inquit, verè esse in Cæna : imò non credimus Domini esse Cænam, nisi Christus adsit. Sed quod corpus eius ea dimensione edatur, qua isti dicunt, id verò est à veritate & fidei ingenio alienissimum. Asserimus ergo, non sic carnaliter & crasse manducari corpus Christi, ut illi perhibent, sed verum Christi corpus credimus in Cæna sacramentaliter & spiritualiter edi, à religiosa fidei & sancta mente: quemadmodum & Chrysostomus sentit.

Idem in Annotat. ad Ieremiæ cap. 27. Constat quod quacumq; Symbolis tribuuntur, ait, fidei sint principaliter, sed iusta & æqua ratione signis tribuantur, cum quod pars Sacramenti sunt (quævis inferior. Constat enim ex spirituali re et corporali sacramentū) tum quod idem significant sensibus, quod spiritus menti. Unde

nemo tam rudis est, quem huiusmodi hyperoche offendant, Christi verum corpus in Cæna verè editur, cum panis & vinum præbentur. Verum enim corpus, non falsum assumpsit. Verè edit mens fidelis, cum non simulate recipit Christum, cum verè fidei Christo. Sed vide an non hæc omnia, cum symbolis dicantur, non tamen virtute symbolorum, sed spiritus ac fidei operatione fiant: ut allæoseos virtute symbolis tribuatur, alteri sacramenti parti, quod fidei solius (dummodo rem ad vinum rescare volumus) esse cognoscitur. Verū ergo corpus cum edi dicitur, illud verum corpus, quod cælo illatum est intelligimus, sed illud ipsum non naturaliter, hoc est, quemadmodum ipsum naturale est, etiam naturaliter à nobis editur, sed spiritualiter hic edimus, quod isthic naturaliter est, &c. Hæc ille. Extant epistola Zuingly ad Oecolampadium, & huius vicissim ad illum, quibus palam testati sunt mutuum, cum in negotio Eucharistiæ, tum in uniuersa religione, consensum.

Bernensis disputatio.

In Bernensi disputatione, in qua pie & diligenter hoc cænæ negotium discussum est, inter alia dicit D. Oecolampadius: Nullo pacto negamus nos edere corpus Christi, & bibere eius sanguinem: sed edimus & bibimus spiritualiter per fidem, & eam quidem, qua credimus nos Deo patri per mortem Christi reconciliatos esse: non per illam fidem, qua creditur corpus Christi adesse sub pane corporaliter vel substantialiter.

D. Oecolap.
sententia de
cæna domini

Idem in secunda iusta & aqua ad D. Lutheri scripta responsione, Germanice data, per integrum caput 18. hoc duntaxat commonstrare contendit, se & Zuinglium

gium nunquam docuisse vel scripsisse, quod fideles nudo duntaxat signo participant in Cæna Domini.

Idem alibi: Sicubi panis domini, ait, corpus Domini dicitur; non contendimus. Nam & nos sic appellamus: non solum quod à Domino nostro Iesu Christo Cæna sancte initiata & instituta est, sed etiam quod in ea sanctificatoris spiritus sancti mirificam operationem fidelium pectora experiuntur. Item non dicimus panem hunc nudum quidem signum in Cæna, sed efficax quodammodo, operante spiritu sancto in fidelium cætu, ut fiat nobilius quoddam & sanctius corpus, nobis Christo capite in unum corpus adunatis. Hoc cum dicimus, minime Christum à Cæna abesse asserimus. Adhuc non auferimus è Cæna alimentum vitæ, carnem & sanguinem Christi & Christum ipsum. Nam nisi animæ nostra hoc pabulo fuerint pasta, nequaquam habiturae sunt vitam. Præterea nunquam à nobis negatum est, quin Cæna etiam fides seruiat, cum excitanda tum augenda, &c. Hæc omnia Oecolampadij sunt. Non commemorabo nunc alia, quibus isti ornarunt sacramenta, quibus hodie & nos ornamus. Extant libri istorum et nostri. Oramus ut legantur animis ab odio & inuidia defecatis. Ita enim quilibet nullo negotio videbit quid tribuet contentionum feruori, quid causa per se. Deprehendet certò à nostris & à nobis nunquam prophane de sacramentis esse disputatum, nunquã ita efferbuisse contentionis calorem, ut nihil nisi nuda signa percipi à fidelibus, in Cæna Domini contenderimus.

Verba Domini, Hoc est corpus meum, nos nostra expositione non corrumpere.

Atq; hic demum nostri illi mirifice tumultuantur. Clamitant nos corrumpere verba Christi sacra, Hoc est corpus meum. Clamitant se pro corporali sua presentia & mädicatione corporis domini habere diserta domini verba, clara & minime ambigua. Urgent ex his verbum substantiuum Est, id quod ingeminant semel & iterum & persfrequentissime inculcant. Si quid dixeris, quantumuis clarum sit et efficax, illi tamen idēdem repetunt & inculcant, illud, Hoc est corpus meū. Hac verba, inquit, Sacramentarij non audent attingere, ita metuunt suo errori imò blasphemia. Addunt, Nos aut inuitimur simplicibus his & clavis verbis, ut ea descripta sunt magno consensu & uniformiter vsurpata ab Euangelistis & ab Apostolo Paulo. Docemus aut hac domini verba, in sua propria & naturali significatione esse accipienda, sine tropo. Corpus ergo intelligimus, non corporis figuram aut corporis significationē. Et verbum substantiuum Est, substantiue, non significatione accipimus. Illi verò (de nobis loquuntur) in tropum collocant totius edificij sui firmitatem. Rursus ne hic quoq; quicquā acerbatis à quoquā desiderari possit, semel & iterum, propter tropū in expositione verborum domini admissum, crimē denuo nobis inpingūt harescos: quemadmodum & Papistæ, qui & ipsi nullum admittunt tropum, et omnes eos crimine harescos perfundunt, qui domini verba per tropum expediunt. Itaq; si hic nulla est admittenda loquutio figurata,

An tropus
in verbis do-
mini?

cir

cur non ex integro concedunt nostri illi antagonista in
castra Papistica? Aut cur ipsi hæc domini verba, Hoc
est corpus meum, non ad literam, quod dicitur, intelli-
gunt, sed per figuram expediunt? Cum enim litera so-
net, Hoc est corpus meum, illi nostri exponunt, Sub hoc
est corpus meum. Cum hoc accipitur corpus meum,
sub specie panis & vini continetur corpus meum.
Quid? an non hic tropus est? Si ergo hæretici sunt, qui
per figuram vel tropum hunc locum explicant, expen-
dit obsecro, quam in vos ipsos, odio nostri, tuleritis sen-
tentiam. Si verò hæretici non sunt, ut reuera orthodoxi
& catholici sunt, qui assueverant verba domini, Hoc est
corpus meum, figurata esse, ferte et nos, o fratres, qui nullā
hic nobis expositionem nouam consinximus & orbi ob-
trudimus, sed veterem illam ecclesia interpretationem
usurpamus. Dicimus enim pane significari aut repræ-
sentari corpus Christi, vinum esse symbolum, figuram,
vel sacramentum sanguinis Christi.

At vociferantur isti, hoc demū esse humanum, au-
dax, sceleratū, nepharium, hæreticū atq; sacrilegum in-
uentum ac flagitium. Conscientijs piorum hominum mi-
nimè satisfieri commentis huiusmodi hominum blas-
phemis. Miror autem, amici an tam atrocia, conuitia et
in primitiuam Dei ecclesiam contorquere vos intelli-
gatis, cum qua istam nostram expositionem habemus
communem. Negatis quidem & pernegatis vlla à no-
bis posse produci vetustatis testimonia, quæ testen-
tur verba Domini veteribus fuisse figurata, aut ex
veteribus quenquam Est exposuisse per significat.

Sed diudum vidissetis hæc in nostrorū editis libris, si voluissetis videre: nunc quid afferri possit flaccescentibus adeò stomachis, non videt. Vinam verò ad audiendum, idq̃, quod audiuius diligenter expendendum, pleriq̃, tam prompti essemus, quam sumus ad tergiuersandum alacres, inq̃, rebus quas semel tueri in animum induximus, defendendis feruidi. Cogitemus potius, ô fratres, aliud propediem fore iudicium, in quo nihil tergiuersatio, nihil audacia, omniâque negandi petulantia, nihil clamor ullus, aut prætextus ullus, sed sola Dei veritas, animi probitas fideiq̃, sinceritas & conscientia integritas aliquid valebit.

Certè qui panem & vinum non appellauit signa, figuras, symbola aut sacramenta corporis & sanguinis sui, idem neque dixit sub pane, in pane, aut cum pane, aut sub specie panis esse corpus suum substantialiter & corporaliter: multò minus dixit panem transsubstantiari in substantiam corporis Christi, remanentibus duntaxat sine subiecto accidentijs. Admittere ergo expositionem sobriam verba Cœnæ Domini, neq̃, urgere oportere nuda per contentionem verba, qui non videt nihil videt. Etenim si seruanda est verborum, ut aiunt, claritas, cur ipsi recedunt à claritate? Dominus dixit: Hoc est corpus meum: isti dicunt, Sub hoc, aut cum hoc, aut in hoc, aut in hac specie est corpus meum. Itcirco recedunt ab illa sua, quam iactant, perspicuitate. Quod si omninò à disertis verbis recedendum non est, ulla ratione, sed perpetuò litera inhaerendum rigide, quid oro pronuntiatiū est simplicius, quam

illud

illud Ioannis? Et verbum caro factum est? Et illud, Pater maior me est. Et illud, Philippe, qui vidit me, vidit patrem: & quomodo tu dicis, Ostende nobis patrem? Nunquid verò ex his disertis sententijs ea consequetur, quæ inde colligebant hæretici, urgentes & ipsi literam, dicentésque diuinam naturam conuersam esse in humanam, filium Dei etiam diuinitate minorem esse patre. Nullam denique inter patrem & filium intercedere distantiam aut personarum discrimen? Ac reuera sunt loci hi adducti plani omnes, quoad verba, interim sensus genuinus non percipitur nisi ex collatione aliorum locorum, ex circumstantijs fideique proportionem. Hoc si negetur præfacte, quis non videat semel subuersum iri, quicquid sincere pietatis traditur in sacris libris? Vicissim opponunt nostri illi, Cogitent verò py omnes, quid de religione uniuersa, quid certum & inuiolatum sit futurum, si ita liceat verba transformare scripturarum. Atqui nemo nostrum postulat, ut in scripturis vel iota transformetur, nemo flagitat ut audacibus & irreligiosis hominibus aditus aperiatur irrumpendi in scripturas & in his quidlibet sursum deorsumq; versandi. Clamamus & nos fidei dogmata certa, nullo modo esse commouenda disceptationibus, imò ne vnquam quidem vocanda in dubium. Hic tamen nemo inficias ibit, fuisse *Scripturarum* semper, & esse adhuc in ecclesia scripturarum interpretationem, & certam quidem illam & legitimam non arbitrariam, sed admodulatam ad fidei & charitatis proportionem, petitamq; ex materia dictorum

Scripturarum
expositio.

& factorum, ex occasione & circumstantijs aliorumque vel similium vel dissimilium diligenti collatione. Semper autem & imprimis religiosam expositionem sacramentis adiunctam esse constat. Cur itaq; impietatis & sacrilegij dānamur hodie, qui religiose verba Domini, Hoc est corpus meum, & totum denique negotium sacramentarium exponi volumus? Non destituimur hic multiplici scripturarum exemplo. Constat enim cum Prophetas tum Apostolos sacra exposuisse mystica. Et S. Augustinus de catechizandis rudibus, De sacramento sanē quod accepit, inquit, cum ei bene commendatum fuerit signacula quidem rerum diuinarum esse visibilia, sed res ipsas inuisibiles in eis honorari, nec sic habendam esse illam speciem benedictione sanctificatam, quemadmodum habetur in usu quolibet. Dicendum etiam quid significet sermo ille, quem audiuit, quid in illo condatur, cuius illa res similitudinem gerit. Deinde monendus est, ex hac occasione, ut si quid etiam in scripturis audiat, quod carnaliter sonet, etiamsi non intelligit, credat tamen spirituale aliquid significari, quod ad sanctos mores futuramque vitam pertineat.

Expositio
verborum
domini, Hoc
est corpus
meum.

Sacramen-
tum institui-
tur.

Equidē nō impiā, nouā aut coactam, sed piam veterē obuiā sponteq; fluentem horū Domini verborū, Hoc est corpus meum, expositionē paulō ante in hac expositione nostra, & antea semper protulimus in mediū. Ac certū est et extra controuersia omnem, dominum nostrū Iesum Christum instituere sacramentū, dū instituit Cenā. Quid ergo prohibebit, quo minus intelligamus dominū

de

de sacramento loquutum esse sacramentaliter, eapropter
 istas sententias diuinas, Hoc est corpus meū, Hic est san-
 guis meus, sacramētales esse loquutiones, et ea de causā
 exponendas sacramentaliter? Sacramētales ac pares in
 scripturis loquutiones sunt, Circūcisio est fœdus, Agnus
 est transitus, Hostia vel sacrificium est peccatū et peccati
 expiatio. Baptismus est sanctificatio vel purificatio pecca-
 torū ue ablutio. At quomodo hæ loquutiones in eccle-
 sia Dei semper fuerint expositæ, nemo nescit, nisi qui pri-
 ma theologia rudimenta nescit. Appellata est ergo Cir-
 cūcisio symbolum, signū vel sigillum fœderis, Agnus
 memoraculum & figura transitus. Sacrificia vero fue-
 runt memoria peccatorū et significabāt Christū aliquā Hebr. 10.
 do imolandū, sicuti et Baptismus vocatur sacramentū
 purificationis nostræ. Cū ergo oēs sacramētales loquu-
 tiones parē ferāt ac habeāt expositionē, quid prohibeat
 obsecro panem et vinū, quæ tradidit in Cœna sua domi-
 nus, sacramenta nuncupare vel symbola et signa corpo-
 ris et sanguinis domini, atq; adeo sententiā domini sacra-
 mētalē, Hoc est corpus meū, sacramentaliter interpretari
 et dicere, Hoc significat corpus meū, vel hoc est sacra mē-
 tū mei corporis? Maximè cū Lucas Cœnam agni pascha-
 lis præmiserit Cœnæ dominicæ, ut similitudine myste-
 riorum expensa, tranquillioribus animis accederemus
 ad cōmunionem mysteriorum. Neq; dubiū est apostolos
 ob hanc domini loquutionē, Accipite, edite, hoc est cor-
 pus meū, minus fuisse sollicitos, quod assueuissent loquu-
 tionib. mysticis, et iā audiuissent, Agnus est trāsitus.
 Alioq; legimus apostolos aliās sæpe interrogauisse dñm,

cum non probe intellexissent quod dixerat, aut obscuriore aliquo loquutionis genere fuerat usus. In presenti autem nihil prorsus interrogant, proculdubio quod cognita ipsis essent loquutiones sacramentales.

His opponunt illi nostri, Egregiam verò interpretationem allatam esse, ut qua in Cæna fidelibus nihil relinquat manducandum, quàm significationem. Cum enim dixerit Dominus, Accipite, edite, hoc est corpus meum, & nos interpretemur, Hoc est signum corporis mei, consequi fideles edere signum vel significationem corporis Christi. Caterum quis non agnoscat paralogismum? Sed & dudum diximus in sacramento quolibet non modo signum spectari, sed et rem signatam: & signum quidem percipi ab omnibus ore corporeo, rem verò significatam fideles sumere mente vel animo. Beatus Moyses apertè vocat Circuncisionem signum. Quis verò inde colligebat circuncisionem accipientes. nihil nisi signum accipere? Quia enim non prophanum, sed fœderis diuini signum erat Circuncisio, ea de causa fœdus offerebatur circuncisione & obsignabantur in fœdere circuncisionem accipientes. Ita cum panis & vinum sint symbola corporis Christi traditi & sanguinis effusi, consequitur sanè corpus vere esse traditum & sanguinem effusum, & quidem traditum & effusum pro nobis, certè ut manducantes & bibentes illa spiritualementer, in hoc mysterio, vitam ex ijs hauriamus, & non ut inanem vmbatilemve duntaxat rerum nihil nobis utilium significationem habeamus.

Verba poculi Quid verò dicunt antagonista nostri ad verba poculi

tuli sacri? Matthæus & Marcus habent: Hic est sanguis meus novi testamenti, qui pro multis effunditur, &c. Lucas verò & Paulus habent: Hoc poculum novum testamentum est in meo sanguine. Iam si verbis mordicus inhaerendum est nudis, calix vel poculum secundum Matthæum & Marcum erit sanguis. Si dixerint per calicem id esse intelligendum, quod est in calice vinum, dicimus istam interpretationem esse tropicam. Rigidè ergo verbis Domini insistentes, non desinemus clamare, quicquid tandem nobis opponatur: Verba Domini disertà sunt, Dominus dicit: Hic est, Hic est, ergo est. Et loquitur quidem de calice, ergo calix est Christi sanguis. Non potest non verum esse, quod pronunciat os Domini. Nisi ergo fraudari voluerint aduersarij nostri fructu sanguinis Christi, cogentur deuorare ipsum etià calicem, quacunq; id ratione efficere possint. Præterea si adhuc perrexerint auersari loquutiones tropicas, fateri cogentur poculum, iuxta Lucam & Paulum, esse testamentum, & quidem novum testamentum, adeoq; poculum magis esse in sanguine, quàm sanguinem in poculo. Adiguntur ergo, velint nolint, verba Domini non ad literam rigidè restringere, sed sensu potius sancto explicare: Quod quemadmodum panis est symbolum traditi corporis, ita poculum vel vinum potius, est sacramentum effusi cruoris Christi, idq; ad dedicationem vel confirmationem novi testamenti, quo confertur credentibus plenaria omnium peccatorum remissio & vitæ sempiterna.

Collatio loci

His accedunt conferēda et illa Domini Christi verba rum.

qua in illa ipsa Cœna & sub Cœnâ et in itinere ad montem oliuariũ, idem Dominus eodem suo ore, quo illa, Hoc est corpus meum, etiã hæc pronunciauit: Ab initio hæc nõ dixi vobis, quia vobiscum eram: nunc autẽ vado ad eum, qui me misit. Et iterũ, Ego veritatem dico vobis, expedit vobis, vt ego vadã. Si enim nõ abiero consolator nõ veniet ad vos, etc. Rursus, Exiui à patre, & veni in mundũ, iterũ relinquo mundũ et vado ad patrẽ. Item, Et posthac nõ sum in mundo, & hi in mundo sunt, & ego ad te venio. Et reliqua huius generis multa, quæ nõ minus disertæ & clara sunt, sed & verba Cœnæ Domini sunt, quàm illa, Hoc est corpus meum. Quinimò totus ille sermo, quem Ioannes integris aliquot à 14. capite capitibus describit, huc bonæ sui parte spectat, vt intelligat, cum sanctis apostolis, vniuersa Christi Ecclesia, fideles posthac non amplius habituros Christum Dominum corporaliter præsentem. Nam ascensurum in cælum, & inde missurum spiritum sanctum, per quem ipse adesse ecclesiæ ipsamq; inspirare, viuificare & gubernare velit. Quæ quidem omnia, vt minimè figurata sunt, sed plana vel aperta, ita nullum habebunt vel locum vel fructum si Christus corporaliter adhuc versatur in medio Ecclesiæ, latitans in pane, aut sub specie panis.

Ioan. cap. 6.

Adducimus præterea memorabilem illum Domini sermonem, quem ante mysticam cœnam institutam, in Synagoga Capernaum habuit, quo significantissimè & diligentissimè ostendit, se esse panem vitæ, ac carnem se suam & sanguinem suum impensurum in mortem, vt

ex his vivant fideles: ubi & modum manducanda carnis suae, bibendiq; sanguinis sui, & vitam morte partem consequendi luculenter exposuit, nimirum quod ille vitam illam suam nobis per spiritum suum inspirat: nos autem hanc percipimus per veram ac viuam fidem: refutatis interim illis, qui audito figurato sermone Domini, imaginabantur carnem Domini corporaliter esse manducandam. Id quod nihil prodesse dicit, ac protinus subiungit: Spiritus est qui viuificat. Et verba quae loquutus sum vobis, spiritus sunt & vita.

Porro cum hactenus non sententias duntaxat aliquot, sed integros Domini sermones adduximus, quibus ipse Dominus corporalem & praesentiam & manducationem corporis sui refutat, an non aequum est, ut hac conferantur cum his Domini verbis, Hoc est corpus meum, & pauciora per plura illustrentur? *Pauca per*
 Est sane celeberrimus receptus vetus, & cum ipsa Christi *plura exponenda.*
 ecclesia veluti natus interpretandi scripturas canon, cuius meminit Tertullianus contra Praxeam, personas in adoranda Trinitate confundentem, ac pro se, cerebrose admodum, hac Domini diserta verba adducentem urgentemq;: Philippe qui vidit me, vidit patrem. Ego & pater unum sumus. Ego in patre, & pater in me. Dicit autem Tertullianus, His tribus capitulis totum instrumentum utriusq; testamenti volunt (Praxeam et omnes Noetiani et Patripassiani) cedere, cum oporteat secundum plura, intelligi pauciora. Et reliqua, quae ne acerbior videar, non adycio. Intelligunt autem per omnes, non unum aliquem locum ex scripturis

morose esse urgendum, verum scripturas scripturis esse conferendas, ac pauciora aut etiam dubia secundum plura clarioraque esse interpretanda. Proinde aduersarij illi nostri frustra nobis subinde occinunt unicam (absit verbo calumnia) & figuratam vel sacramentalem sententiam, veluti propriam, quam deprehendimus collatione aliorum scripturae locorum & quidem clariorum de eodem Christi corpore, ab eodem quoque Christo Domino pronunciatorum, sic illustratam & explicatam esse, ut, quod dici solet, à lassò rixam querere videantur, quotquot coccycis in morem identidem nobis occinuerint illud suum, Hoc est corpus meum. Condonabit mihi lectores, si videar loqui audacius. De peruiçatia loquor aduersariorum, verba ipsa Domini nihilominus collo religiosissimè. Nam vel unicam syllabam, nedum verbum aut sententiam verborum Domini, legitime tamè usurpatam, & à nativo suo sensu non detortam, agnoscò summa demissione & reuerentia esse excipiendam ab hominibus, eiq; absque omni dyudicatione credendum. Si verò aduersarij pro sua morositate perrexerint nobis obiectare unicam illam sententiam, non desinemus & nos illis strenuè opponere integros Domini sermones, quibus luce clarius exposuit, quomodo suæ Ecclesiæ adesse perpetuò, & quomodo carnem suam edi, sanguinemq; suum bibi tunc voluerit, et velit adhuc.

Nulla expositio recipienda que pugnat cum fide. Subiungimus his alium & vulgarem quidem illum, ab omnibus denique omnium sæculorum pijs receptum scripturas interpretandi canonem, Contra fidem

& charitatem, nullam unquam à quoquam recipien-
 dam esse interpretationem. Oportere enim imprimis re-
 gulam fidei nostræ manere incolumem. Vetat certè A-
 postolus aliquid alienum à proportionem fidei proferre.
 Notissima sunt quæ idē ille affert de charitate 1. Cor. 13.
 unde proculdubio sua illa mutuauit, quæ Augustinus
 edidit 1. lib. de Doct. Christ. cap. 36. Sed & elegantia &
 vera sunt semper iudicata hæc vetustissimi illius scri-
 ptoris verba: Queramus in nostro, & à nostris, & de
 nostro. In quo? duntaxat quod salua regula fidei potest
 in quæstionem deuenire. Quis autem ignoret non postre-
 mum in fidei capitibus illud esse, quod credimus consen-
 su totius scripturæ edocti, Christum Dominum in una
 inseparabili persona geminam retinere naturam, natu-
 rarumq; proprietates illæ sas atq; impermixtas, & qui-
 dem iuxta diuinitatem patri, iuxta humanitatem no-
 bis esse consubstantialem, Deum utique verum ex Deo
 vero, & hominem verum ex homine vero. Constat ita-
 que Iesum Christum Dominum nostrum verū & na-
 turale, non phantasticum aut spiritale corpus habere,
 illud ipsum inquā, quod à nobis assumpsit, quod in mor-
 tem tradidit, quod ex mortuis excitauit, cui quidē im-
 mortalitatem & gloriā addidit, naturam veritatemq;
 corporis non abstulit, atq; hoc ipsum cælo intulit, & ad
 dexteram patris collocauit, unde in eadē illa carnis for-
 ma atque substantia, redibit iudicaturus viuos &
 mortuos.

Porro hæc humani corporis in Christo veritas, nun-
 quam admittit huiusmodi expositionem horū verborū,

Hoc est corpus meū, quales vulgò cōfingi solent, Hoc est corpus meū substantialiter, et tamen inuisibiliter. Nam ut nō repetā, quod superius dixi, huiusmodi voces semet ipsas elidere, constat certè Dominū hisce verbis, Hoc est corpus meū, de vero & naturali, visibili et passibili suo locutum esse corpore. Inuisibile corpus affinxit Domino Martion et tota illa infelix Valentinianorū schola, quæ eam ipsam ob causam ab uniuersali exhibitata et explosa est ecclesia. Ergo cū Dominus verū, naturale & visibile corpus habuerit, quo ad mensam assidens, discipulis porrecto pane, dixit: Accipite, edite, Hoc est corpus meū, quis non intelligat sacramentū vel mysterium ipsis ac nobis esse cōmendatum, non autem verū illud corpus naturale ore corporeo manducandum esse oblatum, idq; inuisibiliter. Etenim nō licet per religionis sincere integritatem, Christum fingere bicorporem: licet autem fide sic nos urgente intelligere Christum nobis veri & unici illius sui corporis commendasse spiritualem manducationem. Quod ergo beatus Augustinus alibi vocibus visibile et inuisibile, in hac causa vitur, alia longè ratione, quā vulgò fiat, vitur. Significat enim illi visibile, quod nobis est sacramentale: inuisibile, quod est spirituale. Nō dissimulabo in presentiarum et hoc, quod antagonista nostri hic nobis opponunt, hac ex eodem S. Augustino ex Enarr. Psal. 33. verba: Quis portatur manibus suis? Manibus aliorum potest portari homo, manibus suis nemo portatur. De Davide ergo hoc non intelligitur, sed de Christo. Ferebatur enim Christus in manibus suis, quādo commendans ipsum corpus suum, ait, Hoc est corpus meū. Ferebatur enim illud corpus in

Christus suis
ferebatur ma-
nibus.

manibus suis. Caterū nō affinxit his verbis beatus Augustinus. Domino nostro duo corpora, quorū alterū fuerit visibile, illud videlicet quod asidebat mensa: alterū inuisibile, quod scilicet offerebat edendū discipulis, verū intellexit dominū nostrū vero suo corpore, illud (obseruate mihi hanc emphasim) illud inquā corpus, nimirū quod ratione sacramētaria appellatur corpus, ppter similitudinē mutuo ueri corporis nomine, discipulis obtulisse. Nā ipse cōcione sequenti, semetipsum explicās, subiicit: Quomodo ferebatur in manib. suis? Quia cū cōmendaret ipsum corpus suū et sanguinē suū, accepit in manus suas quod norūt fideles, et ipse se portabat quodāmodo, cū diceret, Hoc est corpus meū. Tantū Augustinus q posterioribus verbis manifestē declarauit se nō sentire ipsum corpus Christi naturale, Christū ipsum corpore suo naturalis porrexisse discipulis, sed hoc quod norūt fideles, nimirū sacramentū vel mysteriū. Sequitur enim, Et ipse se portabat quodāmodo, dum diceret, Hoc est corpus meū. En quodāmodo, inquit, nimirū modo sacramētis proprio.

Certē cū Deus humanā naturā, quam semel assumpsit, nunquā (sicuti rectē sentiunt omnes catholici) deposuit, manet certē inuiolata et integra veritas humanae naturae, etiam post unionem cum natura diuina, etiam post resurrectionē & glorificationem, ideoq; neuitiquā finit illa se extendi per ubiuitatem, ut vocant, ad omnia, ut nihil necesse sit urgere nos, omnibus & singulis credendum esse in pane cœnæ quolibet & in qualibet eius vel minutissima particula contineri ipsum Domini corpus verē & substantialiter. Quod nisi ad

eum quem illi nobis modū præscribunt, doceamus, nunquam Sincerè & dilucidè ostensuros fidelibus, quomodo totus Christus indiuisus sit cibus fidelium. Superius enim dilucidè satis exposuimus, quomodo totus Christus percipiatur verè à fidelibus. Id ipsum olim pluribus exposuimus in Responsione nostra D. Luthero viuenti adhuc data.

*Veterum ex-
positio, Hoc
est corpus me-
um.*

Postremò affirmamus vetustatem agnouisse hanc nostrā verborum Domini expositionē, & eandē concordibus posteritati scriptis reliquisse. Appellarunt sanè omnes unanimiter panē Domini ipsum Domini corpus, et poculū vel vinum in calice ipsum Domini cruorem: id quod in scriptis veterū ubiq; sit obuium: sed monuerunt interim sedulo ista esse sacramenta, sacra nimirum rerum sanctissimarū & salutarium signa: signa autē pro rebus ipsis non esse accipienda, & signa appellari rerum signatarū nominibus. Notissima sunt omnibus, quæ de hac re scripsit diuus Aur. Augustin. in suis epistolis et in lib. de Doct. Christ. et in alyis locis multis. Quod enim aduersarij nostri cōtendunt August. ibi de alijs, nescio quib. signis disputare, nō de signis corporis et sanguinis Dñi, refellitur ipso cōtextu orationis beati August. qui cū in genere dixisset de signis, speciatim etiā defertur ad signa noui test. et ad ipsa sacramēta corporis et sanguinis Dñi. Inspectatur diligēter lib. de Doct. Christ. à ca. 5. vsq; ad 11. Neg. dubiū est, quin in libris illis de Doct. Christ. non suā modò opinionē et expositionē de sacramētis attulerit, sed receptā potius et orthodoxā totius catholicae ecclesie sententiā et expositionē reddiderit. Certè Tertull.

qui

qui 200. nimirū annis Augustinū preceſſit, cū et ipſe eſſet Aphricanarū eccleſiarū preſbyter, ſicuti ille creabatur epiſcopus, non alienam affert expoſitionem. Nam diſputans contra Martionē, Chriſtus acceptū panē, inquit et diſtributū diſcipulis, corpus ſuū illū fecit, Hoc eſt corpus meum dicendo, id eſt figura corporis mei. Agit aut Tertull. cum Martione ex manifeſtis. Manifeſtiſſimum & ab omnibus in eccleſia confeſſum erat, panem eſſe figurā corporis Chriſti. Ex manifeſtiſſimis itaq; ſic colligit Tertull. Rei phantaſtica non eſt figura. Significat enim figura rem veram: at qui hoc ſacramentum eſt figura corporis Chriſti, ergo Chriſtus verum, non phantaſticum corpus habet. Tertullianum imò eccleſiaſtica expoſitionem reddiderunt poſtea concorditer Græcarū & Latinarum eccleſiarum doctores. An non Chryſoſtomus huc alluſiſſe videtur, cū hæc domini verba tractans, Hoc eſt corpus meum, inter cætera dicit, Si mortuus Ieſus non eſt, cuius obſecro ſignum aut ſymbolum hoc ſacrificium eſt? Hieronymus quoq; dicit verba domini explicans, dominum in myſterio ſui corporis veritatem repræſentare. Auguſtinus enarrans Pſalmum 3. inſiſtit verbis illis vetuſtis, ac aſſerit dominum ei adhibuiſſe Iudam conuiuio, in quo corporis & ſanguinis ſui figuram ſuis commendari tradideritq; diſcipulis. Qui & alibi ſigni ſignificationisq; utitur vocabulis: veluti cum alibi, Non dubitauit, inquit, dominus dicere, Hoc eſt corpus meum, cum ſignum daret corporis ſui. Vbi etiam hæc loquutiones, Sanguis eſt anima, & Petra eſt Chriſtus, cum illa, Hoc eſt corpus meum, cōfert:

Et alibi disertè ait, illud appellatur anima quod significat animam. Solet autem res quæ significat, eius rei nomine, quàm significat, nuncupari. Hinc est quod dictum est, Petra erat Christus. Non enim dixit, Petra significat Christum, sed tanquã hoc esset, quod utiq; per substantiam hoc non erat, sed per significationem. Et reliqua quæ leguntur lib. quæst. 3. in Levit. quæst. 57. Huc pertinet et Theodoretus expositio, quã Anglicæ disputationes doctiss. et pijsime abunde nobis vendicarunt.

Ex his verò omnibus nulla difficultate, omnibus, nulla contentionis morbo laborantibus, patere arbitror, nos neq; verba solennia Cene Domini, Hoc est corpus meum, corrumpere, neq; hæreticã, nuperam et à nobis excogitatam expositionem asferre, sed orthodoxam veterem et receptam in catholica ecclesia usurpare.

Verba Domini Ioan. 6. non uiolenter torqueri ad causam Cœnæ Domini.

In his verò quæ hactenus pro nobis adduximus de sancta et legitima expositione verborum domini, Hoc est corpus meum, pleraq; arroducti aduersarij nostri, illud imprimis quod in explicanda Cœnæ domini causa, verba domini ante Cœnam institutam dicta à domino. et Ioan. 6. cap. recitata, proferimus, usq; aduersarios urgere nõ desinimus. Itaq; Sacramentarij, inquiunt, cõmiscēt omnia, ut detrahant sacramentis. Fidei ita tribuūt communionem cū Christo, et peccatorum remissionem et salutem, ut illa sacramentis adimant. Ac adducēdo ad Cœnam domini verba Ioan. 6. insulsijsime pariter et indoctijsime faciunt, nebulones perditissimi. Quid oro
dicunt

dicitis fratres? Nebulones ne perditissimi sunt, qui ver-
bū Ioan. 6. cap. recitata, accommodant negotio Cæne
domini? Videte amici quid dicatis, et quos appelletis ne-
bulones perditos. Cōstat enim nos morem illū habere cō-
munem cum veteri ecclesia & præcipuis ecclesiæ do-
ctoribus. Non oportebat doctores ecclesiarum tam faci-
les esse ad maledicendum ac conuiciandum. Neq; verò
illas nos cuiquam nebulas errorum offundimus. Perspi-
cūe & significanter vera & pura dicere & scribere
conamur, nebulones ergo aut tenebriones non sumus.

Quid verò hic nobis obijciunt aduersarij nostri? An Fides iustifi-
cant nos errare qui ita tribuamus peccatorū remissionem fidei, ut adimamus sacramentis? Quid audio?
Vos ne tribuitis iustificationem sacramentis? Vbi ergo
illud axioma confessum & pro indubitato iure habitū
ab omnibus, Sola fide iustificatur peccator per Christū?
Certè ut hæc veritas euangelica & apostolica inuiola-
ta subsistat, & incontaminata permaneat perpetuò, nō
dubitant pijsimi quicq; nullo modo in participatum iu-
stificationis admittere etiam verè bona opera. Nunc si
rectè antagonistas nostros intelligimus in participatio-
nem iustificationis insulciunt sacramenta, quorum
perceptioni tribuunt remissionem peccatorum, quæ
reuera est iustificatio. Credidit Abraham Deo,
& id ipsi imputatum est ad iustitiam: inde verò idem
circuncisus est, quo opere iustificatus non est, sed si-
gnaculum accepit iustitiæ fidei, quæ erat in eius præ-
putio. Disputauit & Augustinus egregie de eo, quate-
nus sanctificent sacramēta, quæst. in Leuit. 83. quæ quæ-

niam omnibus sunt notissima repetere super sedeo.

Ioan. 6. cap.
recte appli-
catur Cœna.

Cur verò non adduceremus verba Saluatoris nostri ex cap. 6. Ioan. cum differimus de vera manducatione corporis Christi? Christus enim unum duntaxat habet corpus, quod nunquam mutauit aut deposuit, licet clarificauerit. De hoc ipso suo corpore in mortem tradendo loquitur Ioan. 6. De eodem dicit, Hoc est corpus meum quod pro vobis datur. Hoc corpus iubet edere apud Matthæum in cap. 26. Illud ipsum nisi edamus, nullam in nobis vitam habituros assēuerat apud Ioan. in cap. 6. ut autem apud Matth. addit, Hoc facite in mei memoriā: ita in Ioāne modū manducandæ carnis suæ, & quidē ad vitā explicat ac disertè dicit, Spiritus est qui viuificat: caro non prodest quicquam. Quod ergo semel, & tunc quidem cū ex professo differeret de vera corporis sui māducatione & sanguinis sui potu, negauit corporaliter haustum prodesse, id alibi veluti oblitus sui ipsius, minime instituisse credendum est, qui certissime nihil suis instituit, nisi utilitate & salute refertissimum. Ergo nihil differūt hi loci, nisi quod apud Matthæum adijcit Symbola. Vnde ingenuè agnoscimus vocabulum Panis, apud Ioannem non significare panem eucharistiæ: qui cum illa Capernaum diceret dominus, nondum fuerat institutus, sed cibum ac sustentationem animæ viuificam. Agnoscimus idem panis vocabulū apud Matth. in 26. significare panem, ut vocant, materialem, qui institutione & sanctificatione domini factus sit sacramentum eius carnis, de quo loquitur utrobique & Matth. 26. & Ioan. 6. Illic ergo adijcitur à domino Symbolum,

quo

quo multi quidem participant, Christo item carne vi-
taq̃ eius non item, ut Ioan. 6. docuit participant. Cum
autem aduersarij nostri pertinaciter contendant imp̃p̃s
sumum impurissimumq̃, quemuis sacramento participā-
tem, pariter & vera carne Christi etiam corporaliter
participare, videant ne ipsi inter sese distinguenda re-
ligiose, parum decenter & piè commisceant atque con-
fundant.

Nihil autem etiam hic variamus à vetustis inter-
pretibus. Augustinus enim de Consensu euangel. ver-
ba Cœna domini in concordiam redigens, Ioannes, in-
quit, de corpore & sanguine domini, hoc loco nihil di-
xit, sed planè alibi multò vberius hinc dominū loquū-
tum esse testatur. Ac videmus non hunc solum, sed ali-
os quoq̃, scripturarum interpretes Græca & Latina ec-
clesiæ doctores omnes, quotquot caput hoc Ioan. 6. expo-
nunt, fuisse & diligenter de Sacramento scribere Cœna.

Porro de Capernaïtis non est quod nobis litem mo- Capernaïtis
ueant, Capernaïtæ existimarunt se veram carnem do-
mini manducare oportere. Sciunt etiam fideles non aliū
esse cibum viuificum quàm veram domini carnem. Sed
in modo & ratione manducationis hi ab illis permul-
tum differunt. Quod enim Capernaïtæ corporaliter vel
carnaliter faciendum putarunt, nos cum omnibus ca-
tholicis spiritualiter fieri statuimus. Claret itaq̃ nos non
abuti verbis domini Ioan. 6. pronunciatis, neq̃ ipsa im-
piè detorquere ad negotium Cœna dominica.

Corporalem corporis Christi præsentiam & manducationem non congruere cum uera fide.

Atq; hic adhuc grauius irascuntur nobis aduersarij, quod uidelicet negamus corporalẽ veri corporis Christi præsentiam & manducationem congruere cum uera fide: deniq; quod negamus in tot veterum Symbolis quicquam hac de re esse expressum. Quinimo mirantur nos ista contra ipsos proferre. At nos omnino existimamus merito magnisq; de causis et opportunè, suoq; quod dici solet in loco, proferre. Nam cum aduersarij nostri omnes homines, ex hac carnali manducatione astimēt, ita ut parum Christianos iudicent, qui in hoc ipsis non accedunt, tamen si per cetera rectè sentiant, mirum sane uideri poterat, si & vetus Ecclesia sic animata fuit, qui factum sit, quod istius carnalis præsentia & manducationis nullibi disertè meminere rit.

Ephesina synodus de esu
carnis Christi.

Excipiunt, in Ephesina Synodo disertè satis expressam esse veram carnis Christi manducationem. Sæpe verò diximus, sæpe repetimus, nos nūquam negasse veram carnis Christi manducationem, quam nobis tradunt sacra litera & scripta puriora veterum: negare aut illam præsentiam & manducationem, quæ conflata est ex hominum placitis. Ea non est spiritualis, neq; etiam crasse carnalis, sed mixtum quid ex utroque, ut intelligamus verū quidem carnē delitescere sub specie panis, ita tamen ne crassum modum imaginemur, sed spirituale quid, quod nihilominus corporale sit, adeoq; quod

quod m
ro mod
na Syno
Cyrillum
bat in
propos
ret alia
lum an
ad hui
fona d
uifican
Christi
& ex
quere
falsus
hac r
ego sc
mone
nomi
poste
que
cere
vide
retit
qua
sur
inte
nol

quod mirificum & ineffabile sit, credamus. Eum vero modum scriptura nescit. De eo nihil statuit Ephesina Synodus. Dudum aduersarijs nostris responsum est, Cyrillum illa conscripsisse contra Nestorium, qui ponebat in Christo personam humanam, à persona filij Dei prorsus discretam atque seiunctam, ut non intercederet alia coniunctionis ratio, quàm dignitatis. Contra illud argumentatur Cyrillus à natura sacramentorum, ad hunc modum, Si caro Christi ita separata esset, à persona diuina, ut sentis, consequeretur illam non esse uisificam: cumque nos comedamus in sacramentis carnem Christi, ederemus hominis carnem utcumq; sanctificati & excellentis. Sed inde iuxta promissionem non consequeremur vitam æternam. Quod cum falsissimum sit, falsum id esse necesse est, ex quo illud sequitur. Verum de hac re copiosius disseruerunt alij. Primus omnium quod *Transub-*
ego sciam in symbolum in-farsit corporalem illam opi- *stantia-*
tionem, definita trāssubstantiatione Innocentius eius
nominis tertius, quod in Concilio Lateranen. cōceptum,
postea quam latissime sparsum est per Decretales. At-
que utinam expurgassent se hic aduersarij nostri syn-
cere ab omni fermento Papistico. Etenim mihi non
videtur satis esse negare transubstantiationem, &
retinere interim illam ipsam rei substantiam, de
qua isti potissimum sunt solliciti, ut scilicet retinea-
tur corporalis presentia & manducatio. De qua
interim etiam ipsi sic se et suam opinionem declarāt, ut
uolint uideri se huiusmodi tueri presentiam, quæ quā-

titatiua vel localis sit. De qua re nunc non differam o-
perosius.

Caterum qua adducimus de veritate veri corporis
Christi, antagonista nostri mirificis atq; adeo tragicis ex-
plodunt cachinnis atq; clamoribus. Hæc quidem dictat
philosophia, inquit, sed alia docet theologia. Philoso-
phica est ratio, cum dicitur Christi corpus esse in uno lo-
co, in pluribus esse non posse. Addit, Fædum est autem
Christi corpus in cælo veluti loco alligare. Paulus scri-
bit Christum ascendisse supra omnes cælos: & cælos pe-
netrasse: & altiore cælis factum esse. Addunt prate-
rea, Sed nullus locus est extra et supra omnes cælos. Itaq;
vel negabunt Sacramentarij elatum esse Christum su-
pra omnes cælos, cum ibi non sit locus, vel nō negabunt.
Ita verò admittunt corpus Christi esse sine loco. Et ite-
rum, Quinimo cur non iubeamus, inquit, secedere
pondus & molem corporis, domino pascente conuiuas
suos in sacra cæna? Cur nō nitamur omnipotentia Dei?
Cur non discernimus corpus Christi coniunctum diui-
nitati ab alijs corporibus physicis, vt tamen non aufera-
mus veritatem corporis: vtcunq; iudicetur contra eius
naturam, vt secedant ab eo locus quantitas & circum-
scriptio localis pondus item & huiusmodi? Habet e-
nim corpus Christi vnitum diuinitati suas prærogati-
uas adeoq; alienas à corpore conditiones. Nec potest dis-
solui personæ unitas. Scriptura dicit, Verbum caro fa-
ctum est. Nemo ascendit in cælum, nisi qui descendit de
cælo filius hominis, qui est in cælo. Item, Sedet ad dexte-
ram patris. Ideoq; nihil prohibet asserere Christi verum
corpus

corpus e-
fertur c
adferu
absurd
& me

At
qua de
runt. L
dū res
bet. Nā
dit, &
Erit al
non se
& Th
inquit
sunt. I
natur
hac ca

Dic
ergas
ligatu
obijci
quas
& n
cimm
verè
ratiu
stare
tio a

corpus esse ubiq. Quibus omnibus mox hac ab illis infertur censura, Ergo quæ Sacramentary in hoc genere adferunt, curiosa & perplexa sunt quæstiones, plenæ absurditatibus & blasphemijs, stulta rationis argutia & mera ludibria.

Atrocia quidem hæc sunt, sed nondum tamen ea, quæ de veritate corporis Christi adduximus, subruerunt. Dudum obiecta est nobis omnipotentia Dei. Dūdū respondimus ex omnipotentia Dei non colligi quiddi bet. Nā verbū Dei modū nobis omnipotentia Dei ostendit, & ait: Omnia quæcūq. voluit fecit. Vnde Tertull. Omnipotentia Dei. Erit aliquid et difficile Deo, inquit, id scilicet quodcūq. non fecerit, non quia nō potuerit, sed quia noluerit. Sed & Theodoretus in Polymorpho suo, Dial. 3. Dñs Deus, inquit, nihil vult eorū, quæ non sibi suaptè natura insunt. Potest aut quæcūq. vult: vult aut quæ sunt suæ naturæ apta et conuenientia. Et reliqua quæ ibi fusè de hac causâ sequuntur.

Dicimus et nos fædum esse Christi corpus cælo veluti Cælo Christi ergastulo includere, ita ut veluti captus aut affixus sum include re. ligatusq. loco videatur. Proinde non est quod ista nobis obijciat, ac huiusmodi imaginationib. loquutionibusq. quas ipsi confingunt, nos verò planè nō agnoscimus, nos & nostrā doctrinā reddant omnibus exosam. Nor dicimus corpus Christi alligatum esse in cælo, sed dicimus verè sublatum è terris, in cælo nunc versari libere, pro ratione gloriosi corporis, ideòq. corpus eius in cælo nec stare semper, nec sedere perpetuo, sed prout vult & ratio aternæ salutis et gaudij dictat versari: nec dissimu-

lauimus unquam sedendi & standi vocabulis amplius
 ra quædā significari. Quibus addimus interim, verum
 corpus eius, quod cælo est receptum, non diffundi per
 omnia, sed cælo accepto, inde Christū vero cum corpo-
 re expectari à nobis iudicem, in fine demum mūdi re-
 diturū, in nubibus cæli, ad iudicandum viuos et mor-
 tuos. Nec pudet nos eius loquutionis, quam à S. Petro di-
 cente didicimus, Oportet Christū cælum accipere, usq;
 in tempora restitutionis omnium, quæ loquutus est De-
 us per os omnium sanctorum suorum à seculo propheta-
 rum. Nec mirum est ita loquutum esse Petrum, cū ascē-
 dente in cælos domino, ab angelis didicerit ita de corpo-
 re Christi glorioso, loqui. Dicebant enim ad apostolos
 angeli, Viri Galilei quid statis intuentes in cælū? Hic Ie-
 sus, qui assumptus est à vobis in cælū, sic veniet quæad-
 modū vidistis eum euntem in cælū. Ideo vero & Lu-
 cas, Rececit ab eis, inquit, ac ferebatur in cælum. Mar-
 cus verò, Dominus, inquit, receptus est in cælum, &
 confedit à dexteris Dei. Hæc cū ita habeant, videant
 aduersarij nostri, an ipsi ex theologia an philosophia su-
 um illud, Extra cælum non est locus, hauserint, an hoc
 ad apostolos Christi, an ad rixatorem Aristotilem re-
 ferre possint. Theologia certè quæ est doctrina apostoli-
 ca, constanter docet Christum dominum nostrum ve-
 ro suo corpore, non disparuisse aut inuisibile factum es-
 se, ascendisse & tamen hic corporaliter manere, sed ela-
 tum esse corpore suo in cælum, assumptum aut rece-
 ptum esse verè in cælum, nube illum suscipiente, &
 apostolis ipsis in cælum defixis oculis animisq; desideria
 plenis ipsum consequentibus. Aduersarij illi nostri ita

Extra cælū
 non est locus.

Ascensio
 Christi in cæ-
 los non est di-
 sparitio.

loquuntur
 si in cæ-
 dicam
 derit, i
 scio qu
 qui sum
 ra prof
 di nob
 tandi,

Qui de
 omnes
 biqua
 sum a
 certum
 colloca
 ficaret
 beator
 ceptum
 nā ex
 diuer
 dere, e
 gerit h
 descen
 Omne
 nere si
 & de
 posito
 mnes

loquuntur de assumptione vel ascensione corporis Christi in cælum, quasi nihil aliud sit quam disparitio, ut sic dicam quædam, qua se tantum inuisibile nobis reddiderit, vel quasi perruptis omnibus cælis, euaserit in ne scio quam regionem ubiqualem et illocabilem, in qua qui sunt, in loco nullo sunt ac simul ubique sunt. Mira profecto hæc est theologia: mirum sanè cælum ostendit nobis pulcher ille canon scripturas de calo interpretandi, Extra cælum non est locus.

Agnoscamus quidem apostoli verba testificantis, Qui descendit idem ille est, qui etiam ascendit supra omnes cælos, ut impleret omnia: sed non agnoscamus ubiqualem & philosophicam illam expositionem, Christum ascendisse ad nullum locum vel ad ubique. Nam certum est apostolum noluisse Christum extra cælum collocare, sed usum esse potius amplificatione, qua significaret domini corpus, superatis cælis, in ipsum cælum beatorum sedem nimirum in supremam gloriã esse receptum, quod prius quidem deiectione fuerat ad ignominiam extremam. Etenim opposuit sibi inuicem apostolus diuersa membra, nempe in infimas partes terræ descendere, & supra omnes cælos ascendere. Quis verò collegerit hunc in modum, Christus in infimas partes terræ descendit, ergo in habitata regione nullum locum habuit. Omnes enim intelligunt apostolum hoc loquutionis genere significare voluisse, verum in terras dñi aduentum, & deiectionem eius humillimam. Quis ergo iam ex opposito non intelligat hac loquutione, Ascendit supra omnes cælos, nihil aliud dicere voluisse apostolum, quam

Christus ascendit supra omnes cælos.

quod ad Philippen. scriptum reliquit, Extulit illum in summam sublimitatem.

Non oportet id quod apostolus certa quadā ratione protulit, ita morose urgere, quasi dicere voluerit, Christū dñm ita supra omnes cælos ascendisse ut iā necessariò in nullo sit cælo, sed ubiq. Commemoratur alicubi Origenes fuisse aliquando in ecclesia homines, nimium addictos literæ (fortassis et philosophiæ) qui quod Dauid dixerat, In sole posuit tabernaculū suū, huc detorserint, ut non erubuerint docere, quod Saluator noster ascendens è terris in cælū, et corpus suū assumēs, peruenierit usq. ad eū circulū, qui solis Zona nominatur, & ibi posuisse tabernaculū corporis sui. Non. n. possibile fuisse id ultra progredi. Huc scilicet adduxerat illos nimis rigidū literæ studium, et quod Davidis locū neq. illustraret alijs locis, neq. ex materia dicti aestimarent.

Quamquam verò summa illa sublimitas, vel cælum ipsum, aut cælestis gloria, maior sit quàm nostra possit assequi infantia, cælorūq. secreta discutere nō sit nostræ infirmitatis neq. hoc curiose facere debeat, sicuti alibi s.

August. de
fide et symb.
cap. 6.

August. piè monet, tamē credendū est Christi corpus esse in cælo, ac cælū (quatenus sedes est beatorū) locū manere certū et cōueniētē gloriosis corporibus. Credo itaq. secundū meā simplicitatē minime philosophicā benedictam et clarificatam Christi carnē ascendisse supra omnes cælos, ingressam aut in ipsum cælū in sedē beatorū in hoc habitare liberè pro ratione corporis gloriosi, non elatū esse extra cælū, ut iā non sit in cælo, et in ullo loco adeoq. nullibi. Ipse enim ore veraci pronunciauit, et di-

xit,

xit, *Vbi ego sum, ibi erit & minister meus.* Erunt aut ministri Dei in cælo, non extra calos aut supra cælos, id est nullibi. Paulus disertè, *Nostra, inquit, cōuersatio in cælis est,* unde expectamus Seruatorem nostrum, qui transfigurabit corpus nostrum humile, ut conforme reddat corpori suo glorioso. Non opinor autem nostros existimare corpora fidelium die ultimo futura immensâ, agnoscant ergo et Christi corpus nō esse immensum, ac desinant fabricare cælum alienū ab eo, quod Dominus suis fidelibus parauit, & ipse aperte locum appellauit, dicens discipulis suis, *In domo patris mei mansiones multe sunt: quod si secus esset, dixissem vobis, Vado paraturus vobis locum: Et si abiero ad parandum vobis locū iterum veniam, & assumā vos ad meipsum, ut vbi ego sum, & vos sitis.* Veritas certe ipse cæli conditor clarissime pronunciat esse locum, in quo ipse Christus videlicet sit futurus. Secundo enim repetitur nomen loci & dicitur Christus parare suis locum præterea et mansionem: ac protinus addit, *Assumam vos ad meipsum.* En assumā, inquit, ad meipsum, non tantū ad me, sed ad meipsum. Nā alibi quoque dixit, *Vbi ego sum, ibi erit et minister meus.* Vbi, inquit, & ibi. Et in præsentī iterū vbi ego sum, inquit, & vos sitis. En, Vbi, inquit, ego sum, et vos sitis. Est itaq, Christus pro veritate corporis humani in cælo, ut in loco, sed & nos erimus in cælo, ut in loco. De qua re paulo post plura dicentur.

Nesciuit illa ethnicus & prophanus Aristot. sicuti et cetera ignorauit cælestia, ut nihil mirū sit si homo gentilis extra cælum elatus, vbi fuerit, aut quid dixe-

rit, nescierit, illud magis mirandum videtur, homines theologos huic duci caco se credere, et afferre quae parum congruunt cum certissima spe fidelium. Interim agnosco ingenue Christum secundum naturam diuinam nullo circumscribi vel loco vel caelo, iuxta illud Solomonis, Si caelum et caeli caelorum te capere non possunt, quanto minus domus hac quam aedificaui? Sed de hac re sequentur paulo post plura.

Vt impleret omnia.

Ceterum urgent aduersarij illud quoque, quod appedit apostolus, *Vt impleret omnia*. Hanc enim veluti causam et explicationem eius appensam esse, quod dixerat Christum ascendisse supra omnes caelos, quia videlicet eam ob causam ascenderit ut omnia vellet sua adimplere praesentia, itaque, sic in caelos elatum esse, ut nihilominus inferiora haec omnia impleat, et ubique praesens sit totus et integer. Ceterum affirmamus etiam nos Christum sua praesentia implere omnia, sed secundum eam naturam qua ubique est, non secundum eam qua ubique non est. Dicimus praeterea verbum implendi referre oportere ad ea, quae de Christo sunt praedicta. Nam paulo ante haec verba adduxit testimonium ex Psalmis, *Ascendit in altum, captiuam ducens captiuitatem, dedit dona hominibus*. Rursus sicut in 1. cap. huius ad Ephes. epistola, ita hic denovo inculcat Christum elatum in caelos, plenitudinem esse omnium fidelium. Nam et alibi legimus, *Et de plenitudine eius nos omnes accepimus*. Item, *In Christo estis completi*.

Remouere quantitatem et locum à corpore Christi.

Si verò serio arbitrantur aduersarij religiose se remouere à corpore Christi pondus et molem, pascente domini conuiuas suos in Caena sua, cur obsecro tantope-

re & veluti hæreticam labem in nobis persequuntur, quod cum ipsi faciunt laudi sibi ducunt, & veluti orthodoxum predicant? An verò aliud est remouere à corpore Christi molem et pondus, et aliud asserere Christum quidem adesse ac pascere, sed non corporaliter? Ergo cū etiam vobis iubentibus & vestro exemplo pondus et molē corporis remoueamus, quid ita in nos debachamini, cur apud ecclesias omnes nos veluti impostores et hæreticos desertis? Videte fratres, videte ne Andabatarū more pugnetis. Habēt oculos qui hæc nostra legūt, habebit et posteritas iudiciū, et fortassis purgatiuis ab affectib. prauis, quàm forte nunc multi habeant.

An verò corpus dñi nostri Iesu Christi vere humanū ea de causa alienas à corpore humano cōditiones sibi sumperit, quia cōstet ipsum à verbo aeterno in utero virginis inseparabili cōiunctione esse assumptū, iā olim orthodoxe, docte et breuiter expositum est à beata memoria ampliss. pijsimo eruditissimoque viro D. Ioach. Vadiano Cos. Sangallen. cū in Epistola quam ad me scripsit, tum in alijs eius libris cōtra Casparē Schuenckfeldiū editis: et sequentur in nostris quoque eadem de re aliqua.

Quoniam enim in hac causa aduersarij nostri nos grauissime insectantur & impingunt nobis blasphemias, absurditates, stultæ rationis argutias & mera ludibria, utpote qui relictæ theologia sincere ad philosophiā impurā concesserimus, indeque doctrinam nostram fulciamus, sed & alibi Nestoriana labis suspitione nos premere videantur, paucis & perspicuis cōmemorabo, quam sincere in hac causa sentiamus & doceamus, et

quod nihil noui, nihil philosophici, adeoq; nihil in uniuersum hic proferamus, quod non didicerimus ex scripturis canonicis, & scriptura consentientibus patribus (hactenus enim ipsorum testimonys utimur: alioqui eorum authoritate primi nos non sustinemus) vetustis, cum quibus uti & cum orthodoxa & catholica ecclesia consentimus, quo nomine à bonis viris orthodoxi & catholici, non heretici Nestoriani ue appellandi sumus.

De utraque in Christo natura inpermixta, in una indiuisa persona.

Christus
verus Deus &
homo.

Credimus & docemus scripturis sanctis instructi & totius ecclesie veteris consensione inducti Christum dominum nostrum Deo patri consubstantiali esse secundum diuinitatem, nobis autem consubstantiali esse secundum humanitatem, ut idem sit et permaneat verus & naturalis Dei & hominis filius, Deus et homo verus. Testimonia diserta, copiosa et irrefragabilia dudum adduximus in libris nostris, unum et alterum nunc sufficere arbitramur. Ioã. dicit, In principio erat verbum, et verbum erat apud deum, et deus erat verbum. Et verbum caro factum est, et habitauit in nobis. Idem Ioã. in sua canonica. Omnis spiritus, inquit, qui confitetur Iesum Christum in carne venisse, ex deo est: & omnis spiritus qui non confitetur Iesum Christum in carne venisse, ex deo non est. Et iterum, Nos sumus in vero, in filio eius Iesu Christo: hic est verus deus & vita aeterna. Paulus vero, Cum Iesus Christus, inquit, esset in forma Dei, non rapinam arbitratus est, ut esset equalis Deo, sed semetipsum

ex-

exinan
constitu
diuersa
iunctas
tamen,
tates ex
sperean
constitu
Christu

Com
ptura s
est. loa
quis su
carnem
iungin
manan
hanc a
angelo
autem
unita
fuerin

Qu
aut in
risus
thaur
et, &
id qu
quit,
quoq;

exinanivit forma serui sumpta, in similitudine hominū constitutus, et figura repertus ut homo. Addimus istis diuersas illas naturas diuinitatē & humanitatem coniunctas esse & unitas in una inseparabili persona: ita tamen, ut adhuc in unitate personae naturalium proprietates extent aut permaneant illaese, non tollantur aut dissipereant, aut confundantur, ex duabus una duntaxat constituta natura. Agnoscimus enim unum duntaxat Christum, verum Deum & hominem verum.

Coniunctionis autem vel unionis huius modum scriptura simpliciter exponit, & dicit: Deus homo factus est. Ioannes enim dicit, Verbum caro factum est. At ne quis suspicetur nos confiteri verbum conuersum esse in carnem, cum orthodoxis huiusmodi expositionem adiungimus, Deus assumpsit hominem vel naturam humanam, manens inconuertibilis. Expositionem autem hanc didicimus ex Apostolo, dicente: Filius Dei nuppiā angelos assumit, sed semen Abrahae assumit. Dicimus autem carnem verbo, non ut alienam, sed ut propriam unitam indiuisibiliter: non nescientes, quae ob hanc rem fuerint inter veteres contentiones.

Quod autem proprietates naturalium impermixtas aut inconfusas retineat Dominus noster, ipsemet Pharisaeis ostendit testimonio Davidis ex Psal. 110. apud Matthaeum in cap. 22. Isaias quoque dixit: Ecce virgo concipiet, & pariet filiū, & vocabunt nomen eius Immanuel, id quod est, nobiscum Deus. Idem propheta: Puer, inquit, natus est nobis, & filius datus est nobis. Micheas quoque dixit: Ex Bethlehē prodibit mihi, qui dominator

Coniunctio
vel unio na-
turarum.

Proprietates
naturalium
integras &
illaesas perma-
nere.

fit in Israele: & exitus eius à seculo, à diebus aternitatis. Sed & Paulus ad Romanos: Vocatus sum, inquit, ad annuntiandum in Euangelium de filio Dei, qui factus est ei ex semine David, secundum carnem, qui definitus est filius Dei per potentiam, &c.

Vna indiuisa persona.

Ita verò in unitate personæ indiuisus manet Dominus noster, ut ipse Dei filius, cuius generationem nemo enarrauerit, nasci dicatur ex virgine. Nam, Quod ex te nascetur, ait ad virginem angelus, filius Dei vocabitur. Ac nisi fateamur ex virgine Dei filium esse natum, consequetur illam nudum genuisse hominem. Legimus ergo alibi, Dominum gloriæ esse crucifixum. Et Apostolus: Sanguis, inquit, filij Dei emundat nos ab omni peccato. Denique extant huius generis plurima ubique in sacris testimonia. Caterum ea loquendi figura appellatur ab alijs ἁλλοίωσις alteratio vel mutatio, à Ioanne Damasceno vocatur ἁντίδοσις, mutua largitio vel alternata attributio. Vulgò dicitur Communicatio idiomatum, nempe cum alteri naturæ ea proprietas communicatur, quæ propria est alterius. Verbi gratia: Nemo ascendit in cælum, ait Dominus, nisi qui descendit è cælo, filius hominis qui est in cælo. Certè non erat humana natura tunc in cælo, cum loqueretur ista Dominus, sed erat in terra: quia verò assumpta est caro in societatem vel unionem diuinitatis, huius proprium, humanitati communicatur. Agnoscit hæc ipse etiam Cyrillus libro de incarnatione unigeniti, capite 26. Agnoscunt illam expositionem & alij interpretes. Ac copiosius alibi dictum est

Communicatio idiomatum

de

de hisce
Dil
nem in
confus
Sciend
natur
dissoci
se face
suum
totum
gnific
Dom
homo
nitus
fectu
man
nitat
cet L
Vnu
assu
conf
an
hon
hor
emp
lem
nec
qu
do

de hisce loquutionibus.

Diligenter vero admonemus, ne quis propter unionem indiuisam, inter naturas quoque non distinguat easque confundat. Pulchrè enim Theodoretus Dialog. libro 3. Sciendum est, inquit, quod nominum confusio non facit naturarum confusionem. Rursus nemo existimet se dissociare aut diffuere unitatem personæ, ac ex una se facere duas, cum cuilibet naturæ proprium illud suum tribuit. Idipsum beatus Athanasius (sicuti & totum negotium, de quo hucusque differuimus) significantiſſimè exposuit in simbolo suo, & dixit: Dominus noster Iesus Christus Dei filius Deus & homo est. Deus est ex substantia patris, ante secula genitus: et homo ex substantia matris, in seculo natus. Perfectus Deus, perfectus homo, ex anima rationali et humana carne subsistens. Aequalis patri secundum diuinitatem, minor patri secundum humanitatem. Qui licet Deus sit et homo, non duo tamen, sed unus est Christus. Unus autem non conuersione diuinitatis in carnem, sed assumptione humanitatis in Deum. Unus omnino non confusione substantiæ, sed unitate personæ. Nam sicut anima rationalis & caro unus est homo, ita Deus & homo unus est Christus. Ab hac similitudine non abhorruit Theodoretus, qui allatis pluribus scripturæ exemplis, hac illustrat tertio Dialogo, & ait: Naturalem animæ & corporis unionem non soluimus, sed nec à proprijs corporibus animas separamus, sed ea quæ sunt naturarum propria, consideramus. Quando ergo dicit scriptura: Extulerunt autem Stepha-

num viri p̄j, & fecerunt planctum magnum super ipsum, dices ne animam cum corpore esse sepultam? Non opinor. Et quando audieris Iacob patriarcham dicentē: Sepelite me cum patribus meis, intelligis id de corpore, non anima esse dictum. Et mox: Nos rectē distinguimus & dicimus animas esse immortales, sola autem corpora patriarcharum sepulta esse in spelunca duplici. Ita nos quoq; dicere consueuimus: In hoc vel illo loco hic sepultus est: & non dicimus, Corpus huius vel illius, sed hic vel ille. Quicunq; autem sanae mentis est, scit nos loqui de corpore. Ita cum Euangelistae toties meminissent corporis Christi sepulti, tandem personae nomen posuerunt, & dixerunt: Iesum positum esse in monumento. Et reliqua. Beatus quoq; Vigilinus martyr diligenter in his explicandis laborans libro contra haereses i. manifestissime ostendit proprietates naturarum distinctas, unionem personae nō discindere, ut ideo consequatur duas Christi esse personas, quod duae in ipso extent distinctae non confusae naturae. Metuendum est, inquit, ne isti qui inanissimo metu utriusq; naturae proprietatem iccirco nolunt accipere, ne videantur duos Christos inducere, similiter nobis & de Trinitate quaestionem aliquā moueant, ut quia sunt quaedam propria patris, quae nec ad filium nec ad spiritum sanctū pertineant, & sunt quaedam propria filij, quae nec ad patrem, nec ad spiritum sanctū pertineant: & sunt quaedam spiritus sancti, quae nec ad patrem nec filiū pertinere monstrantur, tres à se inuicem separatos, criminantur catholicos colere deos. Et post commonstrata personarum in trinitate propria:

Si

Si ergo,
propriet
bus sepa
triusq;
q̄est, Na
te quaa
niari v
gam &
suam f
ductor
uersita
tate fr
ibi fusi
No
lucem
sum e
ruisse
rius n
nam,
gimen
lam e
ches,
vna
na co
tum
I
drim
mim
fit e

Siergo, inquit, hæ tres personæ habentes singula suas proprietates, quibus significande distinguantur, nõ quibus separentur, vnus est Deus, quomodo filius salua vtriusq; naturæ proprietate, non vnus est Christus? Adiecit, Nam & in homine pleraq; inuenies ita proprietate quadam sequestratiua distincta, vt si & ibi calumniari volueris, de vno homine multos facias. Et post longam & euidentem horum declarationē, ne doctrinam suam fulcire videretur parabolis, subiungit & ait: Seductorum temeritas, quæ pro numero naturarum diuersitatem ingerit personarum, apostolica est auctoritate frangenda & penitus conterenda. Et reliqua, quæ ibi fusius commemorantur ex scripturis.

Non possum hic dissimulare, cum hæc res mirificam lucem huic causæ inferat, Nestorium hæreticum confessum esse duas quidem naturas, sed totidem etiam asseruisse personas. Docebat enim verbum, quod & superius monuimus, carni nõ unitum esse in eandem personam, sed inhabitasse duntaxat. Vnde & beatam virginem deiparam vel Dei matrem appellari vetabat. Illam carbonariam, quod dici solet, vitare volens Eutyches, incidit in calcariam. Nam constituebat in Christo vnā duntaxat naturam, eamq; ex diuina & humana compositam, id est, confusam. A cuius delirio nõ multum abfuerunt, qui postea appellati sunt, Monothelitæ.

Nestorium grauer oppugnavit Cyrillus Alexandrinus episcopus, congregata etiam Alexandria provinciali synodo, vnde & tertiam ad Nestorium scriptam epistolam, cui multum celebrata illa duodecim capi

Nestorius et
Eutyches.

Cyrillus op-
pugnat Nes-
torium.

ta una cum Anathematismis adiunxit. Porro hæc multis ipsaq; grauibus viris, imprimis Ioanni Antiocheno, deinde multis alijs, potissimum eius provinciae episcopis, in quibus erant Achatius Beroënsis annos natus 110. Paulus Emyssenus, Ibas Edessenus, & sapiens ille (vti à Nicephoro & alys appellatur) Theodoretus Cyrensis episcopus, suspensionem prebuerunt, quasi Apollinaris errorem, qui diuinitatem cum humanitate confundebat, remouare et confirmare videretur. Inde Theodoretus (qui postea vt orthodoxus in Synodo Chalcedonensi collaudatus est) iubente archiepiscopo suo Ioanne, in capita illa Cyrilli scripsit: quæ & mox ceu asfinia Apollinaris dogmatibus, ab Orientalibus maxime episcopis damnata sunt, approbantibusque Imperatoribus Theodosio & Valentiniano author eorum sede episcopali amotus est. Hic verò facta declaratione & apologetico edito ad Orientalium obiectiones, vulgatæque Antithesi aduersus Theodoretum reprehensiones, ostendit non Apollinaris se dogma reparare, sed Nestorij eorumque dogma refellere, qui communem pro nobis hominem subisse mortem asseuerabant. Ideoque in duodecimo anathematismo, non vt illi existimabant, cum diceret, verbum Dei carne passum, naturæ proprietatem, sed personæ unitatem Quomodo de spectasse. Sic enim hanc loquutionem explicat in Antithesi, & ait: Quando carne dicitur pati, non ipse in propria natura intelligitur pati: ipsius enim factum est unitum sibi corpus. Et mox: Aliud est, inquit, dicere pati in carne, & aliud simpliciter dici pati diuinitatis

Quomodo de
us passus.

nitatis
homo,
timet n
tem. Q
test: qu
Hac de
hibita
bus &
tum. Id
cantis
esse &
tura si
aut ali
tra pas
primum
nobis
quod
modo
nim &
uificat
um, gr
tem gr
non q
us nat
re vel
us mo
Et
nisi r
sancti

nitatis naturam. Quia enim idem Deus simul est ac homo, impassibilis quidem, quantum ad diuinitatis attinet naturam: passibilis verò secundum humanitatem. Quid hic absurdi, si dicatur pati in eo, quod pati potest: qui mansit impassibilis in eo, quod pati non potest. Hac declaratione facta, & apologia Imperatoribus exhibita, non modò reconciliatus est Cyrillus Orientalibus & omnibus pijs, sed & episcopatus suo restitutus. Idem Cyrillus in Ephesina Synodo cap. 13. significantissime loquens: Sic illum dicimus, ait, & passum esse & resurrexisse, non quia Deus verbum in sua natura sit passus, aut plagas aut clauorum transfixiones, aut alia vulnera susceperit: Deus enim incorporealis extra passionem est: sed quia corpus illud, quod ipsius proprium factum est, hoc sustinuit, idè hæc omnia pro nobis ipse dicitur passus. Inerat enim in eo corpore, quod patiebatur Deus, qui pati non poterat. Simili modo & mortem ipsius intelligimus. Immortale enim & incorruptibile est naturaliter & vita & viuificans Deus verbum: sed quia corpus ipsius proprium, gratia Dei (iuxta Pauli vocem) pro omnibus mortem gustauit, iccirco ipse dicitur mortem pro nobis passus: non quod ipse mortem esset expertus, quantum ad ipsius naturam pertinet (insania enim est hoc vel sentire vel dicere) sed quod, ut diximus, vera caro ipsius mortem gustauit. Tantum Cyrillus.

Et quidem nihil aliud requirerebat Theodoretus, *Significanter loqui.* nisi ut ad hunc modum significanter & dilucide sancti viri, quod sentiebant, explicarent. Nam in fine

operis Dialog. 3. sic scriptum reliquit: Qui Deum verbū carne passum affirmant, rogentur quid sentiant. Et si dicere quidem ausi fuerint, quod corpore afflicto diuina natura dolorem subiit, discant diuinam naturam animā usum non implese. Etenim Deus verbum animam cum corpore suscepit. Sin autem hoc dictum, ut impium & blasphemum auersentur, dicant autem carnem quidem natura esse passam, Deum autem verbum passionem utpote propria carnis, sibi accommodasse, ne perplexas verborum tendiculas tenebrasq; offundant, sed peruersi dicti sententiam, apertè pronuncient. Huic enim interpretationi eos suffragantes habebunt, qui sacram scripturam sequi volunt. Hac ille.

Eutyches op-
pugnatus &
damnatus.

Porro Eutychen & Dioscorum unā cum reliqua Eutychianorum schola cōstanter oppugnarunt Flavianus Constantinopoleos & Leo Romana ecclesie episcopi. Extant Epistola hac de re scripta non pauca inter Leonis epistolas, ut 3. 4. & 5. item insignis illa ad Palastinos, quæ ordine numeratur 41. itē memorabiles duæ ad Leonem Imperat. Coacta est tandem, Martino imperante, contra Eutychianos œcumenica illa Chalcedonensis Synodus Patrum 636. qui in hanc sententiam concorditer definierunt, Patrum vestigijs insistentes, unū atq; eundem profitemur esse filium Dominum nostrum Iesum Christū, & una voce omnes depredicamus perfectum eundem in diuinitate, & perfectum eundem in humanitate, Deum verum & hominem verum eundem, ex rationali anima & corpore: consubstantialē patri, secundum diuinitatē: consubstantialē autem nobis

nobis, se-
lem, ab-
dum d-
pter no-
Dei ge-
eundem
tum, n-
use, in-
quaqu-
propri-
que in-
currit
diuisu
Deum
quem
nos do-
didit.
bis co-
uit,
profes-
cere.
P
que
psit
erat
mine
rum
us. I
cuna

nobis, secundum humanitatem, per omnia nobis aequali, absq; peccato. Ante secula quidem ex patre secundum diuinitatem, in extremis autem diebus eundem propter nos et propter nostram salutem, ex Maria virgine & Dei genitrice secundum humanitatem genitum, unum & eundem Iesum Christum filium & Dominum unigenitum, in duabus naturis, inconfuse, immutabiliter, indiuise, in segregabiliter cognitum atq; deprecatur, haudquaquam naturarum differentiam unione tollente, sed proprietatem potius utriusque natura conseruante, quae in personam unam & subsistentiam unam concurrit: non veluti in duas personas differtitum aut diuisum, sed unum & eundem filium unigenitum Deum verbum, Dominum nostrum Iesum Christum: quemadmodum antiquitus propheta, & ipse de seipso nos docuit Christus, & Symbolum patrum nobis tradidit. His igitur cum cura & diligentia omnia a nobis constitutis, sancta & vniuersalis Synodus decreuit, ut nemini liceat aliter sentire, aut fidem aliam proferre, vel conscribere, vel componere, vel alios docere.

Pulchrè his consentiunt ecclesiasticae definitiones, Definitio ecclesiastica.
 quae in hunc modum habent: Non pater carnem assumpsit neque spiritus sanctus, sed filius tantum, ut qui erat in diuinitate Dei patris filius, ipse fieret in homine hominis matris filius: ne filij nomen ad alterum transiret, qui non esset aeterna natiuitate filius. Dei ergo filius factus est hominis filius, natus secundum veritatem naturae, ex Deo Dei filius, &

secundum veritatem naturæ, ex homine hominis filius: ut veritas geniti, non adoptione, non appellatione, sed in utraque nativitate filij nomen nascendo haberet, & esset verus Deus & verus homo unus filius. Non enim duos Christos, neque duos filios fatemur, sed Deum & hominem unum filium: quem propterea unigenitum dicimus, manentem in duabus substantijs, sicut ei natura veritas contulit: non confusis naturis neque immixtis, sicut Timothiani volunt, sed societate unitis. Deus ergo hominem assumpsit, homo in Deum transiit: non natura versibilitate, sicut Apollinaristæ dicunt, sed Dei dignatione, ut nec Deus mutaretur in humanam substantiam, assumendo hominem, nec homo in divinam glorificatus in Deum. Quia mutatio vel versibilitas naturæ & diminutionem & abolitionem substantiæ facit.

Paria his scribit per omnia Tertullianus sub finem libri contra Praxeam editi.

Christi Domini corpus divinitati coniunctum non ubiq; esse, sed in loco.

Est enim hæc definitio de utraque Christi natura in una indivisa persona semper ad hunc modum, quem exposuimus, tradita in Christi Ecclesia, à sanctis omnibus, etiam ante Synodum Chalcedonensem: et post ipsam continuè, sanctissimis & doctissimis quibuscq; disertè ex primentibus sanctū Domini corpus divinitati adiunctū, propter veritatē humanæ naturæ, non ubiq; esse, sed in loco. Adduxerunt quidē aduersarij nostri longo catalogo clarorū nostræ ætatis ministrorū Ecclesiæ testimonia, quibus

Farrago contentientium.

quibus astruere volunt corpus Christi assumptū à diuinitate, et sublatū in cælos ad dexteram patris, esse ubiq. Ego verò ut illos, quorū testimonia adduxerūt, veneror propter eximia ipsis à Domino cōcessa dona, & propter beneficia ecclesiæ præstita, ita sat scio, ipsos qui uiuūt adhuc, pro sua modestia, nō agrè laturos, si videāt me hac in causa malle sequi disertā scripturæ diuinæ testimonia et consensum totius ecclesiæ catholicæ, cuius sententiam doctores aliquot insignes significantissimè expresserunt, testificantes Christi corpus non esse ubique, sed pro veritate sua in loco.

Non piget me hic imprimis recitare, & repetendo inculcare omnibus hominibus, nedum aduersarijs nostris, beati Augustini sententiam, utpote illustre admodum & minimè ancipitē. Noli dubitare, inquit ad Dardan. epist. 57. ibi nunc esse hominē Christum Iesum, unde venturus est, memoriūque recale & fideliter tene Christianam confessionem (en appellat Christianam, non hereticam confessionem) quoniam resurrexit à mortuis, ascendit in cælum, sedet ad dexteram patris: nec aliunde, quàm inde venturus est iudicare viuos & mortuos. Et sic venturus est illa angelica voce testante, quemadmodum ire visus est in cælum, id est, in eadem carnis forma atque substantia: cui profectò immortalitatem dedit, naturam non abstulit. Secundum hanc formam non est putandus ubiq. diffusus. Cauendum est enim (obseruate mihi hoc Cauendum est) ne ita diuinitatem astruamus hominis, ut veritatem corporis auferamus. Non est autē consequēs, ut

Christi corpus non ubique.

quod in Deo est, ita sit ubiq, ut Deus. Nam & de nobis veracissima scriptura dicit, quod in illo vivimus moveamur & sumus: nec tamen sicut ille, ubique sumus: sed aliter homo ille in Deo: quoniam aliter & Deus ille in homine, proprio quodam & singulari modo. Vna enim persona Deus & homo est, & utrumq, est unus Christus Iesus: ubiq, per id quod Deus est, in cælo autem per id quod homo.

De testimo-
nio August.
ad Dardanū

Miserè hic se torquent & luctantur aduersarij, ut hunc locum nobis ex manibus extorssisse videantur: sed frustra. Claritas enim eius omnes sutelas & artes illorum dissipat. Aiunt illum non esse ab August. de cæna Domini scriptum, & ideo nihil facere ad nostrum propositum. At scriptū esse negare non possunt de vero corpore Christi & eius ingenio. An verò isti aliud quàm verum et naturale Domini corpus contendunt exhiberi in cæna? Si ergo verū Domini corpus exhibetur in cæna, ut ipsi se explicant et dicunt corporaliter: at veri corporis natura non fert, ut per omnia diffusum sit ubiq, sed maneat potius locale: rursus autem per innumera loca celebretur domini conuiuium sacrum, dicant nobis obsecro, quomodo ad propositum nostrum nihil faciat hic Augustini locus, aut quomodo verum & naturale Domini corpus corporaliter exhibeatur & sumatur à cenantibus? Non habēt aduersarij, quo se hic explicant, nisi cōcesso nostro illo spiritali et sacramentali modo, corporaliq, illo suo modo neglecto atq, præterito. Interim ap plaudunt sibi & subinde repetunt, sibi probè conuenire cum Augustino, & hunc vicissim consentire cum ip-
sis.

sis. Scilicet. Vident sanè qui purgatoribus vtuntur oculis, Augustinum misere ab illis vexari et per crines trahi, nec tamen in consensum compelli posse. Illud verò in hac tractatione minimè dissimulandum videtur, quod illustribus & minimè ambiguis locis Augustini, testimonia eius alia opponunt, & ea quidem petita ex sermonibus de Tempore & sanctis, & ad fratres in heremo: cum interim ignorare non possint, quæ sit de his eruditiorum censura. Candorem ergo hic requiro.

Clarissimus eiusdem authoris locus est in eadem epistola: Christum, inquit, Dominum nostrum unigenitum Dei filium, æqualem patri, eundemque hominis filium, quo maior est pater, & ubique totum presentem esse non dubites tanquam Deum, & in eodem templo Dei esse tanquam inhabitantem Deum, & in loco aliquo cæli propter veri corporis modum. Quo dicto nescio si quid instituto nostro aliud possit vel fingi accommodatius. Christi corpus in loco.

Idem, siue alius quispiã vir piissimus & doctissimus contra Felicianum Arianum cap. 10. Non ego in Christo, inquit, susceptam carnem perpetuitate diuinæ generationis extendo, nec vniuersam deitatem corporei ortus atate cõcludo. Quia idem in diuinitate author est rerum, qui in carne redemptor est hominum, idem impassibilis in se, qui passus in corpore. Et reliqua.

Est alius eiusdem authoris locus vnus & alter in 50, Tract. in Ioan. Quos utcunque anhelent & satagant, nullo fuco, sicut ne illos quidem adductos ex epist. ad Dardan. obducent, quo minus niteant et clarissimos de

se radios veritatis profundant. Ibi, Secundum praesentiam maiestatis, inquit, semper habemus Christum, secundum praesentiam carnis recte dictum est discipulis, Me autem non semper habebitis. Habuit enim illam ecclesia secum dum praesentiam paucis diebus: modo fide tenet, oculis non videt. Et idem iterum in eodem Tract. paulo ante alloquens Iudaeum, dicentem: Quem tenebo? absentem? quomodo in caelum manum mittam, ut ibi sedentem teneam? Respondet, Fidem mitte & tenuisti. Parentes tui tenuerunt carne, tu tene corde. Quoniam Christus absens etiam praesens est. Nisi praesens esset, a nobis teneri non posset, sed quoniam verum est, quod ait: Ecce ego vobiscum sum usque ad consummationem seculi, et abiit, & hic est, et rediit, et nos non deseruit. Corpus enim suum intulit caelo, maiestatem non abstulit mundo.

Idem Tract. in Ioan. 107. Restat, ait, ut secundum id, quod ipse etiam in mundo prius erat, in mundo se dixerit iam non esse, profecto praesentia corporali, mundo scilicet absentiam suam iam cito futuram, illorum autem tardius, per hoc ostendens, quod se iam non hic esse, illos autem hic esse dixit, cum & ipse hic & illi adhuc essent. Et mox: Et adiecit, Et ego ad te venio, sic exponens quodammodo cur dixerit, iam non sum in mundo. Comendat ergo eos patri, quas corporali praesentia relicturus est.

Ab Augustini expositione nihil dissidet beatus Pater Cyrillus. Nam lib. in Ioan. 6. cap. 14. Et si Dominus corporis sui praesentiam, inquit, hinc subduxerit, maiestate tamen diuinitatis semper adest.

Idem

Idem libro 9. cap. 21. Paruo tempore, ait, unà cum discipulis fore se Christus ait, non quia penitus ab eis recessurus erat, nobiscum enim est semper usque ad consummationem seculi, sed quia non erat sicut prius cum eis conuicturus. Propè enim iam tempus erat, ut etiam in cœlos ad patrem abiret. Credere autem oportet fideles, quamuis à nobis corpore absit, virtute tamen sua omnia & nos gubernari, adesseque semper ipsum omnibus, qui eum diligunt. Propterea dicebat: Amen dico vobis, ubicunque sunt duo vel tres congregati in nomine meo, ibi sum in medio eorum. Nam quemadmodum, quando ut homo in terra conuersabatur, tunc etiam cœlos implebat & angelorum consortia non relinquebat, eodem nunc modo cum sit in cœlis cum carne, terram tamen replet, & cum eis est qui ipsum diligunt.

Idem lib. 11. cap. 21. Putabant, inquit, discipuli absentiam Christi, ut hominis dico, Deus enim ubique est, multorum eis incommodorum causam futuram, cum non adesset qui ab omnibus eos possit malis eruere. Sed oportebat (dicā enim liberè) si luminaria orbis postea facti sunt, nō solum in carnem Christi, verum etiā in deitatem respicere: quæ quamuis oculis non cernatur, adest tamen semper summa cum potestate. Nec quicquam est, quod prohibere possit, quin omnia repleat, & quod velit peragat. Non enim loco aut dimensionibus circumscriptibilis natura diuina est. Quare cum Deus & homo Christus verè sit, oportuit eos intellexisse ineffabili Deitatis potestate unà cum eis semper

futurum, etiam si carne abesset. Iccirco enim ipse quoque in superioribus dicebat: Pater sanctè serua eos in nomine tuo, quos dedisti mihi: aperte significans deitatis ratione, non carnis presentia, eos posse seruari: quippe ipsa etiam caro non à se sancta fuit, sed coniunctione verbi ad verbi virtutem quodam modo reformata, salutis atque sanctificationis participantibus causa est. Non ergo carni, ut caro est, operationis diuinæ virtutem, sed natura verbi attribuiamus. Et cap. 22. Vbi que tam deitatis dignitatem, quam conuenientem homini mensuram persona sua attribuit. Non enim abiicit neque negat, quod à nobis assumpsit. Item, Discipulis intelligendum relinquit non minus se absentem, quam presentem eis salutem allaturum, & qua ratione, cum adesset ut homo, ea etiam absentem seruare posse, &c.

Theodoretus Cyrensis episcopus vir doctiss. & pyssimus tres scripsit Dialogos de Incarnationis Domini-
ca Sacramento, quorū alterū inscripsit Inconfusum, utpote in quo euidentissimè & luculētissimè demonstrat, humanam naturam licet assumptam à verbo, integram tamen inuiolatamq; manere, etiam in cælos sublatam & collocatam ad dexteram patris. Cum enim inter alia Eraniſtes, id est emendicator (hunc enim inducit loquentem & vndiquaq; colligentem, corradentem aut conquirentem argumenta pro conuertibilitate & confusione naturarum, &c.) obijceret: Postquā in cælū assumptus est Dominus, nō existimo te dicturū, eum nō fuisse cōuersum in naturā diuinitatis: inducit Theod. Orthodoxū respondentē et dicentē: Ego quidē nō
dixerim

dixerim
audax
scriptur
Paulus
caturu
præsim
seipsum
modo
Videri
que ci
am de
in nul
detur
non p
diu,
tutis,
feder
tris,
signi
stri h
ptur
vna
tan
I
con
tam
cui
bea
ras

dixerim, humanis rationibus persuasus, nec sum adeo audax & temerarius, ut dicam aliquid, quod sacra scriptura silentio præteryt. Sed tamen audiui diuum Paulum clamantem, Statuit Deus diem, in quo iudicaturus est terrarum orbem, in iustitia, per virum, quæ præsinyt, fidem præbens omnibus, suscitans è mortuis seipsum. Didici etiam à sanctis angelis, quod veniet eo modo quo viderunt ipsum discipuli euntem in cælum. Viderunt autem naturam circumscriptam, non eam quæ circumscribi non potest. Audiui autem ipsum etiam dominum dicentem, Videbitis filium hominis venientem in nubibus cæli. Scio vero esse circumscriptum quod videtur ab hominibus. Videri enim non potest natura quæ non potest circumscribi. Dominum quoque dicentem audiui, Videbitis filium hominis sedentem à dextris virtutis, & venientem in nubibus cæli. Porro autem & sedere in throno gloriæ, et statuere quidem agnos à dextris, hædos verò à sinistris, id quod circumscriptum est, significat. Et reliqua. Non causabuntur aduersarij nostri hæc esse philosophica, quæ videt perspicuis locis scriptura communita. Debellent itaque hunc Theodoretum una cū alijs Sanctis quos eis opposuimus, deinde conuertere rursus arma sua contra nos.

Dydimus quoque Alexandrinus scriptor vetus & confessor Christi constantissimus, in precio, quod mirum tamē videri poterat, apud Iulianum Imperat. habitus, cuius libros de Spiritu sancto vertit è Græca in Latinā, beatus Hieronymus, circumscribi asserit palam creaturas. Non negabūt, opinor, aduersarij carnem Christi be

nedictam esse creaturam. Vnde non video quomodo negare possint ipsam esse circumscriptam. Verba Didymi, si quis requirat, hac sunt: Ipse spiritus sanctus, si unus de creaturis esset, saltē circumscriptam haberet substantiā, sicut uniuersa quæ facta sunt. Nā etsi nō circumscribantur loco & finibus inuisibiles creature, tamen proprietate substantiæ finiuntur. Spiritus autē sanctus cum in pluribus sit, non habet substantiā circumscriptam. Et mox post adducta dñi verba, Accipietis virtutē superueniētis spiritus sancti in vos, et eritis mihi testes usq; ad fines terræ. Si ergo hi in extremis finibus terræ, ob testimoniū dñi constituti, distabant inter se longissimis spacijs, aderat autem eis inhabitator spiritus sanctus, incircumscriptam habēs substantiam, demonstratur angelica virtus ab hoc prorsus aliena. Angelus quippe qui aderat (verbi gratia) Apostolo in Asia oranti, non poterat simul eodem tempore adesse alijs, in cæteris partibus mundi constitutis. Et reliqua.

Si verò negāt aduersarij nostri corpus Christi circumscriptibile et locabile esse, pari ratione euacuabūt alteram naturam in Christo, humanā utiq; quæ veluti ab sorpta per diuinitatem & iam tota esse deificata, hoc est in naturam diuinitatis conuersa, videri poterat.

Beatus Vigilus martyr et episcopus Tridē. contra omnis generis hæreses, præcipue autem contra Nestorij et Eutychis hæresim doctos, pios & luculentissimos scripsit libros, pro orthodoxa & catholica fide: in libro 4. inter alia disputans contra Eutychianos. Si verbi et carnis una natura est, inquit, quomodo cum verbū ubiq; sit,

fit, non
ra fuit
non es
Christi
bū no
(obse
sua lo
do un
cipit
circū
ro au
Chri
secun
dum
tū n
unū
tura
filii
tur
nita
est
tur
per
gel
cur
tur
sua
fol
les

sit, non ubiq; inueniatur & caro? Nāq; quando in ter-
 ra fuit, non erat utiq; in cælo: et nunc quia in cælo est,
 non est utiq; in terra: et in tantū nō est, ut secūdu ipsam
 Christū spectemus venturū de cælo, quem secūdu ver-
 bū nobiscum esse credimus in terra. Igitur secūdu vos
 (obseruent hac aduersarij nostri) aut verbū cū carne
 sua loco continetur, aut caro cum verbo ubiq; est. Quā-
 do una natura contrarium quid & diuersum non re-
 cipit in seip̄sa. Diuersum est autem & longe dissimile,
 circūscribi loco et ubiq; esse. Et quia verbū ubiq; est, ca-
 ro autem eius ubiq; non est, apparet unum eundemq;
 Christum utriusq; esse naturæ, & esse quidem ubiq;
 secūdu naturā diuinitatis suæ, et loco contineri, secun-
 dum naturam humanitatis suæ: creatum esse, & ini-
 tiū non habere: morti subiaccere, et mori non posse: quod
 unū illi est ex natura verbi, qua deus est, alterū ex na-
 tura carnis, qua idem Deus homo est. Igitur unus Dei
 filius idemq; hominis factus filius, habet initium ex na-
 tura carnis suæ, & non habet initium ex natura diui-
 nitatis suæ, creatus est per naturam carnis suæ; et non
 est creatus per naturam diuinitatis suæ: circūscribi-
 tur loco per naturam carnis suæ: & loco non capitur
 per naturam diuinitatis suæ: minor est etiam an-
 gelis per naturam carnis suæ, & æqualis est patri se-
 cūdu naturam diuinitatis suæ, & mortuus est na-
 tura carnis suæ, & non est mortuus natura diuinitatis
 suæ. Hæc est fides & confessio catholica, quam Apo-
 stoli tradiderunt, martyres roborauerunt, & fide-
 les nunc vsq; custodiunt. Hæc Vigilus martyr. Au-

diunt rursus aduersarij nostri, fidem expositam, & eā quidem non absurdam, non physicam aut philosophicam, sed vere orthodoxam catholicam Christianam, ac illam ipsam, quam nos hodie tenemus constanter et tradimus ecclesijs concorditer. Plura huius generis alia, et ipsa non dubia, sed certissima & apertissima ex illo authore possem proferre, sed remitto cupidum lectorem ad ipsum authorem.

Beatus Fulgentius Aphricanarum eccles. episcopus elegantes & pios scripsit libros de mysterio incarnationis dominica ad regem Trasimundum, ac in 2. libro explicans illud domini, Nemo ascendit in cælum, nisi qui descendit de cælo, filius hominis qui est in cælo, dicit, Non hoc dixit Dominus, quia humana Christi substantia fuerit ubiq; diffusa, sed quoniam vnus idemq; filius Dei atq; hominis filius, verus Deus ex Patre, sicut verus homo ex homine: licet secundum veram humanitatem suam, localiter tūc esset in terra, secundum diuinitatem tamen, qua loco nullatenus continetur, cælum totus impleret & terram, Et reliqua.

Idem eodem libro, Vnus idemq; homo localis ex homine, qui est Deus immensus ex patre, vnus idemq; secundum humanam substantiam absens cælo, cum esset in terra, & derelinquens terram, cum ascendisset in cælum, secundum diuinam vero & immensam substantiam nec cælum dimittens, cum de cælo descendit, nec terram deserens, cum in cælum ascendit. Quod ipsis domini potest certissimo cognosci sermone, qui vt localem ostenderet humanitatem suam, dixit discipulis suis,

suis, Ascendo ad patrem meum & patrem vestrum, Deum meum & Deum vestrum. De Lazaro quoque cum dixisset, Lazarus mortuus est, adiunxit dicens, Gaudeo propter vos, ut credatis, quoniam non eram ibi. Immensitatem verò suæ diuinitatis ostendens discipulis dicit, Ecce ego vobiscum sum omnibus diebus usque ad consumationem sæculi. Quomodo ascendit in cælum, nisi quia localis & verus est homo? Aut quomodo adest fidelibus suis, nisi quia idem immensus et verus est Deus.

Idem lib. 3. Idem atq; inseparabilis Christus secundum solam carnem de sepulchro surrexit, idem atque inseparabilis Christus secundum totum hominem, quæ accepit, terram localiter deferens, ad cælum ascendit, & in dextris Dei sedet: secundum eundem totum hominem venturus ad iudicandum viuos & mortuos, coronaturus fideles & pios. Huius generis innumera possem ex isto beato Patre ascribere, sed rursus lectores sedulos ad lectorem librorum illorum remitto.

Possem præterea innumera huius generis pro nobis afferre ex quinta Synodo Constantinopolitana, item ex Actione 4. 8. 10. 11. 18. & alijs Synodi Constantinopolitanae sextæ, sed & ex Toletanis & Spalen. 2. Synodis, verum dixi me non molestum fore auditoribus, qui ex his quæ hæcenus adducta sunt à me, perspicue vidēt Christi corpus non esse ubiq; sed in loco, & nos dum hoc affirmamus neq; Nestorianos factos neq; consensum catholica fidei conuellere, neq; nouis nostris opinionibus ex capitibus nostris et ex lutulenta philosophia allatis

et confectis turbare, sed veterum insistere vestigijs si demq; catholicam et consensum fidei orthodoxum religiosisimè custodire, neq; vel latum pilum à receptis dogmatibus orthodoxis et catholicis variare aut tantillum recedere.

Christi Domini corpus ex mortuis excitatum humani corporis ueritatem retinere.

Sufficerent ista quidem exercitioribus, nisi per contentionem simplicioribus proponeretur, clarificatione non tolli quidem veritatē corporis gloriosi, ita tamen attenuari et redigi ferè in spiritum, ut adaptari possit ei presentia quam fingunt in Cœna, quasi adsit corporaliter Christus vero suo corpore, sed tamen glorioso et modo ineffabili. Et quanquam paucis opponere poteramus dñm dixisse, Hoc est corpus meum, quod pro vobis datur: corpus autem gloriosum impassibile et immortale esse, atq; adeo ipsos iterum recedere à verbis illis suis disertis et claris, non pigebit tamen veritatem rediuiui corporis Christi, contra omnis generis errores, asserere et puram et simplicem fidem profiteri.

Resurrectio
Christi vera

Scriptura quæ fidei gnomon vel regula est manifestissime testatur, corpus Christi in resurrectione accepisse quidem gloriam et immortalitatem, sed non deposuisse carnis substantiã, vel naturã veri corporis ac redactum esse in spiritum, quod per omnia et in immensum diffundatur. Angeli enim de corpore Christi resuscitato loquentes, disertè dicunt, Non est hic, Ecce locus, ubi posuerunt eum. Euangelium manifestissi-

me

mè test
se, rece
in ipso
monstr
pande
discipu
pulis q
turbat
vestitu
autem
ret ali
ego ip
dete: q
tis me
comm
rissim
tissim
excla
mini
Si eni
tion
tus c
Sacr
ipse s
le.
scipu
palp
rent
tuis

mè testatur, & ait Christum reliquisse mundum, abiisse, recepsisse, sublatum esse à nobis, & assumptum esse in ipsum cælum: quæ omnia veritatem corporis commonstrant, nec sinunt corporis rediitui veritatem expandere per omnia. Quid quod ipsemet Dominus ad discipulos suos, in ipsa resurrectionis die veniens, discipulisq; existimantibus se spiritum videre, dixit: Quid turbati estis, & cogitationes ascendunt in cordibus vestris? Videte manus meas & pedes meos. Ne quis autem hoc corpus quod exhibebat videndum, putaret alienum ab eo, quod mortuum fuerat, addit, Quia ego ipse sum. Et addit insuper, Contrectate me & videte: quia spiritus carnem & ossa non habet, sicut videtis me habere. Simul autem manus atq; pedes proferēs, commonstravit stigmatibus et cicatricibus insignes verissimi & unici ipsius sui corporis testes. Hac evidentiſſima demōstratione convictus beatus Augustinus exclamat, Nec eos audiamus, qui negāt tale corpus domini resurrexisset, quale positum erat in monumento. Si enim tale non fuisset, non ipse dixisset post resurrectionem discipulis, Palpate & videte, quoniam spiritus carnem & ossa non habet, sicut me videtis habere. Sacrilegium est enim credere Dominum nostrum, cum ipse sit veritas, in aliquo fuisse mentitum. Tantum ille. Caterum cum Thomas apostolus non adfuisset discipulis, quando ipsis se Dominus & videndum & palpandum exhibuisset, discipuli autem illi testarentur verò suo corpore resurrexisse ex mortuis Dominum, excipit ille, Nisi verò videro in

manibus eius vestigium vel cicatricem clauorum et mittam digitum meum in vestigium clauorum, & in latus eius, non credam. Ideo et huic peculiariter bonus dominus & videndum contrectandumq; se sistit in conspectu caterorum discipulorum & ait Thoma, Infer digitum tuum huc, & vide manus meas, et admove manum tuam, et immitte in latus meum, & noli esse incredulus, sed sis credulus. Qua demonstracione confictus Thomas, credidit domino, & adorauit. Quid autem poterat dici planius & certius? Proinde dominus resurgendo ex mortuis corpus suum non deposuit neq; in spiritum aut diuinitatem conuertit, sed veritate corporis seruata, in melius instituit ac glorificauit.

Ascensio
Domini re-
ra.

De ascensione corporis Christi, quæ & ipsa veritatem corporis Christi rediuiui asserit, cum superius dictum sit, quantum satis est, non est quod superuacanea repetitione moueam fastidium. Quid quod fides catholica scripturis fundata, manifestissime confitetur corpora nostra conformia futura corpori glorioso Christi, nostrorumq; corporum resurrectionem futuram talem, qualem credimus fuisse resurrectionem Christi? Legatur apostolus ad Philipp. 3. et 1. Corinth. 15. ubi palam à Christi corporis natura, & vicissim à nostris corporibus ad Christi corpus argumentando concludit. Cum autem corpora nostra non resoluantur in spiritus neq; in immensum extendantur et sint futura ubiq; cur non seruaremus & veritatem rediuiui corporis in Christo? Quatenus caput membra præcellat, dicitur mox et Theodoro.

Haec

Hac verò qua hactenus ex scriptura sancta comme-
morauimus, magno consensu in symbolis catholica fi-
dei, & in doctrina fidelium ecclesie doctorum, expres-
sa sunt, cuius quidem rei aliquot subyciam testimonia,
S. martyr Irenaeus significantissimè in symbolo suo, ad-
dit carnem ascensioni Domini, confitens Christum in
carne ascendisse in caelos. Quem imitatus beatus Ponti-
fex Damasus, in symbolo suo: Qui deuicto, inquit, mor-
tis imperio, cum ea carne, qua natus & passus & mor-
tuus fuerat, etiam resurrexit, ascendit ad patrem. Sed
et beatus Leo pontifex in epistola sua ad Flavianum e-
piscopum Constantinop. Post resurrectionem Domini,
ait, qua utique veri hominis fuit (quia alter non est re-
suscitatus, quam qui fuerat crucifixus & mortuus)
quid aliud quadraginta dierum mora gestum est, quam
ut fidei nostra integritas ab omni caligine mundaretur?
Et reliqua. Legatur eiusdem epistola ad Pala-
stinos, quae ordine numeratur 41. in qua ait Christi
corpus reuoluto lapide resurrexisse. S. Hieronymus in
explicatione symboli sui, siue quisquis ille fuerit, cer-
te fidei catholicam exposuit, & dixit: Resurrexit
Dominus noster tertia die, ascendit in caelum, sedet
ad dexteram Dei patris, manente ea natura carnis,
in qua natus & passus est, in qua etiam resurrexit.
Non enim exinanita est humanitatis substantia, sed glo-
rificata, et in aeternum cum deitate mansura. Et cetera.
Huc pertinet quod nomine & titulo S. Cypriani mar-
tyris vulgatum est in symbolum apostolorum: ego illum
liberum arbitror esse Ruffini Aquileiensis, cuius nomina

Irenaeus.

Damasus.

Leo.

Hieronymus

citatur à Ioan. Casiano lib. de Incarnat. Dom. 7. Ita aut in eo libro legitur: *Ascendit Christus ad calos, non ubi verbum Deus ante nō fuerat: quippe qui erat semper in cœlis et manebat in patre, sed ubi verbū caro factū ante nō sedebat. Sedere quoq; ad dexterā patris, carnis assumptæ mysteriū est. Neq; enim incorporea illi natura cōuenienter ista absq; assumptione carnis additur, neq; sedis cœlestis perfectū diuina natura, sed humana, conquiri.*

Athanasio

Athanasius ille magnus ad Epictetū inter alia huius generis: Corpus, inquit, saluatoris verū erat corpus: quia simile erat nostro. Soror enim nostra fuit Maria. Quoniam omnes ex Adā sumus. Et de hoc nunq; aliquis dubitauit, recolens quia scripsit Lucas. Postquā enim resurrexit à mortuis estimantibus quibusdā non in corpore ex Maria videri Dominū, sed pro ipso spiritum, dicebat: Videte manus meas et pedes et vestigia clauorum: quia ego ipse sum. Palpate et videte, quia spiritus carnem et ossa non habet, sicut me videtis habere: et hoc dicens, ostendit eis manus suas et pedes. Ex quibus confutari possunt iterū, qui dicunt in carnē & ossa mutātū esse Dominū. Non enim dixit, Sicut me videtis esse carnem et ossa, sed habere: ut non ipsum verbum in hac mutātū esse credatur, sed ipse in ys et ante mortē & post resurrectionem esse credatur. Et cetera. Consentit Athanasio beatus Cyrillus, qui et ipse verū corpus Domino resurgenti & in celos ascendenti tribuit, et hactenus creaturā agnoscit. Nā ad Successum Isaurie Diocæs. episcopum, postquā multa in hanc sententiam disputasset, dicit tandem: Impossibile est in deitatis essentiam vel naturam aliquid creatu

Cyrillus.

tarum

varum posse conuerti. Est autē creatura etiā caro. Ideoq; *Caro Christi creatura, non conuersa in deitatem.* diuinum quidē dicimus corpus Christi: quia corpus est Dei et ineffabili gloria illustratū, incorruptibile & iam sanctum atq; viuificū confitemur. Quod autem in naturam deitatis sit commutatum neq; sanctorum Patrum quisquam sensit aut docuit, neq; nos ita sentimus.

S. Hieronymus ex professō & fuse et doctissimē pyssimeq; disputat de veritate corporis ex mortuis excitati, contra Ioannem Hierosolymitanum & omnes Origenianos ad Pammachium. Inter alia hæc Origenis erronea recitat: Nec vos, ô simplices, resurrectio Christi decipiat, quod latus & manus monstrauerit, in litore steterit, in itinere cum Cleopha ambulauerit, & carnes & ossa habere se dixerit. Illud corpus alijs pollet privilegijs (obseruent hæc probè antagonista nostri) quod de viri semine & carnis voluptate non natum est. Nec dissimulat naturam aërei corporis & spiritalis. Clausis enim ingreditur ostijs, & in fractione panis euanesceat. Et reliqua. Ad hæc respondens Hieronymus: Quomodo, inquit, veras manus & verum latus ostendit, ita verè comedit cum discipulis, verè ambulauit cum Cleopha, verè lingua loquutus est cum omnibus, vero accubitu discubuit in cæna, veris manibus accepit panem, benedixit ac fregit & dedit illis. Quod autem ab oculis repente euauuit, virtus Dei est, non umbra aut phantasmatis. Alioqui & ante resurrectionem cum eduxissent eum de Nazareth, ut precipitarent de supercilio montis, transiit per medios, id est, elapsus est de manibus

illorum. Nunquid iuxta Martionem dicere possumus, quod ideo natiuitas eius in phantasmate fuerit, quia contra naturā qui tenebatur elapsus est? Et reliqua quibus fortiter cōfutat leptologos illos fingentes corpus, et tamē subtile ac conuersum in spiritū. Respondet ad illud quoque quod legitur, Dominus clausis ingressus esse ianuīs. Sed et in Cōment. ad ult. cap. Isaia: Miror quosdam, inquit, aereum corpus & paulatim in auras tenues dissoluedum, post resurrectionē introducere, quia Dominus potentia maiestatis suae ad apostolos clausis ingressus est ianuīs: qui certē et ante resurrectionē pendulo super mare ambulauit incessu: & hoc ipsum apostolo praeiuit Petro, ut qui fide ambulabat, infidelitate postea mergeret, cui dictum est, Quare dubitasti modica fidei? Idem conuerso sermone ad Ioannem Hierosolymitanum: Vis, inquit, resurrectionem verē & non putatiuē, ut loqueris, confiteri? Post illa quibus ignorantium blanditus es auribus, quod in ipsis corporibus, in quibus mortui sumus & sepulti resurgamus, hoc potius adiunge & dic: Quoniam spiritus carnem & ossa non habet, sicut me videtis habere: & propriē ad Thomam, Inser digitum tuum in manus meas, &c. Sic et nos post resurrectionē eadem habebimus membra, quibus nunc utimur, easdē carnes, sanguinem & ossa: quorum in scripturis sanctis opera, non natura damnatur. Hae est vera resurrectionis confessio, quae sic carni gloriam tribuit, ut non auferat veritatem. Idem mox iterum: Ego liberē dicam, & quanquam torqueatis labia, trahatis capillum, applaudatis pede, Iudaeorum lapides inquiratis, fidem ecclesia apertissime

Christus ingressus ianuīs clausis.

apertissime confitebor, Resurrectionis veritas catholica sine carne & ossibus, sine sanguine & membris intelligi non potest. Vbi caro & ossa & sanguis & membra sunt, ibi necesse est, ut sexus diuersitas sit, ubi sexus diuersitas est, ibi Ioannes Ioannes, Maria Maria. Lege tu cetera.

Huc pertinet locus Augustini superius expositus ex epistola ad Dardanum. Idem lib. de Ciuit. Dei 13. cap. 22. & 23. dicit: Certè fides Christiana de ipso Saluatore non dubitat, quod etiam post resurrectionem, iam quidem in spiritali carne, sed tamen vera, cibum & potum cum discipulis sumpsit. Non enim potestas, sed egestas edendi & bibendi talibus corporibus aufertur. Vnde & spiritalia erunt: non quia corpora esse desissent, sed quia spiritu viuificante subsistent. Nam sicut corpora ista, quæ habent animam viuentem, nondum spiritum viuificantem, animalia dicuntur corpora, nec tamen animæ sunt, sed corpora: ita illa spiritalia vocantur corpora. Absit tamen ut ea spiritus credamus futura, sed corpora carnis habitura subsistentiam, sed nullam tarditatem corruptionemque carnalem spiritu viuificante passura. Tunc iam non terrenus, sed cælestis homo erit: non quia corpus quod de terra factum est, non ipsum erit, sed quia dono cælesti iam tale erit, ut cælo incolendo non amissa natura, sed mutata qualitate conueniat.

Theodoretus Dialog. lib. 2. qui est ac inscribitur Inconfusus, inducit suum illum Eranisten asserentem in resurrectione corpus domini mutationem accepisse in naturā

Theodoretus

diuinitatis. Opponit Orthodoxus: Quomodo ergo diffidentibus discipulis et manus ostendit et pedes? Excipit Eranistes, Sicut clausis ianuis ingressus est. Respondet Orthodoxus, Sed ingressus est clausis ianuis, quemadmodum ex utero est egressus, cum virginis claustra obfisterent, & sicut in mari ingressus est: nondum autem ut tu dicis facta erat natura mutatio, etc. Deinde post multam et variam disceptationem, infert Orthodoxus: Ergo manet quidem natura, mutatur autem, quod est eius corruptibile in incorruptionem, et mortale in immortalitatem. Sic autem consideremus quod infirmum et quod sanum corpus est, ex a quo corpus appellamus. Et mox, igitur corpus dominicum surrexit quidem à corruptione et interitus alienus et impatibile et immortale et diuina gloria glorificatum, et à cœlestibus adoratur potestatibus, corpus tamen est, & habet quam prius habuit circumscriptionem. His et alijs multis in hanc sententiã disputatum, obijcit Eranistes ille: Sed postquã in cœlos assumptus est, existimo te nõ ostensurum corpus à viris sancto spiritu inspiratis corpus dici. Respondet Orthodoxus: Ostendam etiã post assumptionem corpus Domini corpus vocari. Audi ergo Paulum dicentem: Nostra conuersatio in cœlis est, ex quo etiam expectamus Seruatorem Dominum Iesum, qui transformabit corpus humilitatis nostræ, ut sit conforme corpori gloriæ ipsius. Non est ergo mutatum in aliam naturam: sed mansit quidem corpus verum, diuina gloria impletum, & lucis emittens radios. Illi sistent sanctorum corpora conformia. Sin autem in aliam naturam mutatum est, eorum quoque corpora similiter

muta-

mutabuntur. Fient enim illi conformia. Sin autem corpora sanctorum seruant suæ naturæ characterem, corpus quoq; Domini similiter habet suam substantiam immutabilem. Miratur Eranistes corpora nostra aequalia fieri corpori Christi. Declarat ergo hoc Orthodoxus & ait, Ab interitu quidem & corruptione erunt ea quoq; aliena & immortalitatis participia: habebunt etiam gloriæ partem & communionem, quemadmodum dicit Apostolus, Siquidem compatimur, ut etiam glorificemur. In quantitate autem magna potest inueniri differentia, & tanta quantum differt Sol à stellis, vel quantum dominus à seruis, & quod illuminatur ab eo, quod illuminat. Suos tamen seruos etiam suis nominibus impertyt, & qui lux appellatur, sanctos quoque lucem vocauit: Vos enim, inquit, estis lux mundi: & qui Sol iustitiæ nominatur, dicit de seruis: Tunc fulgebunt iusti sicut Sol. In quantitate ergo, non qualitate erunt sanctorum corpora corpori Domini conformia. Et cetera.

Vigilius quoq; martyr contra hæreses disputās, Dicitur sanè isti Christum usque ad resurrectionem eius ex duabus confiteri naturis, post resurrectionem autem vnius eum esse fateri. Et mox, Forsan adhuc in terra positus utriusque erat natura, postea verò quam cœlos ascendit vnius cœpit esse diuina. Et quid ergo ibi facit nomen filij hominis, si natura ibi non est humanitatis? Quomodo rei extanti inane nomen ascribitur? Quomodo nominis veritas manet, si natura proprietas abest? Deniq; dicit, Cum venerit filius hominis in gloria

patris sui. Et iterum: Sicut fulgur exit ab oriente & ap-
 paret usque in occidentem, ita erit & aduentus filij ho-
 minis. Et iterum: Veniens filius hominis, putas ne fidem
 inueniet in terra? Daniel quoque: Ecce, ait, in nubibus
 cœli filius hominis veniebat. Si amissa est ergo huma-
 nitatis natura, cur eius est recensum vocabulum? An
 quia nomen opus erat, & res nominis tanquam non ne-
 cessaria repudianda fuerat? Sic despiciant, quos nihil er-
 roris sui atque ineptiæ pudet. Ceterum Dominus Ie-
 sus Christus, ut ostendat nostri generis naturam non
 fuisse consumptam, veraciter se filium hominis dicit,
 secundum quam etiam patrem interpellat pro nobis.
 Hæc ille.

Exposuimus hucusq; euidentia pro veritate corporis
 Christi, adeoq; pro causa nostra contra aduersarios scri-
 pturæ testimonia, clara Patrum dicta, & minime an-
 tiquæ sententias: deniq; in hoc genere dogmatis totius ca-
 tholicæ Ecclesiæ consensum. Concludimus ergo manife-
 ste contra veritatem fidei pugnare corporalem, quam
 isti omnibus obtrudunt, Christi in panis præsentiam, ut
 pote quæ non potest, nisi veritas corporis Christi corpo-
 risq; proprietates euacuetur, statui. Ostendimus nos nulla
 noua primitiua Ecclesiæ ignota proferre dogmata. Pur-
 gamus nos ab omni suspitione hæreseos, nedum à Nesto-
 riani dogmatis infamia. Neque interim aduersarios no-
 stros aspergimus ijs asperginibus, à quibus illi (metuo)
 vix abstinerent, in comquinandis nobis, si ea ipsis esset
 occasio & facultas, quam omnes fideles nos habere, ma-
 nifestissime vident.

Nullas

Nullas fuisse contentiones apud ueteres de
præsentia corporis Christi in Cœ-
na Domini.

Cum autem uniuersa vetustas de veritate corporis
Christi ita senserit concorditer & constantissime, ni-
hil mirum est nullas ei fuisse contentiones de sensu ver-
borum Domini, Hoc est corpus meum, aut de præsentia
& manducatione & potu veri corporis & sanguinis
Christi. Omnes enim agnoscebant figurate dictum esse,
Hoc est corpus meum: omnes agnoscebant sacramentum
& mysterium, quod spiritualiter perficeretur per fidem.
Et hæc doctrinā in ecclesia Dei post octingentos à Chri-
sto nato annos usurpatum esse testari potest, vel Ber-
trami presbyteri libellus, quem iubente Carolo Caluo
Francorum rege, conscripsit. Quamquam ex illo ipso li-
bello colligere liceat, vel illo tempore & ante id tempus
fuisse exortos qui sentire cœperint quod nulla sub figu-
ra, sed ipsius veritatis nuda, ut ille ait, manifestatione
mysterium peragatur. Certè Ioannes Damascenus qui
& idola in tēplis defendit, quo nomine à septima (quā
ita quidem falso dictam aiunt) Synodo damnatus est,
per hoc & cetera ipse transmutationem panis & vini mi-
raculosam & ineffabilem in corpus & sanguinem Chri-
sti affirmavit, manifeste scriptum relinquens, Non est
figura panis corporis Christi (absit hoc) sed est ipsum
corpus domini deificatum. Si quæras modum, nihil am-
plius scimus, quam quod verbum Domini, Hoc est cor-
pus meum, est verum & efficax & omnipotens, mo-
dus autem inscrutabilis. Floruit hic post septingentos à

Lib. de or-
thod. fide 4.
cap. 14.

natiuitate Domini annos, imperante Leone Isaurico.

Pan̄ est cor
pus Christi
& sacramen
tum corporis
Christi.

In veterū verò monumentis utrūq. genus loquēdi in ecclesia vsurpatum fuisse deprehendimus, & panē & vinū esse verū corpus & sanguinē Christi: et panē & vinū signa symbola & sacramenta esse veri corporis et sanguinis Christi. Qui dicebant panē & vinū esse verū corpus et sanguinē Domini, non oppugnabant eos ceu fidei hostes, & hereticos et sacramentorum euersores qui appellabant panem et vinū signa, symbola vel sacramenta veri corporis & sanguinis Domini. Agnoscebant enim et ipsi loquutionem sacramentalem & mysterium, neq. ita crassi erant, aut figuratas loquutiones velut proprias exponendas contenderent. Rursus qui appellabant panem & vinum sacramenta corporis et sanguinis Domini, non abhorrebāt ab illa loquutione, Panis est verum corpus Christi & vinum est verus sanguis Christi, quae percipiuntur à fidelibus. Neq. enim de his contendeabant, neq. in sacramentis nihil aliud agnoscebant, quam pura vel nuda ac prophana signa. Nam intelligebant omnes & fatebantur, Christi fideles spiritualiter per fidem participare rebus cœlestibus, quarum sacramenta ore percipiebantur. Ergo S. Hieronymus hac Domini verba, Hoc est corpus meum exposnebat, ut superius dictū est, per representationem. Idē in Epist. de Exuperio Tolosano episcopo loquens, Corpus Domini, inquit, in canistro vimineo & sanguinem gestabat in vitro. Idem rursus in Ecclesiasten, Quia caro Domini, inquit, verus est cibus, et sanguis eius verus est potus iuxta ἀνάγωγι hoc solum habemus in prae

in seculo bonum, si vescamur carne eius cruoreq; potemur non solum in mysterio, sed etiam in scripturarū lectione. Verus enim cibus & potus qui ex verbo Dei sumitur scientia scripturarum est. Ad eundem modum scribunt & loquuntur etiam alij scriptores ecclesiastici.

Ideoq; libenter recipimus. S. martyris Iustini testimoniū, quod in libris aduersariorum nostrorum, veluti inuictum corporalis presentiae & manducationis testimoniū, à fronte, veluti in acie collocatur. Etenim in cœna agnoscimus non vulgarem panē, sed verbo et institutione Christi, qui veram pro nobis carnem assumpsit, consecratum vel sanctificatum (& hætenus quidem mutatū) panem, alimoniam inquam pascentem fideles ad vitam eternā, & ideo corpus et sanguinē Dñi, quæ sola fide percepta viuificare possunt. Rectē vero & Tertull. 2. ad uxore suā lib. incōmoda recitans matrona Christianæ marito gētili nuptæ. Non sciet maritus, inquit, quid secreto et ante omnem cibū gustes: & si sciuerit panem, non illū credit, qui dicitur. Item, Quis ad conuiuium dominicum illud, quod infamant, sine sua suspitione dimittit? Caterum idem in Apologetico cap. 10. commemorat ethnicos infamauisse mysteria Christianorum, quasi hi in istis ut Thyestæa cœna verā carnem humanam deuorarent verumq; potarent sanguinem. Contra hos differēs inter alia. Porro quāle est, inquit, ut quos sanguine pecoris horrere (etenim tunc ad huc, secundū apostolicū decretū, à suffocato et sanguine abstinēbant Christiani) cōspicitis, humano inhiare credatis? Et iterū, Erubescat error vester Christianos q

Iustinus martyr.

Ethnici infamarunt mysteria Christianorum.

Acto. 15.

ne animalium quidem sanguinem in epulis esculentis habemus, qui propterea quoque suffocatis et morticinjs abstinemus, ne quo sanguine contaminemur, vel intra viscera sepulto. Et cetera. Nihil autem mirum est ita iudicasse crassos, et spiritu dei vacuos gentiles, utpote qui mystica verba & sacramentales loquutiones, quas audiebant, carnaliter non spiritualiter interpretabantur. Oecumenius certe epistolam S. Petri enarrans, et quod apud omnes ecclesiasticos scriptores legerat, velut in compendium contrahens, sic scriptum reliquit, Obloquentes autem de nobis gentiles inducit Petrus. Quod si quis cognoscere vult ex ijs quae Irenaeus Lugdunen. episcopus de Sancto & Blandina martyribus memoriae tradidit, manifeste perspicere potest. Ea ut breuius referamus, eiusmodi sunt. Cum Graeci Christianorum prima institutione instructorum, quos catechumenos vocant, seruos comprehendissent, easque cogerent, ut arcani aliquid de Christianis proderent, serui hi cum nescirent quid incundi ipsis possent referre, quantum ab heris suis audiueraut, Corpus scilicet & sanguinem Christi esse, quod in sacra mensa sumeretur, id reuera ipsi carnem et sanguinem esse existimantes, inquirentibus euulgarunt. Ipsi vero id certo fieri à Christianis rati, in reliquos Graecos diffamarunt, & Sanctum & Blandinam confiteri fidem tormentis coegerunt. Quibus Blandina sumpta fiducia opportune dixit. Quo pacto, inquiens, facere hoc Christiani paterentur, qui ne concessis quidem carnibus, exercitationis & continentiae causa frui volunt? Hactenus ille.

Huc

Huc pertinere arbitror quod beatus Augustinus aperte vocat scelus aut flagitium corpus Christi edere corporaliter. Verba auctoris si quis requirat, hæc sunt, Si præceptiva loquutio est aut flagitium aut facinus vetans, aut utilitatem aut beneficium iubens non est figurata. Si autem flagitium aut scelus videtur iubere aut utilitatem aut beneficentiam vetare, figurata est, Nisi manducaveritis, inquit, carnem filij hominis & sanguinem biberitis, non habebitis vitam in vobis, facinus vel flagitium videtur iubere. Figura est ergo præcipiens passioni Domini esse communicandum, & suaviter atq; utiliter recondendum in memoria quod pro nobis caro eius crucifixa & vulnerata sit. Et reliqua quæ leguntur 3. lib. de Doct. Christ. cap. 16. Quis ergo ex his omnibus quæ attulimus, non colligat, tamen si primitiva ecclesia disertè confessa sit fideles carnem verā & sanguinem Domini verum verè manducare & bibere, nunquam tamen cuiquam fidelium venisse in mentem, id fieri corporaliter & naturaliter, sed spiritualiter potius ac mystice, qui modus solus cognitus rectè à priscis dicitur fidelibus. Proinde omnibus istis seculis abundè satis erat confiteri fideles verè participare corpore & sanguine Domini. Nemo adigebatur ad has voces Carnaliter, Naturaliter, Corporaliter, Substantialiter, in pane, sub pane, cum pane, aut mutata etiam & transubstantiata substantia panis in substantiam corporis Christi.

Fateor sanè voces Corporaliter & Naturaliter, inveniri in negotio Cæna apud beatum Cyrillum, sed lon-

gè alia ratione, quàm hodie soleant afferri. Id quod copiosissimè collatis inter se sententijs, demonstravit beata memoria D. Ioānes Oecolamp. Explicat semetipsum & ipse quoq; Cyrillus fusc lib. in Ioan. II. cap. 26. et 27. Ad obiectiones Theodoreti idem ille asseuerat sacramentum fidelium non statuere ἀνθρώπων φάγισιν hominis manducationem, adigens insane & irreligiose (ita loquitur) mentes fidelium ad crassas cogitationes, sed ad ea potius inducere quæ sincera & inexquisita fide capiuntur. Præterea intelligimus coniunctionem illam (quod et superius diximus) quam fideles cū Christo habent, non fictam aut imaginariam esse, sed verā et hæcenus naturalem corporalemq; utpote quæ primo quidem pertinet ad animā, deinde & ad corpus ipsum nostrum. Venit. n. Christus dominus, non duntaxat saluandis animabus, sed & reparandis corporibus. Ideo alibi Cyrill. admonet, dominū propterea nostra cōmunicasse carne, quod ita per carnem suā, diuini spiritus opera, vitam suam in nostram quoq; carnem vellet inspirare aut diffundere. Vnde & Paulus dixisse videtur, Ne scitis, quia mēbra vestra mebra sunt Christi? Et iterū, Quoniā membra sumus corporis eiusdem, ex carne eius & ossibus eius: non tam quod cōmunicemus cum eo, et ille nobiscū eadem carne, quam quod participes reddamur immortalitatis & resurrectionis per hoc, quod ille carnem assumpsit, in carne mortuus est & resurrexit, ut vitam carni nostræ communicaret & totos nos anima & corpore restauraret. Id verò cum fidelib. Cænā celebrantibus reparetur ac representetur, atq; sacra

Coniunctio
nostra cum
Christo.

mentis

mētis visibiliter incorporamur Dño et ecclesia eius, qd mirū, si audiamus fideles communionē mystica unum cū dño corpus fieri? cū & Paulus dixerit, *Vnus panis, unū corpus multi sumus.* Nā ex eodem pane participamus. Et qui hoc dixit panem ipsum neq; corporaliter esse corpus Christi, neq; sub pane latitare corpus Christi naturaliter asseruit. Proinde satis aliquādo in ecclesia fuisset, si qd dixisset professusue fuisset. Christi verū corpus, & verum eius sanguinem se percipere in celebratione mysteriorū, etiā si nō adiecisset carnaliter, corporaliter, naturaliter, substantialiter aut etiam transsubstantialiter, in pane, cū pane, aut sub pane, modo tamen ineffabili: Quinimo si quis adiecisset has voces, spiritualiter, mystice, sacramentaliter, vel ratione sacramentali, aut modo sacramentis proprio, nō hoc nomine in suspicionē trahebatur hæreseos, neq; lapidebatur pro sacrilego, uti hodie fieri consuevit.

Evolutis demū mille illis fatalibus annis. manifeste de corporali præsentiā et mādicatione corporis Christi in pane, magno ecclesie religionis veræ et pacis publica malo definitū est in Cōcilys, quæ diuersa diuersisq; tēporib; celebrabātur Florētia, Vercellis, Turoni et Romæ: in quibus gubernacula ecclesie et doctrinarū dijudicatio penitus deuenerat in manū et arbitriū monachorū, q et omne suā operā collocabāt Romanis pōtificib; quorū pleriq; isto seculo et ipsi erant monachi. Notū est autem historiarum non omnino rudibus, qualia illa fuerint tempora, quales tunc sederint Romani pontifices, et qui meliores videbantur, à quibus fuerint gubernati. Illo

Apoē. 20.

Definitur
corporalis
præsentiā &
manducatio.

infelici seculo federat Siluester 2. in omnibus historijs
magia turpis imò fœdissimus. Illo tempore federat Bene
dictus 9. federat item Gregorius 6. quorum discipulum
ait fuisse Beno cardinalis, Hildebrandum monstificiū
monachum, qui postea cum in sellam pontificam emer-
sisset, dictus est Gregorius 7. Hic plerofq; sui temporis
pontifices, & melioris quidem nota homines, pro suo
rexit arbitrio, vel certè sustulit veneno. De quibus Be-
no copiose, mihi verò iam non est dicendi locus.

De cœna do-
mini alterca-
tiones.

Amunt illo seculo duos extitisse libros contrarios, al-
terum quidem Ioannis Scoti viri doctissimi, non illius
Dunsy, sed longe vetustioris vel è schola venerabilis
Beda progressi, & collega Albini, vel dicti aliàs Eri-
gena, qui adductis Patrum sententijs, ostenderit myste-
ria Christi spiritualia esse: alterum verò Paschasij (Ra-
berti opinor abbatis Corbeien.) qui & ipse collectis Pa-
trum sententijs ostendere voluerit corporalia esse myste-
ria. Scindebantur inter se docti, alijs huc, alijs illuc incli-
nantibus, mutuisq; inter se odys & concertationibus
flagrantibus. Inter hos non postremum locum conce-
dit Lanfranco Ticiniensi & Berengario Andegauen-
si, quorum hic Ioan. Scoti, ille Paschasij partibus adhare-
bat. Delata est tandem controuersia in celebres Sy-
nodos, ac damnatus est liber Ioannis Scoti in Concilio
Vercellen. damnata est & doctrina Berengary, qui et
concionando & scribendo corporalem in mysterijs sen-
tentiam oppugnabat. Hic Berengarius Gallicanarum
ecclesiarum minister semel & iterum vocatus in Sy-
nodos, postremo sub Pontifice Nicolao in Concilio Roma

Berengarius

no ad eam est adactus palinodiam, quam Gracianus re-
 citat De consecrat. Distinct. 2. Ego Berengarius. Coactus
 est autem fateri panem & vinum, quæ in altari ponun-
 tur (verba ipsa Reuocationis recito) post consecrationem
 non solum sacramentum, sed etiam verum corpus &
 sanguinem Domini nostri Iesu Christi sensualiter, non
 solum sacramentum, sed in veritate manibus sacerdo-
 tum tractari frangi, fideliumq; dentibus atteri. Pulchre
 verò hæc congruunt corpori Christi pro nobis tradito,
 & in cælis regnanti. Si Augustinus hæc audiisset, di-
 xisset piaculum commississe, & Berengarium, et eos qui
 ad talem palinodiam ipsum adegerunt. Ex libro Lan-
 franci apparet Berengarium commissi sceleris egisse pœ-
 nitentiam. Platina certè testatur in Ioan. 15. Berengari-
 um doctrina & vita sanctitate insignem fuisse virum.
 Caterum tam videlicet firma ac certa hæc sunt apud eo-
 os quoq; qui ista pro sacrosanctis adorant, ut ipse Decre-
 torum Glossator, ad margines ascribere compulsus sit.
 Nisi sanè intelligas verba Berengary, in maiorem inci-
 des hæresim, quam ipse: & ideo omnia referas ad ipsas
 species. Hæc ille. Ergo si hæc Commentatoris interpre-
 tatio vera est, consequitur manifestissimè ipsum Domi-
 ni corpus in veritate manibus sacerdotum nec tractari
 nec frangi neq; dentibus fidelium atteri, sed duntaxat
 Sacramenti panē. Quid verò hoc aliud est, quam iam
 statuta dicta & confessa, iterum irrita reddere, dis-
 suere atq; negare? Neq; aliter fædum hunc errorem fu-
 cauit & excusauit ipse Sententiarum magister Petrus
 Lombardus, dicens ista quidem non corpori esse attri-

Contra Be-
 rengarij reuo-
 cationem.

buenda, sed Symbolo. Vitur itaque & ipse tropo magister, quo rei tribuitur quod est Symbolorum. Interim audit in nos propter usurpatum tropum fulmen contorquere hæreseos. Idem ille fatetur Dominum discipulis suis tale corpus in Cæna dedisse, quale tunc habuit, hoc est passibile & mortale, nunc autem nobis dari in Sacramento impassibile & immortale sub speciebus panis & vini. Sed oportuit istos homines ita loqui & agere, nec sibi probe constare, ut omnes intelligerent prudentiores, illos reuera esse quos Apostolus dixit, non intelligere quæ loquuntur, aut de quibus asseuerent. Vnde aduersarij nostris huiusmodi præsidia inuideo, tantum abest ut amaris sannis, quod ipsi futurum existimaerunt, excipiam. Citatur enim ab ipsis contra nos Concilium Vercellense & Romanum, sub Nicolao 2. & Gregorio 7. celebratum. Quasi verò istorum Conciliorum decreta ipsa sese non refutent.

Innocent. 3.

1115.

Reuolutis à morte Gregorij 7. annis circiter 130. Innocentius eius nominis tertius coacto Roma apud Lateranum Concilio, noua certè audacia Symbolo condito inter capita fidei reposuit non iam corporalem præsentiam & manducationem corporis & sanguinis Christi sub latebra vel speciebus panis & vini, sed insuper & Transsubstantiationem: sicuti in Decretalibus manifestè exponitur, ac inter alia legitur: In Ecclesia idem ipse sacerdos & sacrificium Iesus Christus: cuius corpus & sanguis in sacramento altaris sub speciebus panis & vini veraciter continentur, transsubstantiatis pane in corpus & vino in sanguinem posstate

state diuina. Idem ille mandauit Eucharistiam in omnibus ecclesijs sub accurata custodia conseruari. Id quod legitur Decret. lib. 3. tit. 44.

Interim dissimulare hic non debco, vel ante Innocentium fuisse, qui opinabantur post consecrationem non superesse in Eucharistia substantiam panis. Id quod ex libro Lanfranci contra Berengarium scripto, colligere licet. Ac constat illa secula diuersissimis inter se sententijs fuisse distracta. Scholastici scriptores ipsi fa-
tentur scripturis sanctis exprimi quidem presentiam Christi in Cœna, modum autem presentiae non exprimi. Antiquitus verò varias de illo fuisse sententias. Nam quosdam sensisse panis substantiam manere simul cum corpore Christi: quam tamen quidam illorum vehementer insectantur. Quosdam verò existimauisse panem virtute diuina factum esse carnem Christi. Et quosdam rursus opinatos esse, ipsam panis substantiam desinere, accidentia manere, & sub his esse corpus Christi. En quantopere uariatum sit illo seculo in dogmate presentiae Christi in Eucharistia. Subiiciunt tamen non aliam de Sacramentis sententiam esse sequendam, quàm Romana ecclesia, quæ asserat panem transsubstantiari in corpus, uinū in sanguinem. Cumq; quondam variæ fuerint opiniones quomodo sit in pane corpus Christi, deniq; et de conuersione aquæ in poculo sacro: sicuti uidere licet in Decretali edita à Gregorio 9. libro tertio de Celebratione missarum, Cum Martha, elegisse & explicauisse ecclesiam (sic illi loquuntur) in Cōcilio Lateranen. sub Innocent. 3.

Diuerse sententia de presentia modo.

eum sensum, quem supra commemorauimus de transsubstantiatione, velut orthodoxū, qui omnino post istā declarationem solennem factam, retinendus sit. Quis autem tam obesa naris sit, qui non subolfaciat istud docendi genus prophanas magis scholas resipere, quā doctrinam apostolicam? Quis apostolus vsus est vocabulo Transsubstantiationis & accidentiū sine subiecto & similium nugarum? Quis deniq; non videat vetustatem illis caruisse tricis, & nos quoq; feliciores hodie futuros, si illis carere vellemus.

*Loquutiones
veterum ex-
plicantur.*

Sicubi ergo veteres dicunt in vsu sacro, panem non amplius esse panem, non intelliges id de transsubstantiatione, quæ nondum, ut modò dictum est, erat definita, sed de eo, quod qui vera fide edit de mensa Domini, de re magis significata sollicitus est, quā de signo. Sicubi dicunt mirabiliter mutari panem in corpus Christi, vinum in sanguinem Christi, rursus nihil loquuti sunt de transsubstantiatione, sed terrestrem vel vulgarem panis usum iam mutatum in sacrum intellexerunt. Nam fidelis symbolū iam non usurpat veluti corporis cibum, sed tanquam mysticum, uti superius expositum est. Sed & admiratione dignum est, Dominum hisce signis communicasse corporis & sanguinis appellationem, atque his nobis cōmendasse mysteriū passionis suæ, fideiꝫ nostræ & salutis. Admiranda est imprimis cōmunio filij Dei cum miseris nobis peccatoribus.

*Honorius 3.
1226.*

Insequutus Innocentiū Honorius eius nominis 3. constituit ut eucharistia in mundo loco & obsegnato semper honorifice conseruetur, ad infirmos item deferatur,
cumq;

cumq; defertur aut ostenditur, populus se reuerēter inclinēt. Leguntur hæc Decret. lib. 3. Tit. 41. Ita verò factū est, ut palatia basilicæ siue templa Eucharistiæ, quasi Deo vero, cōstrui cœperint. Quibus omnibus paucos post annos accessit Vrbanus eius nominis 4. qui ne quid diuī Vrbanus 4.
no cultui deesset, festum Eucharistiæ instituit, quod ap 1264.
pellatur Corporis Christi. Id quod Clemens 5. Clementi-
narum lib. 3. De reliquijs et veneratione sanctorum con-
firmavit. Quibus omnib. si adijciatur 11. cap. vaticinij Da-
nielis, apparebit, quàm hæc omnia Deo vero probentur.

Suppeditata autem hac veluti uberrima disputatio Rixe & ala-
num interminabilium materia, cœperunt se exercita-
re in omnibus penè scholis & cœnobys curiosa & sub-
limia ingenia, ac ab his tradita & prouulgata sunt
de Eucharistia pleraque, quæ profectò satius est ig-
norare quàm discere, contemnere quàm meminisse.
Interim traditi sunt carceribus & ignibus absumpti,
quotquot nouum illud dogma papisticum de Eucha-
ristia recipere & adorare noluerunt. Atque hic me
tempus deficeret si pergerem singulariter commemora-
re quot & quàm acres & luctuosæ concertationes &
persecutiones ob hanc causam, magno suo cum mœro-
re viri boni quingentis hisce annis coacti sint aspicere:
cum tamen veteres ob hanc rem nihil contenderint,
neminem persecuti sint aut concremauerint. Hæc au-
tem in hoc commemoro, vt omnibus liquido appareat,
nullus de hac causa veteribus fuisse contentiones, &
quando cœperit obijci contentionum materia, cum qua
pariter agminatim in Ecclesiam Dei mala irruerunt

grauissima. At non possunt non innumera nos adoperire calamitates & caligines, quoties semel relictâ sinceritate simplicitateq; apostolica, per contentionum anfractus hominum placita, quæ recepimus, mordicus tueri statuimus. Vident autem viri sancti quàm nihil peccauerimus, tam nos quàm sancta memoria prædecessores nostri, qui relictis imò repudiatis nouis illis curiosis irreligiosisq; & dogmatibus & disputationibus, auitam illam veritatem, sinceritatem & simplicitatem, Deo prælucente, amplexi atque sequuti sumus. Vident præterea viri boni omnes, non posse in concordiam stabilem redigi contentionibus dissipatam & misere afflictam Ecclesiam, nisi depositis constitutionibus nouis hominum, deniq; contentionibus disputationibusq; curiosis & morosis, amplectamur omnes veterem illam & sinceram, quam hactenus exposuimus de cæna Domini, doctrinam. Cur verò hodie nobis non satisfaceret, quod veteribus satisfecisse videmus? Si quis confessus fuisset Christum suæ fidei adesse Ecclesiæ, ac carnem eius & sanguinem eius verum cibum & potum esse fidelium, quæ quidem percipiantur spiritualiter per fidem, non adigebatur ad peregrinas illas voces corporaliter, carnaliter, substantialiter, aut transsubstantialiter adijciendas? Cur itaq; nunc pro his conseruandis, tanquam pro aris ac focus decertatur?

Scio alicubi apud veteres non modo vtiliter, sed necessario quedam inuenta esse vocabula & inculcata, sed longe alijs de causis & alijs quoque in rebus, manifestè in scriptura traditis & cum nullo fidei articulo

pugnans

pugnantibus: qualia esse fateor vocabula non pauca in negotio adorandæ Trinitatis, & salutaris incarnationis filij Dei usurpata, &c.

Ecclesias Dei à nobis non esse turbatas,
neque hodie discindi.

Ceterum cum viri doctissimi & fideles Ecclesiæ doctores D. Huld. Zuinglius & D. Ioan. Oecolampadius Certamen sacramentarius
annis ab hinc XXXII. quando plerosque errores & abusos iam iam refutassent, & simplicem veteremque veritatem religionis veram, in ijs quibus præerant ecclesijs, restituisent, ideoque iam etiam Eucharistiam ab erroribus aspersis ab hominibus, repurgare aggredierentur, quos omnino præterire vel dissimulare non potuerunt, ac ea de re libellos aliquot modestos & sobrios edidissent, obiecit se his protinus, & animo quidem infensissimo, benè alioqui de Ecclesia meritis, D. Lutherus, eosque quos iuuare debuerat, acerbissimis adortus libellis, & impediuit quantum potuit, & ad probra atque conuitia usque oppugnavit. An verò causam bonam deferere, & loquente Luthero nostri tacere debuerunt? Cur itaque nostris illis & nobis hodie imputatur culpa dissensionis atque infausæ huius contentionis? Nam ut nostri veritatem ex verbo Dei cognitam, in nullius hominis gratiam obticere potuerunt, ita certè, nisi ministerium suum asseruissent, culpæ se obligassent maximæ. Certè non sine magno dolore in hoc certamen protracti, non potuerunt non facere, quod fecerunt Neque tamen implacabiles se D. Luthero unquam exhibuerunt. Vocati enim ab illustrissimo

Colloquium
Mariburgen
se.

Hessorum Lantgrawio, principe multis heroicis virtutibus ornatissimo Martburgum, non difficiles sese prae-buerunt. Et satis quidem feliciter cesserat istud colloquium. Nam in dogmatibus praecipuis concordēs se esse declararunt, sed & in causa Eucharistiae, quamvis de modo praesentiae convenire non possent, pacem tamē mutuam se servaturos pollicebantur. Iam verò sparguntur epistola, Acta & libelli de Martburgensi colloquio, frontibus satis pudore absterfis, commemorantes nostros illos multa retractasse, & nescio quae alia egisse & dixisse. Admoneo autem viros bonos, ut ista ipsorum scripta cum iudicio legant, neque credant omnibus ex stomacho magis ipsorum, quā ex ipsa veritate prolatis. Viuenti adhuc D. Luthero in Responsione illa nostra, quā & ipsam ille nobis extorserat, ea quae vera esse scimus de hoc colloquio, recitavimus, copiosa item expositione demonstravimus, nos cum ipsa & pacem servasse & se dulo quasiuisse, multa quoque multa tempore patienter dissimulavisse, atque adeo nullas dedisse occasiones reparato certamini. Ea ipsa etiam hodie opponimus parum firmis narrationibus & impotentibus adversariorum criminationibus. Possemus quidem copiosiora de istis rebus commemorare, & quidem verē: possemus & epistolas et Acta vulgare, nisi adhuc pacem, quā bellum mallems.

De D. Lu-
thero.

Quod adversarij clamant neminem unquam acerbius aut contumeliosius insectatum fuisse optimē meritum Lutherum, quā nos Tigurinos, proximo ante mortem eius anno, cum meritō parcere debuissēms

eius

ius senio reuerendo et meritis maximis, deferimus hac
 de re iudicium sedentibus. Extat inuettina (Breuē ille
 confessionem inscripsit) in nos Lutheri, extat nostra Re
 sponso, imò curauimus, ut ad nostram Responsonem
 imprimeretur Lutheri Confessio. Legant utrunq; libris
 pꝛ lectores, deinde iudicent quis modestiæ limites trans
 silerit, & an potiore rationem habere debuerimus
 senis Lutheri, quàm aternæ veritatis, ministerij nostri
 sancti, & tot animarum sanguine redemptarum &
 grauer libello illo offensarum. Grande illis piaculum
 videtur vel in aliquo contradicere Luthero. An verò
 huius dignitas & existimatio beati Petri apostoli reue
 rentia & amplitudine potior est? Cum autem huic re
 stiterit in faciem apostolus Paulus, & grauer coram
 omnibus reprehenderit, quod non recto pede ad verita
 tem euangelij ingrederetur, nunquam posthac nobis
 tanta esse debet vllius hominis, quantumvis præcullen
 tibus donis præditi, authoritas, ut vel impeccabile cre
 damus, vel in ijs quibus aberrare à veritatis diuina re
 gula videtur, non contradicendum ipsi existimemus.
 Peroptimè & sanctissimè S. Augustinus dicere sole
 bat, Ego solis eis scripturarum libris, qui canonici appel
 lantur, hunc honorem deferre didici, ut nullum eorum
 authorem scribendo aliquid errasse firmiter credam:
 alios autem ita lego, ut quantalibet sanctitate doctri
 naq; præpolleant, non ideo verum putem, quia ipsi ita
 senserunt, sed quia mihi vel per illos authores canonici
 cos, vel probabiles rationes, quod à vero non abhorreat
 persuadere potuerunt. Discant ergo aduersarij nostri &

Sententia
 aurea.

ipsi debitum honorem impendere scripturis diuinis, sô-
brie autem de omnium hominum etiam Lutheri di-
ctis factisq; sentire.

Porro ab edita responsione illa nostra, quam Luthe-
rus nobis extorserat, et ab ipsa Lutheri morte, nihil pro-
diit à nobis unquam, quo vel mortuum, memores iniu-
riarum veterum, insectati fuerimus, vel ullam occa-
sionem spectabilem nouis pugnis subministrauerimus.
Semper enim hoc contentionis malū sopitū optauimus.
Nec solemus priuatim aut publicè in Lutherū aut Lu-
theranos declamare, sicut audimus ministros quosdam
tam in templis quàm in alijs cœtibus, in promptu habe-
re Schuerméros & Zuinglianos, quos veluti scopum
habeāt, ad quem totā illam suam pharetram euacuet,
cum interim & tempus & locus ipsaq; necessitas ec-
clesiarum, longe alia quotidie argumenta suppeditent,
de quibus isti, si rite suo fungi vellent officio, dicere pos-
sent: ut iam non cōmemorem, grauiter illos coram deo
& sanctissima dei ecclesia peccare, qui innoxios fra-
tres vexāt, ac dissidia nulla ratione iusta fouēt. Possunt
sanè non tam ciues & domestici nostri, quam exteri
etiam, qui aliquando ad nos aliunde commeant, testari
quam doleat nobis hanc contentionem inter viros pra-
claros iam in Domino mortuos exortam esse, & quam
honorificè per cetera loqui soleamus de D. Luthero &
ecclesijs Saxonis, quas sincere amamus in Domino.
Ac speramus in Domino, sanctas Germania ecclesias,
quantumuis ipsarum aliquot ministri tumultuentur
& sauos in nos libros conscribant, nihilominus benè
sentire

sentire de nostro ministerio, et completi sincera charitate ecclesias Domini, & sanctas & numerosissimas, quarum ministri sumus, præsertim cū non nesciāt quā grande malum schisma sit, cum deniq; videant quā inuiti pertrahamur in hoc certamen, & nostra culpa, non fieri, quod boni omnes fieri dolent, pacem turbari. Pacem enim & concordia in Domino exoptamus.

Sed recitant aduersarij singularia quedā in nostris usurpari ecclesijs, quæ non possint non parare & alere incendia (sic enim loquuntur) & discordias. Atqui dum ea ordine annumerant, apparet omnibus non capis affectu prauo, in nobis nullam hæere dissidij culpā istosq; dissidij causas, nō datas à nobis, accipere, sed à se-ipsis inuētas, præter meritū nostrum, nobis obtrudere. Quale enim illud obsecro est, quod Iconomachia nobis Iconomachia obycitur? An verò probant illi imaginum vsum in templis Christianorum? Quem ut cum scripturis diuinis ex diametro pugnare nō nesciunt, ita meminisse debuerant, sero admodum vsum illarum in templa Christianorum esse admissum. An ignorant quanto cum ecclesiarū incōmodo, de hac re disceptatum sit in orbe Christianorū, & quod innumera mala simul cum imagini bus exundarint in ecclesia Christiana? Testari de his possunt omnes historia.

Iraſcuntur nobis aduersarij quod diuidentes primū præceptum Decalogi, singulare, ut aiunt, præceptum facimus ex eo, quo prohibentur imagines. Ac mirum est hanc ob rem illos iraſci nobis. Quid. n. hac in re peccauimus? Nihil hic facimus q̄ nō docuerit nos in Deut.

Exodo suo beatus Dei seruus Moses, & quod non ante nos fecerint praestantissimi & pyssimi quique scripturarum interpretes. An verò ignorant aduersarij, nobiscum facere Origenem, Athanasium, Chrysostomum, Ambrosium & Hieronymum, qui omnes concorditer Decem verba Domini, ita distinguunt, ut dicant prioris tabula esse praecepta quatuor, posterioris sex, ac singulariter praeceptum contra idola secundum numerant. De hac causa possemus hic dare copiosiora, nisi consultius videretur nostra tueri, quam aliena impetere.

Temporum
distinctio et
lectionum po
stillarum dige
stio.

Addunt nos abrogasse utilissimam temporum distinctionem & vsitatas festorum lectiones epistolarum & euangeliorum, idque fecisse bona diaboli intentione (sic loquuntur illi) ut nihil boni reliquum fiat de euangelio. Putida est hac obiectio, ut eius plane pigeat. Quasi verò euangelium Christi predicari non possit, nisi ex hac praescriptione adeoque ex libris postillaribus. Pesimè ergo Dei ecclesiae consultum fuit, priusquam scripturae in tempora essent distinctae, & priusquam Postillae essent inuentae. An apostilli isti tot saeculorum sancti haec tenus iucundum exhibuerunt sathanae spectaculum? An sathanas postillis demum victus & euangelium toti orbi est annunciatum? Quis verò ignorat scripturarum sectiones ac Postillas illas nuperum esse inuentum omnibusque iam propemodum ad lapsum & corruptellam in ecclesia extremam spectantibus, esse receptas? Sed & illas ipsas in partitionibus suis non raro inueniri satis ineptas? Mirum est illa non observata esse in histo

*ferijs, quas videlicet ob causas, quādo et à quib⁹ scriptu-
rarū lectio in tēpora distributa, et in tot partes sit disse-
cta. Si enim non nesciunt ista, cur tanta consensionis et
dissensionis momenta constituunt in re tantilla, qua vi-
dent tot secula citra dispendiū pietatis verāq; religionis
carere potuisse? Et nunc quidem per nos sanē licet qui-
busvis frui postillaribus libris sanioribus (quis enim ma-
gni fecerit proletarias quasdam monachorum postillas,
quouis pistillo retrusiores) nostra etate, pro temporis
ratione à doctis quibusdam editis, quibus & multi ec-
clesiarum nostrarum ministri legendis dāt operam: sed
his astringi ministerium & ministros, quasi euange-
lium pereat, nisi ad temporis distinctionē postillarumq;
seriem predicetur, nimis affectatum non dicam ineptis
esse videtur. Ineptius si quis inde aestimet concordiam
& discordiam ecclesiarum. Non carent autem prorsus
nesciunt aduersarij, ecclesiæ nostræ utili temporis di-
stinctione moderatūq; & legitimis ferijs, nec destituū-
tur sancta & necessaria scripturarum tractatione. Ete-
nim exponunt scripturas canonicas, collatis inter se lin-
guis, prophetae vel interpretes, quotidie, in scholis eccle-
siasticis. Adaptatur etiam religiose, absq; superstitione,
Christi ferijs, historiae euangelicae & doctrinae aposto-
lica, ut vulgus liquido, & suo quoq; tempore audiat et
intelligat compendium nostræ redemptionis, salutis ac
fidei, adeoq; sonat quotidie in templis ad cætum Christi
sanctum ad precandum riteq; Deum colendum sancte
collectum, euangelij doctrinaq; apostolica & prophe-
tica prædicatio: quæ quidem integra, non frustillatim*

I. Cor. 14.

discerpta, nec per miscellaneam quandam, sed ordine continuo & perspicuo proponitur. Ac eum docendi in ecclesijs modum, antiquis ecclesiæ doctõibus (felicioribus adhuc ecclesiæ rebus) receptum fuisse, testantur nõ modo concordēs historiarum narrationes, sed & ipsa sanctorum homeliæ & sermones & tractatus, in integros prophetarum & apostolorum libros aditi & posteris relictĩ, ut ea quæ hac in re nobis obiecta sunt ab aduersarijs, tantis certe viris indigna esse videantur?

*Ad Cœnã
admissi non
probatĩ.*

Obycitur præterea nobis Cœnã mysticã profanatio, utpote ad quam promiscuè admittantur non probati. Testabitur autem ecclesiã, cui ministramus, testabuntur & libri à nobis aditi, in præparandis ad Cœnã domini hominibus, nõ segnem nos adhibere diligentiam. Quãquam interim fateamur propter agnatã nobis omnibus corruptionem & infirmitates viciãq; quotidiana, nunquã nos abundè paratos ad tanta accedere mysteria. Quo nomine & in ipsis aduersarijs & omnibus hominibus existimo desiderari non pauca.

*De priuata
confessione.*

Si verò per probationem intelligunt priuatam confessionem & absolutionem, fatemur ingenuè nos semel et ex integro valedixisse papatui, ac recepisse & usurpare nunc vetustissimam illam & publicam in ecclesiã peccatorum, quæ soli deo fit, confessionem & euangelicam illam absolutionem, euangelij preconio nobis annunciatam atq; hisce scripturæ locis suffultam, Dauid dixit, Delictum meum cognitum tibi feci, & in iustitiam meam non abscondi. Dixi, Confitebor aduer-

sum

sum me iniustitiam meam Domino, & tu remisisti impietatem peccati mei. Ioannes uerò clamat, Sanguis Iesu Christi filij Dei emundat nos ab omni peccato. Si dixerimus peccatum non habemus, nos ipsos fallimus, & veritas in nobis non est. Si confiteamur peccata nostra, fidelis est & iustus, ut remittat nobis peccata nostra, & emundet nos ab omni iniquitate. Si dixerimus non peccauimus, mendacem facimus eum, & sermo eius non est in nobis. Item, Confitemini inuicem, alius alij lapsus vel delicta, & orate pro vobis inuicem. Et iterum, Deus reconciliauit nos sibi, per Iesum Christum, deditq; nobis mysterium reconciliationis. Nam Deus erat in Christo, mundum reconcilians sibi, non imputas eis peccata ipsorum, et posuit in nobis sermonem reconciliationis. Itaq; nomine Christi legatione fungimur, tanq; deo exhortante per nos, Rogamus pro Christo reconciliemini deo. Et reliqua. Non legimus alicubi priuatas hominum confessiones cōceptas aut exceptas esse ab apostolis, neq; ullus scripturæ locus præcipit peccata priuatim confiteri aut egerere in aurem sacerdotis vel ministri ecclesiastici. At isti nolunt fortassis peccata digerere per circumstantias, & sigillatim cum molestia & conscientia curiose recenseri.

Proinde si sigillatim enumerare non oportet omnes peccatorum circumstantias & species, sufficit certè ea confessio quæ à singulis & omnibus nobis, in templo, ministro præeunte, Deo fit palam. Interea uerò consilium in casibus certis vel difficilioribus petere, vel à ministro, vel aliquo diuina legis peritissimo, nemo

prohibet. Probare autem non possumus, si ex hac libertate fiat necessitas, & legibus certis mandetur praescripta confessio peccatorum, quam ministro facere oporteat.

De priuata
absolutione.

Absolutio autem à peccatis quid obsecro aliud est, quam hominis peccatoris iustificatio? Iustificantur enim quibus remittuntur peccata, & qui iam ab ipso deo absoluntur à culpa & à pœna. Hac autem iustificatio vel absolutio obuenit nobis ex sola dei gratia, in sanguine Iesu Christi, per solam fidem: sicuti uniuersa per totum terrarum credit & docet Christi ecclesia. Proinde iustificat solus Deus, idē ergo solus peccatores damnatosq; propter peccata, absoluit à damnatione. Absolutionem hanc, sicuti paulo ante verbis apostoli recitauimus, annunciat minister Christi, à Christo, testificans credenti certissime remissa esse peccata, ipsumq; propter Christum absolutum esse dei iudicio. At quis credat nuncium hoc & hanc prædicationem efficaciorē ex eo fieri, quod iam non publice omnibus, sed priuatim uni alicui annunciat, ac veluti in caput eius pronūciatur? Verum intelligit, ais, confitens ille generalem alioqui promissionem, iam per priuatam absolutionem, singulariter ad se pertinere. Quasi verò hoc ipsum non possit ex publica etiam prædicatione intelligere, ut quæ generales promissiones diligentissime singulis applicat. Qui omnibus loquenti ministro, & patram in conspectu Christi & ecclesia absolutionem denuncianti, & nomine quidem Christi & verbis Christi denuncianti non credit, idem priuatim promittenti

agere

ap̄re credet. Ac malè actum fuisset alioqui cum omni-
bus illis, qui multa sæcula antecesserunt priuatam con-
fessionem et absolutionem. Videbatur autem S. Petrus
satis singulariter efficaciterq̄ absoluisse suæ gentis homi-
nes, cū dixisset in Actis, Vobis primū deus cū suscitaf-
set filiū suū Iesum, misit benedicentē vobis, ita vt vnus-
quisq̄ vestrū conuerteret se ab iniquitatibus suis. Idem
interrogantibus corde compunctis, Quid faciemus, viri
fratres? Respondit, Resipiscite & baptisetur vnus-
quisq̄ vestrum in nomine Iesu, in remissionem peccato-
rum, & accipietis donum sancti spiritus. Equidem ob-
signantur in singulis nobis dei p̄missiones per sacramē-
ta, vt fidelis participans baptismo aut cœna dñi veluti
arham teneat, purgatū et absolutū se esse à peccatis, de-
niq̄ Christi corpus pro ipso traditū esse in mortem, vi-
tamq̄ Christi pertinere ad omnes, singulariter aut ad il-
lū ipsum fideli, qui iā euangelio prædicato credidit &
Sacramenta percepit. Habet itaq̄ fidelis satis clara, cer-
ta & indubitata suæ absolutionis quæ hætenus cōme-
morauimus testimonia, tametsi per priuatam confes-
sionem non penetret ad priuatam vsq̄ absolutionem. Neq̄
interim ignorare possunt, qui priuatam confessionem
& satisfactionem urgent, quid olim author Decreto-
rum Gratianus, de hac re ex veterum sententys scrip-
tum reliquerit, sub finem Distinct. 1. De pœnitentia:
vt equiores paulo nobis futuros putem, moderatioris
ingeny homines, cernētes nos carere rebus, quibus citra
infamiam & salutis dispendium multis sæculis carue-
runt sanctissima quondam Christi ecclesia.

Probatio ac-
cedentium ad
Cœnam Do-
mini.

Porro in probandis & instruendis ad Cœnam Do-
mini fidelibus, canonem sequimur apostolicum, qui ha-
bet, Probet autem homo seipsum, & sic de pane edat et
de poculo bibat. Subministrata itaq; probandi regula,
singulos ut semetipsos probent, adhortamur, & prius-
quam celebretur Cœna sacra agimus cum ipsis qua pos-
sumus fide & diligentia. Neq; aliter cum discipulis e-
gisse ipsum dominum videmus, in prima illa institutio-
ne, quam proculdubio omnium absolutissimam et san-
ctissimam fuisse nemo pius dubitat.

Panem domi-
ni deferre ad
agrotos.

Rursus verò ad diaboli consilium referunt, quod pa-
nem dominicum ad agrotos non deferimus. Mirum est
aut istos tanti res suas facere quibus semel assueverunt,
& quas consuetudine et hominū traditionibus ceu no-
uas apostolisq; incognitas acceperunt, ut omnes ijs nō pa-
ri modo utentes, mactent diabolo. Agroti apud nos
non destituuntur consolatione. Eucharistiā aut defer-
re è cœtu publico in priuatas ades, ac ex epulo sacro fa-
cere monophagiam vel cœnam priuatā, adeoq; clinicā
neq; domini precepto neq; apostolorum domini exem-
plo didicimus. Interim non periclitantur de salute, neq;
alimonia vitæ priuantur, qui cum uniuersa ecclesia, su-
us temporibus, cōmunicarunt, & iam quoq; & in finē
usque, in communionē Christi & sanctorum perseue-
rant.

Infantes non
baptisati.

Hic adijciunt, Sinunt infantes non baptisatos mori,
quia spem faciunt sine baptismo salutem obuenire pos-
se infantibus. Atqui nos non docere baptismum Christi
inutilem esse, aut nihil ad salutem facere, testes sunt li-
bri

brī nostri. Neq̃ ita leuiter de sancto baptismo apud popu-
lū differimus, vt segius aut tardius deferat ad san-
ctum baptisma infantulos. Caterum si prapropere hī
morte excedant, necessitateq̃ inenitabili sancto subdu-
cantur baptismo, fideles parentes consolamur sanē, atq̃
de salute infantium benē sperare iubemus. Quid verò
hic peccamus? Illi ne fidelibus prognatos parentibus &
prapropere morte sublatos in tartara precipitabunt?
illi ne iubebunt prapropere, vt vocant, baptismo obste-
trices baptizare? Quis verò in Ecclesia Dei vnquam
adhibuit ministerio sacro mulierculas? Sed cōmodum,
dum hæc scribo in manus venit colendiss. & chariss.
fratris D. Ioā. Caluini secunda defensio, ab illo ipso, pro
sua in me charitate, ad me missa, in qua video hæc cau-
sam copiose & piē esse discussam, sicuti & in eadem ad
alia multa nobis obiecta, præcipuē verò de indignē ipsa
carne Christi manducantibus, de quo alioqui & ipse
scripsissem, diligenter & doctē respondetur. Proinde
cum & venerandum senem dominumq̃, & fratrem
meū chariss. D. Bernardinū Ochinum Senensem, & ip-
sum in asserenda veritate abstergendisque calumnijs
laborare non nesciam, huic mea Apologetica expo-
sitioni finem imponam: si hunc locum prius conclusero
ac repetiuero, nihil hætenus prolatum esse ab ad-
uersarijs, quo euidenter ostenderint nostra culpa
ecclesias esse turbatas, vel turbari etiam hodie, ne-
que singularia quadam usurpari in nostris ecclesijs,
quæ merito discordias inducant & schisma perni-
ciosum foueant. Vtinam magis appositū ad concordiam

aduersarij nostri, apud se perpenderēt diligentius, quātum inter se diffenserint, summa interim cum consensione, in ritibus sacris, veteres ecclesie.

CONCLUSIO.

Ad aduersarios.

Principio ad vos conuertor, amici, qui in nos conscribitis libros, & plaustra, quod dici solet, conuitorum (quam intemperiem vobis sanè inuideo) in nos exontis. Expositionem meam audistis & vidistis, libellis vestris oppositam, & hanc quidem nec acerbam, opinor, nec maledicam, sed placidam. Nolui enim vos veluti hostes excipere & tractare, sed duntaxat nos & nostram innocentiam iusta defensione contra accusationem vestram asserere vestramq; propulsare iniuriam. Intellexistis quid sentiamus de Cæna Domini sancta, & cur ita sentiamus, quodq; sententia illa nostra nusquam exorbitemus à fide vera, neque noua in hac causa proferamus dogmata, neque à vetustis in vera religione consensu dissentiamus. Dissentimus à Papistis, qui extremo demum & corruptissimo sæculo, corrumperunt huius Sacramenti simplicitatem. Fatemur autem hoc Sacramentum ab ipso Christo esse institutum valereq; vel hodie eius institutionem in ecclesia, ut ipse adhuc ei benedicat, et Cæna suæ præsit specteturq; à fidelibus cōuiuiis vniçe. Fatemur præterea fideles in Cæna non habere signa prophana et vacua. Adesse enim Christum suæ ecclesie, qui & ipsam pascat pabulo vitæ atq; hac pascatur vero eius corpore & sanguine per veram fidem, eo modo, quo ipse dixit carnem suam ve

rum esse cibum, & sanguinem eius verum esse potū ad vitā sempiternā. Dicimus fideles cōmunionem habere cū Christo, ut corpus ipsius facti, ipse in eis viuat et ipsi in eo. Quae de corporali vel carnali Christi praesentia et manducatione afferuntur, non agnoscimus, sed inter noua & aliena à simplicitate apostolica dogmata referimus. Vos autem hortamur in domino ut depositis cōtentionibus inutilibus, hanc veritatem simplicē nobiscum agnoscetes, omnia studia vestra, summa diligentia, fide et modestia conuertatis ad edificandā ecclesiam. Memorabilis est beati Iacobi doctrina, qua nos omnes instruit & dicit, Quis sapiens & scientia praeditus inter vos? ostendat ex bona conuersatione opera sua, cū mansuetudine sapientiae. Quod si emulationem amaram habetis, & contentionem in corde vestro, nolite gloriari & mendaces esse aduersus veritatē. Non est enim ista sapientia è supernis descendens, sed terrena, animalis, demoniaca. Vbi enim emulatio & contentio, ibi instantia & omne opus prauum. Quae autem è supernis est sapiētia, primum quidem casta est, deinde pacifica, aequa, tractabilis, plena misericordia, & fructibus bonis, nihil dyudicans, nihil simulans. Fructus autem iustitiae in pace seminatur facientibus pacem. Dominus pacis concedat nobis pacem.

Deinde cum aduersarij nostri, principes illustriss. et *Ad magistratus* sanctos omnes, in nos excitarint, adhortantur *magistratus.* ut officij sui memores, nō permittant distrahi liberos nostros, utpote pestiferis refertos erroribus. Etenim si hos ferant & diuendi permittant, non minus ipsos pec-

care quā si sināt publica pascua, aut fontes & flumina
 infici veneno vel sordibus, aut merces adulteratas palā
 distrahēdas exponi foro publico. Proinde digniores nos
 esse qui sceptro magistratus, quā stilo refutemur, obse
 cramus illustriss. principes dominos nostros clementiss. et
 sanctos semperq; nobis honorandos magistratus, ut pau
 cula hac pro nobis dicentes, audiant. Agnoscimus sanē
 cuiusvis sancti magistratus officiū esse, prohibere a sub
 ditis noxia, & propagare in eosdem salutaria: quinimō
 & ē medio tollere, vel carceribus cohercere, vel pro a
 quitate punire & refrenare homines pestiferos, incurā
 biles ac blasphemos, ne longius serpat contagium mortis
 ac inficiantur innocentiores ac simplices & pereant.
 Docemus & nos blasphemos, impios, adde & magicos
 libros tollendos esse ē medio, ne veritas, religio sana, &
 gloria Dei perpetua afficiatur ignominia, mentesq; pio
 rum corrumpantur. At negamus vel nos vel libros no
 stros in illorum classē esse referendos. Nullis heresi
 bus, nullis absurdis & curiosis quāstionibus, nullis de
 niq; blasphemis aut impietatibus coinquinati & feda
 ti sumus, vel nos, vel libri nostri. Atque hic non postu
 lamus, ut verbis hysce nostris credatur, fiat ex ipsa re pe
 riculum, fiat ex verbo domini iudicium, Audiantur
 & legantur libri nostri nostrorumq; & si quid in his
 deprehenditur impij, culpam non deprecamur, pereāt.
 Nunc verō coniunguntur nomina nostra, ab aduersa
 rijs cū odiosissimis nominib. Anabaptistarū, Davidia
 norū et Mēnonitarū, appellamur impij, blasphemī, sacra
 mentarij, nimirum sacramentorum profanatores &

euer-

nerfores, cum rectius Sacramentarij illi dici debeant, qui
nimium addicti sunt sacramentis, & nimium ipsis tri-
buunt. Sicuti & Latinis uxori dicuntur nimis affe-
cti erga uxores. Ab impijs verò et Anabaptistis quis
quæso non abhorreat? Nos certe ipsi à commemoratione
illa saltem nedum ab ipsismet rebus toto abhorremus
pectore. Dum autem ad eum quem diximus modum,
deferimur apud omnes scèdaq; hac proluimur infamia, *Libros probi-
bere.*
deniq; & inuectiua illorum in nos in omnium ober-
rent manibus, arcentur interim omnes à lectione libro-
rum nostrorum, adeo ut viro cordato liberè ne aspicere
quidem nostras responsiones liceat, nimirum ne ex
his appareat, quàm iniquè nobiscum agatur. Etenim
execramur & oppugnamus istas & omnes alias isti-
us generis, quas illi nobis obtrudunt, scètas, declaramusq;
nos omnium de religione impiè sentientium, & irreligiosè
de sacramentis loquentium, non consortes quidem aut
fautores, sed aduersarios potius ac hostes esse. In hac sa-
nè seria admodum re, occurrit mihi illud aliqui ludi-
ctum, quod alibi apud Plutarchum commemoratur
de quodam, qui cum infœliciter pinxisset gallos gallina-
cios, seruulo tabula adiuncto, mandauit, ut veròs gal-
los quam longissimè abigeret à tabula, ne absurdus pi-
ctura ipsius error euidenter appareret spectatoribus.
In nostris quidem rebus publicis liberum est pla-
nè vendere libros aduersariorum nostrorum con-
tra nos scriptos, imò hortamur ipsi omnes, ut le-
gant quæ scribuntur in nos, & conferant deinde
cum istis responsiones nostras, atq; ita dydudent do-

etrinas sequunturq; partem meliorem et veriore. Nihil itaq; iniqui postulamus à vobis, o sancti magistratus ministri Dei altissimi, cum nostros nostrorumq; libros & admitti & legi dyjudicariq; obsecramus. Tales non sunt libri nostri & nostrorum, quales prohibet lex vetus Imperatorum. Sordes non sunt, ut illi nostri aduersary calumniantur: venenum non sunt; adulterata & corrupta merces non sunt, quas venum foro publico exponi supplicamus. Iustitiæ consecrati estis, quotquot Deo ordinante, præsidetis populis: requirit autem iustitia, ut & altera pars, priusquam iudicetur, audiat. Ac comperimus iustissimum Deum grauius puniuisse reges & proceres, quoties inauditos & innoxios oppresserunt. Benedictionem verò suam offert & confert omnibus iustitiam iuste exequentibus.

Ad mini-
stros ecclesia-
rum.

Postremò clāssicum cecinerunt aduersary nostri, & vobis venerandis fratribus fidelibusq; ecclesiarum pastoribus atque ministris, ut arma omnes corripatis, luposq; ingruentes depellatis à caulis ouium. An verò nos habendi simus pro lupis: qui Christo domino pastori unico toti adheremus, illius solius vocem audire omnes iubemus, & omnes illius oues illi soli adducimus, nihil ex his furto subducimus aut etiam nobis mactamus: qui deniq; ouile totum vniuersam utiq; Christi ecclesiam pacatam & incolumen volumus, sed & omnes lupos fures & latrones, latratu nostro prodere & à caulis abigere contendimus, omnes hæreses & hæreticos execramur & persequimur.

mur, omnia verò symbola et sancta sancta ecclesia Dei, verbo Dei firmata & recepta dogmata, recipimus, teneamus & docemus, vos ipsi iam iudicate: & cum per omnia in veris & iustis dogmatibus vobiscum & cum omnibus Dei filijs consentiamus, sed & Christi participationem in Cœna, eo modo, quem iam copiose exposuimus, agnoscamus, & per cetera religiose de Sacramento sentiamus & loquamur, dispicite obsecro an operapretium, pium & necessarium sit, vestra vos in nos fratres & amicos vestros ministrosq; Christi orthodoxos arma ceu in impios, sacramentarios, & blasphemos, & hanc quidem unicam ob causam, quod preciosum corpus & sanguinem Domini corporaliter in Cœna etiam ab impijs ore corporis manducandum prostituerenolimus, conuertere. Habemus fratres, habemus quod agamus, etsi non in nostra metipsorum viscera, nulla necessitate, neq; religionis, sed contentionis ergò, stringamus venabula. Sunt lupi innumeri, cum visibiles tum invisibiles, stabulis infesti dominicis, à quibus certissima omnibus Christi ouibus, imminet pericula vitæ: à nobis scitis, nisi omnia nescire malitis, nihil esse metuendum. Quinimò in depellendis lupis, pro gratia nobis concessa à Domino, laboramus sedulo. Nolite impedire laborantes in Domino, quin coniungite potius vestram nobis operam, sicuti & nos vestri collaboratores in Domino esse optamus. Discernite inter hostes & ciues atq; amicos. Rectè aiunt preliandum esse cum hostibus, ciues autem fouendos esse prudenter, neq; ex amicis faciendos inimicos. Si qui verò vestrum à nobis paululum adhuc

dissentitis, pacem tamen nobiscum colite, & schisma no-
 xium refugite. Oremus Dominum, ut det nobis unum
 & idem sentire omnibus. Clamat apostolus, Inuicē alij
 aliorum onera portate, et sic complebitis legem Christi.
 Facebant ergo odia, contentiones & iurgia. Filij Dei su-
 mus, o fratres. Beati pacifici, inquit Dominus, quoniam
 filij Dei vocabuntur. Idem multis ostendit, quāti facias
 pacem fidelium atq; concordiam. Certē omnes nos in u-
 num corpus coniunxit, cuius ipse caput est, princeps pa-
 cis & salutis. Ipsam ille Cœnam nobis reliquit, æterna
 societatis unionisq; sacratissimum symbolum. Ne cōmit-
 tamus, oro, ut ex symbolo pacis, nostra culpa & conten-
 dendi libidine, symbolum belli & litium fiat. Clamat ip-
 se ad nos Dominus, & ait, Discite à me, quod mitis sum
 & humilis corde. Inuenietis requiem animabus ve-
 stris. In hoc cognoscent omnes quod discipuli mei sitis, si
 charitatē habueritis inter vos mutuā. Clamat ergo bea-
 tus Ioan. apostolus, et ait: Qui non diligit fratrem, manet
 in morte. Diligite ergo mutuū. Deus charitas est, et qui
 manet in charitate, in Deo manet, et Deus in eo. Manea-
 mus ergo in charitate, ut maneamus in Deo, simusq; di-
 scipuli Chirsti. Contentionibus & iurgijs amittitur ve-
 ritas & gratia Dei, ac prouocatur ira Domini. Loquun-
 tur omnes Ecclesiastica historia, quanta mala inuexe-
 rint in ecclesiam Dei episcoporum φιλαυτία καὶ φι-
 λοεξία. Timeamus ergo Dominum, ne is qui nunquam
 dissidia in ecclesia, nulla necessitate suscepta et conserua-
 ta, impunita praterijt ac dissimulauit, idem hodie quoq;
 in nobis contensionibus illas nostras iusto suo persequatur
 iudicio

indicio. Commemorabo hic memorabilem S. Eusebii locum ex 8. lib. Ecclesiastica historia, atque ita simul finem dicendi faciam. Quis, inquit, numerosas illas aggregationes ac multitudines Cœtuum, per singulas ciuitates, insignesq; concursus ad Oratoria describet, quorū gratia priscis ædificijs non contenti, in singulis ciuitatibus spaciosas & amplas, ex ipsis fundamentis, construxerunt ecclesias? Hac autem progressu temporum proficientia, & quotidie in magnitudinem & amplitudinem crescentia, nulla potuit inuidia prohibere, neque malus aliquis demon fascinare, nec homo quisquam insidijs impedire, quandiu diuina & cœlestis dextera populum suum adhuc dignum existentem, inuisebat & custodiebat. Postquam verò res nostra, per nimiam illam libertatem, ad molliem & segnitiam degenerarunt, et alij alios sunt odio et contumelijs prosequuti, et tantum non nosipsum per nosipsum armis ac telis verborum, ubicunque contigit, impugnauiumus, et episcopi in episcopos irruerunt, ac populi contra populos seditiones mouerunt. deinde infanda hypocrisis et simulatio ad summum usq; malitia progressa fuit, diuinum iudiciū, pro more suo, dum adhuc cœtus ecclesiastici congregarentur sensim ac pedetentim nos inuisere cœpit, ita ut persequutio à fratribus, qui in militia erant, exordia sumeret. Cum autem nullo illius sensu tangeremur, neq; Deum placatum nobis ac propitium reddere conaremur; sed quasi impij delicta nostra Deū nec curare nec visita re putaremus, neq; nostras alias alyis cumulauiumus. Et qui pastores nostri uidebatur, repulsa pietatis norma

Speculum exhibuum omnibus, in quo se contemplantur omnes euangelica religionis homines, imprimis uero pastores

mutuis inter se contentionibus fuerunt inflammati: & dum hac sola, contentiones videlicet, minas, emulationem, mutuum odium & inimicitiam exagitant, & ambitionem suam quisque, in morem tyrannidis, studiose persequitur, tunc sanè Dominus, tunc inquam, secundum vocem Hieremia, filiam Zion obscuram reddidit, & gloriam Israelis cœlitus deiecit, nec recordatus est scabelli pedum suorum, in die iræ suæ. Et submersit Dominus omnia speciosa Israelis, & destruxit omnes macerias eius. Et secundum Psalmorum vaticinia, subuertit ac terminauit testamentum serui sui, & afflixit in terram, per destructionem ecclesiarum, sanctuarium suum, & destruxit omnes macerias eius. Posuit munitiones eius formidinem, diripueruntq; populi multitudinem, omnes qui is hac transierunt. Et preterea opprobrium factus est vicinis suis. Exaltauit enim dexteram inimicorum eius, & auertit adiutorium gladii eius, & non est auxiliatus in bello: sed & destitit ab emundatione eius, & sedem eius in terram collisit, imminuitq; dies temporis eius, & super hac omnia effudit super illum confusionem. Sunt hac omnia in nobis adimpleta, quādo Oratoria, à culmine ad pavimentum usque, una cum ipsis fundamentis deici, diuinasq; & sacras scripturas in medio foro ardere ipsis oculis vidimus. Et ecclesiarum pastores, alij turpiter huc & illuc sese abdiderunt. Alij ignominiose capti sunt, & ab inimicis irrisi: quando etiā iuxta alium propheticum sermonem, effusus est contemptus super principes eorum, et errare eos fecit in iniurio nō in via. Et reliqua quæ ibi-

dem

dem leguntur. Quibus & sauisſima ſubiungitur perſe-
quutio Diocletianica. Speculum in quo res noſtras
& fata noſtra hodie contemplemur, omnibus nobis pro-
poſui. Nihil ſanè fuerit opus Domino Deo noſtro nobis
ex lapidibus excitare perſequutores. Viuunt ac parati
hodie ſunt multi Diocletiani, Maximiani, Maxentij et
Maximini. Habet ille quos nunc in nos, vt in ſuos ali-
quando, imittat ab Aquilone Senacheribos, Salmanaſ-
ſares & Nabuchodonofores, quorum opera eluat Do-
minus ſordes filia Zion, & ſanguines Hieruſalem ex-
purget de medio eius, in ſpiritu iudicij & incendiij vel
feruoris. Vigilemus ergo & oremus. Conuertamur ad
Dominum in pœnitentia vera, & ſeruiamus ei in vera
fide & dilectione. Si ſanabiles ſumus, intueamur hæc
veteris Eccleſiæ exempla diligenter, adaptemus hæc mo-
ribus noſtris, ac emendemus in melius, quod vel igno-
ranter vel ſcienter peccauimus. Semper patent pſys diui-
na gratiæ fores. Semper idem Deus ſui ſimilis, incurabi-
les iuſto ſuo iudicio perſequitur. Dominus Ieſus pro-
pitatio & ſpes noſtra vnica, adaperiat nobis oculos no-
ſtros, vt ea quæ iuſta & ſancta ſunt videamus, volun-
tatesque noſtras cōmoueat, vt ea etiam velimus

& perficiamus ad gloriam nominis
eius, & omnium noſtrū
ſalutem.

Menſe Februario, Anno

M. D. LVI.

EMENDANDA.

Pagina 41. uersu primo pro nimirum lege minimū.
pag. 46. uer. 5. pro primi lege premi. pag. 77. 19. pro
lectorem lege lectionem. pag. 80. 9. pro confictus le
ge cōuictus. pag. 90. 12. pro aut lege ut. pag. 95. 1. pro
incorporamur lege incorporemur. pag. 96. 5. p pon
tificam lege pontificiam. pag. 101. 14. pro prouulga
ra lege pmulgata. pag. 109. 5. qua uident (adde) san
ctos (deinde subiunge) tot secula. Reliqua, sicubi
literæ sint transpositæ, nullo negotio quilibet emen
dabit.

